

ТУРСУНБОЙ АДАШБОЕВ

ОСМОНДАГИ ДАРВОЗА

Сайланма

**Фарзандларимнинг волидаси Саломатхоннинг
ёрқин хотирасига багишлайман**

Ўзбек болалар адабиётининг таниқли вакилларидан бири Турсунбой Адашбоевнинг мазкур китобига эллик йил давомида ёзган энг сара шеър ва достонлари жамланган.

**Камолнинг олмаси
1964**

ДАДАМЛАР БИЛИШМАДИ

Шўхлик қилиб, туфлимнинг
Пошнаси кўчиб кетди.
Жойига келтиргунча
Рангларим ўчиб кетди.
Дадамлар билишмади,
Ўзим қоқдим нағални.
Маза қилиб босаман
Энди лойни, шағални.

ДЎСТЛИК

Насибанинг олмаси
Тушиб кетди ариқقا.
Тутқич бермай ўйнайди,
Ўхшаб олтин балиқقا.

Содиқжон кўриб қолиб,
Олмани ушлаб берди.
“Раҳмат” айтиб Насиба,
Ярмисин тишлаб берди...

КЎМИР ТАШИДИК

Бир машина кўмир олиб
Келди отам.
Енг шимариб ёрдам бердик
Мен ва Ҳотам.
Қаранг, ишлар қизиб кетди
Ўша топда.
Дам олмасдан ташиб турдик
Замбил, қопда.

Чарчаш қайда, қўлимиз ҳам
Толгани йўқ.
Шунча қўмир то кечгача
Қолгани йўқ.
Меҳнат қилиб хурсанд этдик
Ойимизни.
Сўнг ўйнадик, ичиб бўлгач
Чойимизни.

МЕНИНГ АКАМ

Катта акам қишлоқда
Тракторчи.
Ишонмасанг далага
Бориб кўр-чи.
Уни кўрган, билганлар
“Қоравой” дер.
Устидаги коржома
Қора мойдир.
Эрталаб тракторни
Кузатади.
Бузилса, якка ўзи
Тузатади.
Ўт олдирса, жим турмай,
Пат-пат этар.
Далаларни бир текис
Ҳайдаб кетар.
Акам қаби тобланиб,
Кучга тўлсам,
Тракторчи бўламан,
Катта бўлсам.

ТЕГИРМОНЧА

Тол пўстидан нов ясаб,
Қамишдан тарнов ясаб,

Паррагин дарров ясаб,
Курдим мен тегирмонча.

Тоши пластилиндан,
Темирдан ўқ қилинган,
Қувонаман дилимдан,
Чунки ишладим анча.

Буғдойдан ун тортаман,
Пахтадай оқартаман,
Ҳаммага тарқатаман,
Мақтасам арзир қанча.

МУРАББО ПИШИРДИК

Онам билан бир тоғора —
Анжир олиб,
Қозончага беш пиёла
Шакар солиб,
Кўмаклашдим ўчоққа ҳам
Ўтин қалаб,
Хўп қайнатиб, сўнг тиндирик,
Биз эрталаб.
Кўп вақт ўтмай қозончамиз
Ерга тушди.
Онам деди: — Мураббо ҳам,
Мана пишди.
Ҳамма нарса ранг оларкан
Меҳнат, ишда.
Маза қилиб уни еймиз
Кузда, қища.

БОДРИНГ

Бўлса ҳам олти яшар
Инжиқроқ укам Башар.

Бир кун тунда уйғониб,
(Балки уйқуси қониб)
— Ойи, бодринг ейман, — деб
Қилди йиғлаб хархаша.
— Ўғлим, ярим кечада
Қылмагин ғириңг-ғириңг.
Ухлајапти полизда
Сен сўраган бодринг...

Биз саёҳатчилармиз

1966

УСТИ ИВИБ ҚОЛАДИ

— Ҳаво айниб бирданига
Ёмғир қўйса пақирлаб.
Нима учун бақалар
Сувга қочар вақирлаб? —
Обиджондан Зайнулло
Шуни сўраган эди,
Обид бир оз ўйланиб,
Дўстига шундай деди:
— Ёмғирдан қочмасами,
Уст-боши ивиб қолар.
Шунинг учун анҳорга
Шўнғиб кетар бақалар.

ХАВОТИР БЎЛМАНГ

Туфлисининг устидан
Калишни кийиб олиб,
Ўйнар эди ҳовлида
Ёғочот миниб Голиб.
— Эҳтиёт қил, аяб кий,
Пойафзал, усти-бошни.
Эшикда лой йўқ ахир,

Ечиб қўйгин калошни.
Голибжон дер: — Отимни
Гижинглатиб чопаман.
Хавотир бўлманг, ойи,
Босишга лой топаман...

КОНФЕТ

Айвонда пиқ-пиқ йиглаб
Ўтирап эди Камол.
Укасининг бу ишидан
Аччиғланди Ойжамол.
— Нор билан ўйнасанг-чи
Ҳадеб йиглайвергунча.
— Йиглайман, ишинг нима,
Ойим конфет бергунча...

СИЧҚОН ҚАНЧА ЯШАЙДИ?

— Сичқон қанча яшар? — деб
Сўраб қолди Умрихон.
Шундай жавоб қайтарди
Синглисига Қумрихон:
— Билсанг, сичқон дон-дунни
Ишламай ер ёзу қиши.
Унинг қанча яшаши
Мушукларга боғлиқ иш...

ДАРВОЗАБОН

Хол мактабдан кеч келди
Усти-бошин кир қилиб.
Дўпписи ҳам чокидан
Кетган эди йиртилиб.
— Дўппингни ким йиртди? — деб
Онаси куйиб-пишди.

— Ҳа, буними, болалар
Футбол қилиб тепишиди.
— Ўша маҳал сен ўзинг
Қаёқларда юргандинг?
— Дарвозабон эдим-да,
Ўша ерда тургандим...

ПОЕЗД НЕГА ПИШИЛЛАР?

— Поезд нега пишиллаб,
Нафас олар вишиллаб.
Сабабини айт қани.
Жавоб қайтарди Фани:
— Пиш-пиш этмаса борми,
Ёрилиб кетар қорни...

БАҲО ЕТИШМАЯПТИ

— Неъмат, нега табелингда
Яхши баҳоларинг кам? —
Деб отаси сўраганди,
Жавоб берди хотиржам:
— Ўйламанг, “беш” қўйишни
Муаллима аяпти.
Синфимиизда бола кўп-да,
Баҳо етишмаяпти...

КОРОНГИДА КЎРМАБМАН...

— Бу нимаси, сандиқقا
Бирор чангаль солибди?
Бир халтача ёнгоқдан
Беш донаси қолибди.
Ҳой, боласи тушмагур,
Ёнгоқларни ким еди? —
Деб Нурматдан онаси

Аста сўраган эди,
Нурмат жавоб қайтарди
Бошини қилиб сарак:
— Қоронгида бештасин
Кўрмаган бўлсам керак...

ИККИ БАҲОДИР

Ўз аксини ойнада
Кўриб митти Баҳодир,
Дер: — Ойижон, ойижон,
Мана икки Баҳодир.

**Арслонбоб шаршараси
1969**

АРСЛОНБОБ ШАРШАРАСИ

Оппоқ қордан телпак кийган
Юксак Аччи дараси.
Пастда эса шовуллайди
Арслонбоб шаршараси.
Шўхлиги-ю асовлигин
Тойга қиёс этаман.
Минг тўлғаниб оқиб тушар
Беш юз метр тепадан.
Камалакдай товланишин
Кўриб кўнглинг ёзилар.
Бир ҳовучин ичган маҳал
Чанқоғингиз босилар.
Қишлоқ бўйлаб садо берар
Қоялардан тушган сув,
Шунинг учун дегайлар
Қимиздайин пишган сув.
Виқор билан кўқдан боқар

Мағур Аччи дараси.
Пастда сўлим, оромижон,
Арслонбоб шаршараси.

ЎШГА САЁХАТ

Таътилим ўтмасин деб,
Бекор, бўшга.
Сирдарёлик Тўра оғам
Келган Ўшга.
Шаҳар бўйлаб меҳмонни
Айлантиридик.
Музей, кино, театр,
Боққа кирдик.
Санаторий, дам олиш
Уйларида,
Оқбура дарёсининг
Бўйларида,
Ҳордиқ олиб, чўмилиб,
Қилдик маза.
Қимиз билан қимронга
Тўйдик роса.
Меҳмон қарап атрофга
Ҳайратланиб.
Ҳа, чиндан ҳам шаҳарни
Бўлмас таниб.
Мана, Сулаймон тоғи,
Ўшнинг кўрки.
Юксакда қўш қайрағоч,
Унинг бўрки.
Тонг чоғи биргаллашиб
Чўлпон, Тоҳир,
Ана шу тоғ устига
Чиқдик охир.
Бунга шоир Бобурнинг
Пойи теккан.

Шу ерда у күп шеърлар
Ижод этган.
Тоғдан яққол күрасиз
Гүзал Ўшни.
Ана, Ўзган, Асака —
Яқын қүшни.
Сайру саёҳат учун
Раҳмат айтиб,
Уч кундан сўнг Тўравой
Кетди қайтиб...

ОЛОЙ

— Ўткиржон, ростин айтгин,
Кўрганмисан Олойни?
— Йўқ, оғайни, нимайди?
— Сени олиб борайми?
— Майли, саёҳат-роҳат.
Ҳаммага ҳам ёқади.
— У ерда-чи, Нор деган
Тоғам йилқи боқади.
— Хўп дессанг тоғамларга
Бориб ёрдам берамиз.
— Бўпти, ошна, пишлоқ еб,
Қимиз ичиб келамиз.
Шундай қилиб, икки дўст —
Ўткир, Хол йўлга тушди.
Бу сафарги таътилни
Яйловда ўтказишиди.

КЎКЁНФОҚ

Хуш ҳаволи гўзал жой
Кўкёнфоқ.
Ўйламанг-ки бунда бўлар
Кўп ёнфоқ.

Шахтёрлар шаҳридир бу,
Киройи.
Кундан-кунга очилмоқда
Чиройи.
Кўмир конин кўриб завқинг
Ортади.
Вагончалар “қора олтин”
Тортади.
Мавлон тоғам устун қиласар
Тахтани.
Жавлон тоғам пармалайди
Шахтани.
Комбайнлар тонгданоқ иш
Бошлайди.
Кўмирларни ёнгоқ қилиб
Ташлайди.
Сўнг поездлар уни юклаб
Қайтишар.
Шунинг учун Кўкёнгоқ деб
Айтишар.

ОЛАТОГЛИК БЎЛАМАН

Олатоғлик бўламан,
Олатоғлик.
Қордан дурра боғлаган
Лолатоғлик.
Кийик юрар Олатоғ
Қоясида.
Бўз уйимиз арчазор
Соясида.
Оқ қалпоқли қирғиз деб
Бўлманг ҳайрон.
Биз томонда мўлу кўл
Қимиз, айрон.

УХЛАБ ҚОЛДИМ

— Алла қылгин, күзингни юм,
Полвон ўғлим, қийнамай.
Ҳали қанча ишларим бор,
Ухла, мен ҳам куйманай.
Беланчакда ётган бола
Юмиб олиб күзларин,
Дейди: — Ойи, күрдингизми,
Аллақачон ухладим...

НИЁЗ БИЛАН ПИЁЗ

— Етмиш қават түн ичида
Исиб кетма деган эдим,
Эшитдингми сўзимни?
Қизиқсиниб тўнинг ечиб,
Сендан пича еган эдим,
Ачиштирдинг кўзимни.
Қасдинг борми, йифлатдинг,
Зормидинг кўз ёшимга.
Қани гапир, ҳой пиёз?
Ойим тўғраб сомса қилди,
Етдинг-ку ўз бошингга,
Энди ҳолингвой, пиёз!
Шундан бери Ниёз хафа,
Пишмаган оқ пиёздан.
Пиёз эса аччиқланар
Уқуви йўқ Ниёздан.

АЛАМ, АЛАМ...

— Бетоқат қиз Саида,
Сенсан нафсинг пайида
Турмайсан дастурхондан
Уялмайсан меҳмондан.

Уят-уят!
— Ўзинг анор еёлмай,
Озгина бер деёлмай,
Кўзинг тўрт-ку бечора,
Оломасанг на чора,
Аlam-alam!

ЙИГЛАМА, ОППОҚЦИНAM

Ариқдан ўтаётиб,
Гулнора тойиб кетди.
— Мунча анқайдим, — дея
Ўзини койиб кетди.
Ўрнидан туриб дарҳол,
Кўйлакларини қоқди.
Сўнгра қўғирчоғига
Мехр-ла кулиб боқди:
— Вой, қаттиқ ииқилдингми,
Кўзлари мунчоққинам?
Бошинг тошга тегдими,
Йиглама, оппоққинам.

ЭСИМДА ЙЎҚ

— Мен қайси кўйлагимда
Туғилганман? — дер Сора, —
Ўзимнинг эсимда йўқ,
Ойи, биларсиз зора...
— Ойинг сендан ўргилсин,
Оппогим, дўмбоқ қизим.
Сен атлас кўйлагингда,
Туғилгансан, юлдузим...

ИШЛАРИМ КҮП

Халимахон қўғирчогин
Ётқизиб беланчакка,
Эркалаб алла айтар,
Кенг уйда ўзи якка.
— Тезроқ ухла, оппоғим,
Ишларим бор бир талай.
Ўпчиғингни сўриб тур,
Мен мураббо еб олай...

АСОМ — РАССОМ

Асом ҳаваскор рассом,
Айтсан гапнинг аслини.
Тунов куни ишлаганди
Бир эшакнинг расмини,
Аҳмад қўриб: — Қойил, — деди,
— Ўхшар бурни, қулоғи.
Шошма, ахир, олтита-ку,
Бу эшакнинг оёғи.
Шу гапдан сўнг бир минут
Жимлик чўқди ўртага.
— Отдан кейин қолмасин деб,
Шундай чиздим жўрттага...

ҚОВУН ЕДИК

Мен ва Тўлан
Куни билан
Уйда эдик,
Қовун едик.
Тилиб-тилиб,
Маза қилиб,
Дадам еди
Коса қилиб...

КИМ ЎЗФИР?

Тошдан-тошга урилиб,
Сапчиб оққан сувни кўриб,
Чопа кетди Муроджон
Ким ўзарга югуриб.
Қоя бўйлаб сакради
Гоҳ пастликка, гоҳ тикка.
Тошдан-тошга ирғиб сув ҳам,
Тушди оппоқ кўпикка.
Ўз-ўзича ўйлар Мурод:
“Ортда қолмай иш қилиб”.
Сув эса парво қилмай,
Ўйнаб чопар пишқириб.
Мурод секин орқасига
Боққан эди қайрилиб,
Чидамасдан сув оқарди
Пахтазорга айрилиб.

КАТТА БЎЛСАМ КИЯМАН

— Тоҳир, сенга битта гап
Айтаман, хўпми?
Нодир акам Тошкентдан
Юборган туфли.
Кўргандинг-ку янгийди,
Орқа-ю олди.
Бу йил менга негадир
Тор келиб қолди.
Сандиққа солиб қўйдик
Биз тунов куни.
Катта бўлсам маза қилиб
Кияман уни...

НАФС

— Новвот есам тишим оғриб
Қолди ҳали.
Энди, ойи, конфет беринг, —
Дейди Вали.

КЕРЗ ЭТИК

Оёғимда күмирдай
Қора ва соз керз этик.
Аскар акам Темурдай
Қадам ташлайман тетик.

Тез-тез суркаб қорамой,
Тозалайман ҳар куни.
Биласанми, Жўравой,
Дадам келтирган уни.

Айниқса, қишда кийсам,
Пасаяр совуқ шашти.
Дўстим, керз этикнинг ҳам
Ўзгача бўлар гашти.

НУР ДАРЁ
1975

ҚИШЛОГИМ

Қишлоғимиз Ўнгор тоғнинг
Шундоққина пойида.
Дам олгани келинг, дўстлар,
Айни июл ойида.

Шинам, кўркам оромгоҳ бор,
Бир томонда Арчатоғ.

Саричелек ёкут күзгү,
Аксин күрар барча төг.

Чанг түзғиган күчасидан,
Кунда ўтгим келади.
Йўлда ётган тошини ҳам
Олиб, ўпгим келади.

Қайда юрмай унутмайман,
Сени, Она қишлоғим.
Кўз олдимда тураг ҳамон
Қимиз, айрон, пишлогинг.

МЕРГАН

Мурод билан
Бирга биз.
Борган эдик
“Тир”га биз.
Отиб кўрсам
Тулкига,
Тегмай, қолдим
Кулгиға.
Мўлжал олсам
Мушукка,
Ўқ санчилди
Эшикка.
Доирада
Жўн рақам.
Етти, саккиз,
Ўн рақам.
Пастда қолар
Чизифи,
Авжи ўйин
Қизифи.
Тугаб қолди

Тангамиз.
Берган эди
Янгамиз —
Совун билан
Фалтакка.
Қолар бўлдик
Калтакка...

ЯЙЛОВДА

Бўзбу тоғнинг этагини
Қашқасув деб атарлар.
Шу яйловда боқилади
Минглаб қўйлар, отарлар.

Балки дўстим: бу томонга
Ҳеч йўлингиз тушмаган.
Чўпон акам Мамадали
Бултур шунда қишилаган.

Шу баҳорда отам билан
Қашқасувга шайландик.
Акамиздан хабар олиб,
Бир-икки кун айландик.

Кўм-кўк яйлов, тоғ бағридан
Булоқ оқиб тушади.
Норгул янгам бўз ўтовда
Қимиз, айрон пишади.

Тошўчоққа арча қалаб,
Олов ёқиб аzonда,
Сариёғни эритар
Зулфи холам қозонда.

Жуда салқын, ёз иссиги
Сира ўтмас товондан.
Дадам икков маза қилиб,
Қайтдик яйлов томондан.

“Р” ҲАРФИ

Балки сизлар танимассиз,
Үйинқароқ Парпини.
Илгари ҳеч айттолмасди,
Сўрасанг “Р” ҳарфини.
— Қани айт-чи, Раҳмон, Равшан
Ўтиналарни арралади.
— Яхмон, Явшан бийгаллашиб,
Ўтиллайни аллалади.
— Рўзи билан Ризвон чиқди,
Ғўра едик бир дўппи.
— Йўзи билан Йизвон чиқди,
Ғўла едик бий дўппи.
Эринмасдан такрор ўқиб,
Арра, карра, заррани,
Ҳар бир сўзни юз бор айтиб,
Эгаллади мэррани.
Хозир эса дўстлари ҳеч
Мазах қилмас Парпини.
Кўп машқ қилиб, ўрганди у,
Охири “Р” ҳарфини.

ЗИРА

Зира дерлар отимни,
Сомса мен-ла тотимли.
Пасайтииринг оловни,
Хушбўй қилгум паловни.
Айнимасман сира ман,
Дардга даво зираман.

ТАЪТИЛДА

— Қол, — дер Ҳасан, — кечагидай,
Яна йўлда чувалсанг.

— Нега бормай, ахир мен,
Териб келдим чувалчанг.

Қийин Ҳасан-Ҳусанни,
Бир-биридан айирмоқ.
Сой бўйига келишди,
Қўлда чепак, қайирмоқ.

Қамишзорда бақаларнинг
Вақ-вақаси авжида.
Қайирмоқнинг пўкаги
Ўйнар сувнинг мавжида.

Ким билади балиқларга,
Ёки хабар етганми?
Таътил пайти улар ҳам
Ўйнагани кетганми?..

КОЗИМ ҲАЙРОН (*Манзара*)

Кун ботиши Козимни
Жуда ҳайрон этибди.
— Дада, қуёш думалаб,
Тоғ бошига этибди.
Йиқилибди шекилли,
Бурни қонаб кетибди...

ОЙ

Тоҳир ва бобожони,
Қовун пойлар капада.

Кўқда юлдуз маржони
Фир-фир эсар шабада.
Ҳавас билан Тоҳиржон,
Боқар йироқ-йироқقا.
Ярми кемтик ой чиқди
Ўхшаб худди ўроқقا.
— Бундан ўн беш кун аввал
Бутунгина ой эди.
Бирор уни синдириб,
Қўйганми, — деб койиди.

ЭСКИ БЎЛИБ ҚОЛАДИ

Дилшод янги туфлисин
Нимагадир киймайди.
Ялангоёқ юрар доим,
Балки қўзи қиймайди.

— Бор, туфлингни кийиб ол,
Бундай юриш фалати.
— Тоға, уни кийсам-чи,
Эски бўлиб қолади...

ОЛАТОФ-ЛОЛАТОФ 1978

ОЛАТОГЛИК БЎЛАМАН

Олатоғлик бўламан,
Олатоғлик.
Қордан дурра боғлаган
Лолатоғлик.
Кийик юрар Олатоғ
Қоясида.
Уйимиз арчазорнинг

Соясида.
Олатоғда туғилиб,
Шунда ўсдим.
Овулимга мәҳмон бўл,
Азиз дўстим!

ЯША, РАҲМАТ

Дилбар, Тўлан
Байрам билан
Бир-бирини қутлашар.
— Дўстим, Ҳасан,
Тезроқ ясан.
Чирмандани чал, Башар.

Юзи лўппи,
Бошда дўппи,
Тўни йўл-йўл бекасам.
Бошла тезроқ,
Вақт озроқ,
Кеч қоласан йўқласам.

Рака-рум-ранг!
Така-тум-танг!
Учиб қўяр елкаси.
Қойил, Ҳасан,
Қотирасан
Бу — Андижон полкаси!

Яша, раҳмат!
Куйлар Аҳмад,
Шеър ўқиган Омондир.
Шунинг билан,
Дилбар, Тўлан,
Концертилиз тамомдир.

ЯХМАЛАК

Тол-тераклар
Булдуруқ,
Жунжикаман
Үлтириб.
Йўл-у, бекат
Музойнак.
Анҳор таққан
Кўзойнак.
Янги уст-бош
эгнида,
Бурнин артиб
енгида,
Гапга кирмай
Мирҳайдар,
Яхмалакни
Зир ҳайдар.
Физ-ғиз учеб
Ўнгирдан,
Шошиб қолиб
У бирдан,
Тушиб кетди
Ариққа.
Усти-боши
Хўл жиққа.
Қолди бир пой
Пиймаси.
Ойим нега
Куймасин?
Бир оёқда
Қўл тираб.
Укам турар,
Мўлтираб...
1977.

ҚИШНИНГ ТҮНИ СҮКИЛАР

Ҳадемай қиши бўлди,
Жуда соз иш бўлди.

Завқланиб янада,
Сирғандик чанада.

Булутлар сим элак,
Бўғотда сумалак.

Ўйнадик ҳовлида,
Қор отар Мавлуда.

Ҳаво соф, тозадир,
Фуборни ёзади.

Қиши түни сўкилиб,
Қировлар тўкилиб,

Кун қулиб боқар-да,
Жой берар баҳорга.
1974.

ОЙ ПЕТРИ

Қора денгиз сатҳидан,
Уч минг метр Ой Петри.
Орти эса қўриқхона,
Кийикларга жой Петри.

Қрим тизма тоғларин
Қучар денгиз, қучар сув.
Ой Петридан бошланур,
Машхур шовва Учан сув.

Ой Петрига булут қўнса,
Уч кун ёмғир ёғаркан.
Пар тўшакдай сирғалиб
Ялта сари оғаркан.

Йўлга тушиб тонг пайти,
Тоғда қилдик нонушта.
Бундан яққол кўринади
Артек билан Алушта.

Кемалар бир маромда
Янгилаб борар изни.
Улкан Айиқ тоғидан
Кузатаман денгизни.
1975.

ВАРРАК

Укам Акбар варрагини
Апил-тапил битказиб,
Ойим берган ғалтак ипни
Бўйра чўпдан ўтказиб,
Чопганича чиқиб кетди,
Кўча томон пилдираб.
Қуёш эса тоғ ортига
Ўтган эди филдираб.
Акбар қайтди кўчадан
Ҳафсаласи пир бўлиб.
Учиролмай қийналибди,
Хол иккови бир бўлиб.
— Саҳар туриб қуёшни
Боғлаб терак учига,
Маза қилиб учирай деб,
Ўйлаб қўйди ичида.
1974.

ЧАҚМОҚ

Үғлим терар бойчечак,
Үйинни ҳам унуган.
Баҳор эса осмонга
Күйлак тикар булутдан...

Бир бола тузоқ қўйиб
Чумчуқ ушлар, қуш овлар.
Раҳмат ака отини
Ўтга қўяр тушовлаб.

Лов-лов ёниб қизғалдок,
Қир бағрида яшнади.
Чақмоқ чақди қарсиллаб,
Ёмғир ёға бошлади.

Үғлим чопар мен томон,
Гул сайрини унуган.
Баҳор кўйлак кийдирар,
Кўк эгнига булутдан...
1976.

АҒДАРИШМОҚ

Ағдаришмоқ¹ соз ўйин,
Полвонлар эгмас бўйин.
Даврани кенг оламиз,
Чунки тенгқур боламиз.
Шайландим миниб эшак,
Акмал ҳам чиқди бешак
Ва бошланди тортишув.
Тез йиқитиш — шарти шу.
Мақтовлар ошар бошдан.
— Қани ол, — дер — ёнбошдан.
Узангига тиралиб,

Торта кетдим буралиб.
Үтирганлар “үх” дейди,
Акмал “отин” чух дейди,
У олгач этагимдан,
Тўқим тушди тагимдан.
Кўзимни очсам аранг,
Полда ётибман қаранг.
Тушим экан хайрият,
Ўнгимда бўлса... Уят...
1964.

¹ Кирғизча куч синаш ўйини.

ОНАЖОНИМ

Маъно тўла гапида,
Ўнг қўлида рапида
Онаажоним нон ёпар.

Чопар эдим боғ ора,
Қўлда сингги зогора,
Жонаажоним нон ёпар.

...Жанг борарди ўлкада,
Юрт ташвиши елкада,
Чароғбоним нон ёпар.

Отам тишлаган патир,
Ҳамон михда турадир...
Нур жаҳоним нон ёпар.

Ўша тўқочга мослаб,
Зувала узиб, ростлаб,
Мехрибоним нон ёпар.
1976.

ЎҚИРИҚ¹

Туни билан Қоратоғда
Бўрон тинмас ўкириб.
Оч бўридай улийди,
Қор тўзфитиб, бўкириб.

Тентаксой ҳам димланиб,
Тошни фажир кўпириб.
Дош беролмай тўзонга
Оқиб кетди кўприк.

Олиб қочар тек қўйсанг
Бўз ўтовни ўпириб.
Ўйланаман отамнинг
Нақ пинжида ўтириб.

— Ўғлим, — тойдек бўрон ҳам
Асовланар ўкириб.
— Жиловлайман мен уни,
Ясаб улкан ўқириқ...
1976.

¹ Ўқириқ — учига қил арқон боғланган таёқ.

КУШАНДА

Қинғир оёқ ўргимчакни
Билсанг, укам,
Тўр тўқиши балиқчига
Ўхшар экан.
Тўрни аста ўлжасига
Чоғлаб ташлар.
Чивинларнинг қўл-оёғин
Боғлаб ташлар.
Искабтопар исканжада

Визиллайди.
Бу жанг эса бизга унча
Сезилмайди.
Уни күриб, бобом бўлса
Ўшанда дер:
— Ҳашарот ҳам бир-бирига
Кушандадир...
1975.

БАҲОР КЕЛГАЧ

Қишиң қорини супурди,
Қуёш нурин уфурди,
Ялпиз ҳиди гупурди,
Баҳор келгач.

Чақмоқ кўкда ёнғоқ чақди,
Қизгалдоқлар селда оқди,
Қуёш яна кулиб боқди,
Баҳор келгач.

Кўзиқорин тердик тоғда,
Одил бормай қолди доғда.
Сўнг қовуриб едик ёғда,
Баҳор келгач.

Ялангоёқ қирда чопдик,
Сават-сават жағжаб топдик.
Икки тандир сомса ёпдик,
Баҳор келгач.
1973.

МОМАҚАЙМОҚ

Момақаймоқ, қуёш нури,
Сенга кўпроқ оқарми?

Ё сариқ соч ўзингга
Ҳаддан ортиқ ёқарми?

Бугун кўриб танимай,
Кўплар ҳайрон боқарди.
Қани айт-чи, сочинг нега
Бир кечада оқарди?

Оҳиста қўл узатсам,
Шамол турди аксига.
Сочинг тўзғиб бирданига
Тушдинг елнинг рақсига.

Умрим бекор ўтмабди,
Шунинг ўзи қадрли.
Нетай, уч кун бўлса-да,
Яшнатдим қир-адирни.
1974.

ЎҒЛИМГА

Жанг бораарди юртда қаттол,
Кирза этик кўрмай ҳатто,
Кир-чир қўйлак, ёқавайрон,
Ўсан эдик, бўлма ҳайрон.
Туфли қайдা, бошлар яланг,
Бошоқ териб ёшу яланг,
Зогора-ю, думбул ердик,
Аталага шукр дердик.
Уруш деса кўнглим фашким...
Сенга келар ҳавас, рашким...
Ўзинг бундоқ кўргин ўйлаб,
Кўш-кўш костюм, сара қўйлак.
Бизнинг ёшлиқ, ўғлим, бир оз
Оғир ўтган, билсанг бу рост.
Ўйлаб иш қил, бошдан тортиб,

Такасалтанг бўлма ортиқ.
Ҳар нарса мўл тўкин юртким,
Тупроғини кўзга суртгин.
1977.

БАРЧА ҚОЙИЛ

Давра тобда,
Нор рубобда
“Баҳор вальси”н
Яна чалсин.
Узат найни,
Кел, оғайни.
Мелиқўзи,
Чангда ўзи
Жўр овоздир,
Зўр овоздир.
Қилмайин ноз,
Ўйнар Гулноз.
Кейин Жўлан,
Қўбиз билан
Қўшиқ айтди,
Жўшиб айтди.
Йўқдир армон,
Янграп гармон.
Саша, Ноил,
Барча қойил.
Яша, Фани,
“Лезгинка”ни,
Қийиб қўйдинг,
Кийиб қўйдинг.
Шу ёз чоғи,
Артек боғи
Ҳа, фоятда,
Ниҳоятда,
Олди ҳусн,

Байрам тусин.
Ёнди лов-лов,
Гулхан — олов.
Қардошликтини —
Ва ёшликни
Қылдик таъриф,
Дейди, Маъруф.
1973.

ЙИЛҚИЧИ

— Фармон ота,
Хорманг, ота!
Касбингизга —
Борман, ота.

— Аҳмад, ўғлим,
Раҳмат, ўғлим!
Ҳеч кўрмагин,
Заҳмат, ўғлим.

Чавандозим!
Қишин-ёзин,
Йилқичига —
Чидам лозим.

— Тўсиқлардан
Ўтиб бардам,
Сизга доим —
Бергум ёрдам.

— Аҳмад, ўғлим,
Раҳмат, ўғлим!
1975.

ЁШ ДОРБОЗЛАР

Күшниларим — Анвар, Ўктам,
Дорга ихлос қўйган кўпдан.
Тутга арқон тортиб боғлар,
Ёш дорбозлар, ёш дорбозлар.

Кўкни тутар найнинг саси,
Жом ва пақир чирмандаси.
Лангар тутиб қаддин — ростлар —
Ёш дорбозлар, ёш дорбозлар.

Масхарабоз Каримберди,
— Қани, қарсак чалинг, — дерди,
Оёқ серпизб, куйга мослар —
Ёш дорбозлар, ёш дорбозлар.

Файратидан дил энтикар,
Балки ойга дор ҳам тикар.
Машқ қилса, қишу ёзлар,
Шу дорбозлар, ёш дорбозлар.
1976.

ФИШТ ҚУЯМИЗ

Деманг бизни олифта,
Тўрт хонали қолипда
Фишт қуямиз.

Кум сепади Комилжон,
Дилшод, Беҳзод жамулжам,
Фишт қуямиз.

Лойни бир оз тиндириб,
Сув заҳрини синдириб,
Фишт қуямиз.

Сергиб қолар асталаб,
Уни териб — дасталаб,
Фишт қуямиз.

Үй тикланар орада,
Ишлар қизғин боради,
Фишт қуямиз.

Завқли ўтар ёзги таътил,
Пешана тер ҳалол татир,
Фишт қуямиз.

1977.

ШОЛИ “ПОЛВОН”

“Саксон кунда савоқдаман,
Тұқсон кунда товоқдаман”,
Деб мақтанар шоли полвон,
Фам-ташвишдан ҳоли полвон.
Сувга сира түймаслигин,
Деҳқонни тинч қўймаслигин
Балки билмай мақтанади,
Ёки атай нақ тонади,
У жувоздан ўтгунича,
То қозонга етгунича,
Қадоқ қўлли деҳқон акам,
Тиним билмас, ҳа, чинакам.
Меҳнатга шай, енги турмак,
Шунинг учун босмас курмак.
Мақтовга кўп берилмагин,
Камтарин бўл, керилмагин.
1974.

СУМАЛАК

(*Манзара*)

Бойчечаклар ниш уриб
То тургунча ўрнидан,
Баҳор қишини тарновга
Осиб қўйди бурнидан.

БУҒДОЙЗОРДА

— Нега буғдой бош эгар? —
Савол бердим дадамга.

— Меҳнатини олқишилаб,
Таъзим қилар одамга.

— Тилла рангга уларни
Кимлар бўяб кетишган?

— Қадоқ қўлли деҳқонлар
Терлар тўкиб экишган.
Шу туфайли ҳар бошоқ,
Олтин бўлиб етишган.

1975.

КУЗ

Яна хазонрезгилик,
Боғлар ранги синикди.
Дилда ҳоким эзгулик,
Анҳорда сув тиникиди.

Оқ яктакли қайнинлар
Тақди яна зар балдоқ.
Қушларга гап тайинлаб,
Чағ-чағлайди заргалдоқ.

Уфқ эса лолагун,
Дарахтлардан ранг олар.

Хайрлашиб куз бугун,
Сочар олтин тангалар...
1976.

БУВИМЛАРГА МАЗА-ДА

— Бувимларга маза-да, —
Деди кулиб Озода.
Ҳайрон Мухтор ва Гулсум,
— Нимага? — сўрар Унсун.
— Уларни-чи, тиши йўқ,
Оғриқ билан иши йўқ...
1976.

ЖОЙИГА ОСЯПМАН...

Назми хола кўрпа қавиб
Ўтиради супада.
Набираси хом олмани
Узид солар липпага.
— Шоҳда нима қиляпсан?
Пастга туш, Хосиятхон!
— Тўкилган олмаларни
Жойига осаяпман...
1973.

ЯЛАЯПМАН

— Каримахон, қайга кетдинг?
Кел, сочимни тарайпман.
Қатиқни тез олиб чиқ.
— Ҳозир опа қарайпман,
— Озроқ эди ичиб қўйма,
— Ичганим йўқ, яляяпман...
1960.

МАЙИЗ

— Отинг нима, қизалоқ?
— Менми, тоға, Лоламан.
— Ол майиздан бир ҳовуч,
— Йўқ, одобли боламан.
Ҳовучингиз каттароқ,
Сиз берсангиз оламан...
1964.

БЎЛМАСАМ-ЧИ...

Чиқдик қуён овига,
Ўнгор тонгнинг зовига.
Қоринни тўқлагунча,
Милтиқни ўқлагунча —
Куён қочди жарликка,
Ахир бу ўжарлик-да.
Бўлмасам-чи, ишон-да,
Урар эдик нишонга...
1964.

ҚАРИБ ҚОЛИБДИ

Дўнг тепага Розиқ ота
Макка экувди.
Эгатини тор қаторлаб,
Якка экувди.

Пешана тер натижаси
Дарҳол сезилиб,
Ёш ниҳоллар маржондайин
Чиқди тизилиб.

Йигилгунча арпазорнинг
Сомон, похоли,

Макка қариб, кўкси узра
Тушмиш соқоли...
1975.

СИЧҚОННИНГ ОРЗУСИ

— Ўсиб-унсам,
Кучга тўлсам,
Мен-чи, мушук бўламан.

Каламушнинг —
Фаламуснинг
Қириб, додин бераман.

Дея сўйлаб,
Аста ўйнаб,
Сичқон чиқди эшикка.

Ўша онда,
Пешайвонда
Кўзи тушди мушукка.

Шошганича,
Қочганича,
Кириб кетди тешикка...
1972.

ПАШША

Ўрин билан Мирабbos
Сумалак ялашарди.
Бир пашша ғашга тегиб
Ширани талашарди.

Хира пашша қувганга
На унади, на қўнди.

Бирдан у Ўринбойнинг
Бурнига келиб кўнди...

Мирабbos кўзин қисиб:
— Шошма, — деди Ўринга.
Қаранг, ҳаш-паш дегунча,
Бир муштлади бурунга...

Пашша-ку тутқич бермай,
Учиб кетди зингиллаб.
Ўриннинг бурни қонаб,
Йиглар эди мингирилаб...
1970.

ҲАЛИ ЁШ-ДА...

— Доскага чиқ, Мукамбар,
Бўрни ол-чи, хўш қани.
Битта мисол ишлаймиз,
Учга учни кўш, қани?

Лекин оддий мисолни
Ечолмади Мукамбар.
Содиқ ака сўраб қолди:
— Айт-чи, қанча уканг бор?

— Олтида.
— Улар бирдан конфет еса,
Бўлар нечта?
— Бешта.

Ҳеч-да!
Шошилмасдан ўйла бошда.
— Битта укам конфет емас,
Ҳали ёш-да...

МАҚТАНЧОҚ ЧУМОЛИ

Үқариқдан
Чим олиниб,
Ини күчди
Чумолини.
Уймалашиб
Хайрон бокди.
Беш-ўнтаси
Сувда оқди.
Бир чумоли,
Шу пайт қаранг
Чиқиб олди
Тошга аранг.
Қўл-оёғи
Қалтирайди.
Кўзи тиниб,
Жавдираиди.
Тол чивиги
Бўлди нарвон.
Ўтиб олгач,
У беармон,
Бошқаларга
Мақтанди хўп:
— Орамизда
Қўрқоқлар кўп.
Ўрнак олса,
Бўлар мандан.
Сузиб ўтдим,
Океандан...
1974.

ОВДА

Овга чиқдик този билан,
Боққан эдик ёзи билан.

Оқ либосда дала-адир,
Таёқ ушлаб борар Қодир.

— Ол, кетди деб қолди бирдан,
Итим чопиб ўтди қирдан.

Менга сапчиб хурар този,
“Ўлжа” билан тураг този.

Бориб кўрсак яқинига,
Эски пўстак тақимида...
1965.

ҚИРГОВУЛ

— Паррандалар ичидা
Тез учари қирғовул.
Нима учун, Шокиржон,
Мехр қўйган қирга ул?!

— Қирғовулнинг парвози,
Боқмаганни боқтирас.
У қирлардай поёнсиз,
Кенг оламни ёқтирас...
1961.

КЎКЛАМ ҚУВОНЧИ

Симда қатор,
Қалдирғочлар.
Важир-вужир

Сұхбат бошлар...
— Бу йил баҳор,
Создир қүшлар.
Тезроқ келинг
Тенги-түшлар.
Дўстим, Лайлак,
Билсин ҳамма.
Деб йўллашар
Телеграмма.
— Ким орқали?
— Сим орқали...
1962.

ЎЙЛАБ-НЕТМАЙ

Қора қурум карнайга
Уя қурди чуфурчиқ.
Кўринганга мақтанар:
— Уйимни кўр, югар, чиқ.

Доим шошиб иш тутар,
Ўйлаб-нетмай кетини.
Айтинг, энди ким ювар,
Қурум босган бетини?..
1975.

ЧАҚИМЧИНИНГ ЖАЗОСИ

Синчалак билан Читтак
Яшарди иноқ, аҳил.
Ташвишга қўйди қиттак —
Уларни чумчуқ баҳил.
Ҳасади ҳаддан ошиб
У ён-бу ён чопарди
Ва ўртада гап ташиб,
Шундан лаззат топарди...

Бирога чуқур ўйган
Чумчук макри билинди.
Мансуржон дўнгги қўйган
Пат тузоқча илинди...
1977.

КЕТМАСАЙДИ ГАП ТАРАБ...

Сўз етмайди
Таърифга,
Шариф тоға
Орифга
Совға қилди
Зўр қовоқ.
Беданали —
Тўрқовоқ.
Фамлаб тарик,
Пишлоқдан,
Хурсанд қайтдик
Қишлоқдан.
Осдик беҳи
Шохига.
Мамнун Талъат,
Шоҳида.
Кўниб қолди
Шаҳарга.
Сайрап ҳар кун
Саҳарда.
— Бу қовоқча,
Бедана.
Ҳеч ярашмас,
Бегона.
Дея акам —
Элтурди.
Темир қафас,
Келтириди.

Янги уйга
Кўчирдик.
Аммо қушча
Чўчириди.
Худди ўша
Нафасда,
Қаранг темир
Қафасда,
Қаддин ростлаб,
Туролмай,
Сирғанарди
Юролмай.
Ўжарлигин
Билдириди.
Сўнг ойнани
Синдириди.
Бизни хафа,
Хит қилиб.
Демай қўйди,
Битбилдиқ.
Отам эса,
Койиди:
— Унга сирдош,
Жой эди.
Ўғлим, бу жўр,
Майнамас.
У қафасда
Сайрамас.
Кейин билсак,
Тўрқовоқ,
Экан жуда
Зўр қовоқ.
Кетмасайди
Гап тараб,
Гап тараб...
Бедана дер:

Так-тарак,
Так-тарак...
1975.

ЖҮННАМАН ҚҮЁШНИ 1982

КҮНГЛИМ ЎСАР ТОҒДАЙИН

Хар гал борсам яйловга
Күнглим ўсар тоғдайин.
Меҳмон келса, чўпонлар
Эриб кетар ёғдайин.

Отни тезлаб жилгадан
Тушиб келар қария.
Кўш саночда қимизни
Пишиб келар қария.

— Тошўчоққа ўт қалаб,
Дастурхон сол, ҳой, Турар.
Зайнаб хола бўғриқиб
Қатламага мой сурар.

Ҳайдаб борар тўрт отлик
Икки уюр йилқини.
Тешиктошда иш тифиз,
Авжида жун қирқими.

Рисмат бобо ўтовда
Қамчи ўриб ўтирас.
Икки кампир ширдоқ¹қа
Гулдан нусха қўчирас.

Мен яйловга чанқоқман,
Чўлда қолган ташнадай.

Чунки, сокин, бегубор,
Турна кўзли чашмадай.

¹ Ширдоқ — гиламнинг бир тури.
1983.

БОЙЧЕЧАК

— Ҳой, чечак,
Бойчечак!
Яшнаб кетди қир таги.
Куёшмисан қирдаги?
— Биз офтобнинг парчаси!
Очиб ернинг дарчасин,
Шу тупроққа бойландик,
Бойчечакка айландик.
— Ҳой, чечак,
Бойчечак!
Қара оёқ остини,
Ёки уйқу босдими?
— Кутиб сени, баҳорни?
Ва бегубор наҳорни
Сарғайиб кетди рангим.
— Сўзларимга ишонгин,
Баҳордан элчи-чечак,
Раҳмат сенга, бойчечак.
1981.

ОЛМОС ҚАЛАМ

Қолди бирдан фулдираб
Кўқда момогулдирак.
Она товуқ жўжасин
Бошлиб қочди чулдираб.

Ёмғир ерни ийдиар,
Яшил чакмон кийдиар.
Эски тандир остида
Қора қучук дилдиар.

Яшин — осмон оҳими,
Чақмоқ гоҳи-гоҳими?
Чизар олмос қаламда
Нурдан кийик шохини.

ТҮРТ ФАСЛ

Баҳор қутлар оламни,
Мушак отар замбарак.
Баргак таққан сочига,
Бошида гулчамбарак.

Шамол қувар булутнинг
Увада-ю, лахтагин
Меҳнаткаш ер файратдан
Ечиб ташлар яктагин.

Буркаб олди об-ҳаво
Бирдан қовоқ-қошини.
Жануб сари турналар
Жўнаб қолди шошилиб.

Ҳадемайин қор тушиб,
Кирза этик фарчиллар.
Тиним бермас чанага
Энди Шокир, Барчинлар.

ҚИЗҒАЛДОҚЛАР ҚУТЛАШАР

Тонг оқарыб юлдузлар
Аста ўчиб боради.
Яйлов олис, чўпонлар
Тоққа кўчиб боради.

Тоғам ҳайдар қўйларни
Қамчисига қўл тираб.
Ёш қўзичоқ хуржунда,
Маъраб қўяр мўлтираб.

Иргишлайди шўх қулун,
Пешанаси қўнғир-оқ.
Бўталоқ-чи, лўкиллар,
Бўйнида жез қўнғироқ.

Қизғалдоқлар қутлашиб,
Чалар гўё мискарнай.
Бобом мудрар тақимиға
Тўн барини қистирмай.

Яйлов бағрин яшнатди
Оқ ўтовли овуллар.
Тунлар салқин бу ерда
Куврай — ўтин ловуллар.
1962.

ЁДГОРЛИК

Онам бошоқ тергани
Боришимни эшишиб,
Тўқиб берди жун қопчиқ,
Урчуқда ип пишишиб.
— Бўз қўйлакдан тез ўтар
Қилтириқнинг санчгани.

Ўғлим, сарак тера қол,
Жуда ўнгай янчгани.
Ўша халта кечгача
Елкамдан тушмас асти.
Ёшу-қари далада,
Озиқ-овқат етмасди.
Каламушнинг инларин
Бузар гоҳо Каримжон.
Баъзан буғдой чиқарди
Шиббаланган, ярим жом.
Уруш тугаб, чекинди
Қаҳатчилик-йўқчилик.
Жангдан қайтди оз киши,
Етим қолди кўпчилик.
Бардош бердик бир нави
Оғир, ёмон кунларга.
Етиб келдик ниҳоят,
Доруломон кунларга.
Бир кун ойим эркалаб:
— Етар, — деб кулиб қўйди.
Қопчиқни туздон қилиб
Айвонга илиб қўйди.
Онам-ку, ўтиб кетди,
Илож йўқ, умр калта.
Аммо ризқ-рўз улашар
Ҳамон ўша жун халта.
1963.

ТУРНАЛАР

Уч бурчакли хат мисол
Парвоз этар турналар.
— Арғимчоғин не учун
Узмай кетар турналар?

— “Арғамчига қил қувват” —
Элдан қолған нақлдир.
Ука, билсанг, турналар
Ана шундай аҳилдир.
1981.

ДУР СОЧИЛДИ ТОГЛАРГА

Булут қоплаб бирданига
Тинди шамол фирмари.
Майсаларга тақди сирға
Илк баҳорнинг ёмфири.
Авжга чиқди ёмғир чунон,
Булут гүё сим элак.
Тўлиб-тошди Гулнораҳон
Тарновга қўйган челак.
Ҳалқобланди оёқости,
Дур сочилди тогларга.
Қуёш кейин дазмол босди
Дала, адир, боғларга...
1967.

ЖАЛА ЁДИ, ЧАЛА ЁДИ

Куннинг ранги-кути ўчиб,
Бўзбу тоғдан булут кўчиб,
Тўргай учиб, каклик чўчиб,
Дўл аралаш жала ёдди.

Тентаксойга туман инди,
Бир соатга етмай тинди,
Зар камалак тоқقا минди,
Минг афсуски, чала ёдди.
1969.

ЧИЛЛА ЧИҚИБ

Қиши аёзи тобида,
Қор эринмай бўралар.
Шоҳ-шабба орасидан
Овчи сергак мўралар.

Эман барги товуснинг
Қуйруғидай серҳашам,
Кийик юрган сўқмоқлар —
Қирда йўл-йўл беқасам.

Айиқ форга йўл олди,
Пиймасини ивитган.
Қуён пўстин тикибди
Ўзига оқ тивитдан.

Яшил тароқ арчалар
Кенг ёзиб қулочини,
Эринмасдан шамолнинг
Тарап пахмоқ сочини.

Чилла чиқиб, бурнидан
Чак-чак эрир “қор одам”.
Кўк сомса илинжида
Февраль ўтди орадан.
1983.

ЖАЗО

Тонг отмасдан қий-қиёлаб
Қолди бирдан бабақ Хўроз.
Faфлат босиб гарам узра
Ухлаб ётар итим Барбос.
Бир кечада беш товуқни
Олғир тулки қипти фойиб.

Бўш катақда ёлғиз хўроз
Туар эди мунгайиб.
Отам дейди: — Қопқон бўлса
Бир қўрсатиб қўяр эдик.
Бўпти, ўғлим, бу маккорга
Биз ҳозирча “қойил” дедик.
Қовун-тарвуз авжи пишган
Кунгабоқар чойлаб¹ ётар.
Малиш қўйлар кавш қайтариб,
Гўё сақич чайнаб ётар.
Чирилдоқлар гал беришмас,
Кумғон қайнаб тошиқади.
Султон думбул пиширгани
Тезак қалаб ошиқади.
Тошфонарнинг ҳожати йўқ,
Ой шуъласи мўл-кўл ёғар.
Ҳаким ушлар бузоқчани,
Ойим эса сигир соғар.
Кўплар билмас полиз ичра
Юлдуз санаб ётиш гаштин.
Отам бизга сўйлаб берар
Алиф Лайло саргузаштин.
Ухлаб қопмиз ярим тунда
Недир тўқ-тўқ этиб борар.
Чайла ёқдан чиқиб аста
Қўрқа-писа кетиб борар.
Олиб заранг таёгини
Отам кутиб турди анча
Тулки экан, қувачани —
Бошга кийиб қўтарганча
Тўқ-тўқ этиб борар эди.
Нафс кўйида қувачадан
Сут ичгани тушган экан.
Ундан бошин чиқаролмай,
Сутдан кўзи шишган экан.
Отам унинг терисига

Сомон тиқиб кергани йўқ.
Уй тўрига осиб қўйдик,
Ўн товуққа бергани йўқ...

¹ Чойлаб — етилиб.

ЛОФ ЭМАС

Ҳаво иссиқ дам эди,
Меҳнат кучи кам эди,
Чумолини тақалаб,
Аста анҳор ёқалаб
Қамиш ўрдим шир этиб,
Чигирткалар чир этиб,
Тегавергач фашимга,
Имлаб қўйдим Ҳошимга,
Тўрттасини от қилиб,
Қофоздан қанот қилиб.
Аравага қўшилди
Сўрагайсиз, хўш энди?
Барака кириб ишга.
Оқ саройни тўлдирдик,
Кўк саройни тўлдирдик,
— Ҳой, эшикни оч, Бақа.
Ошпаз эди тошбақа.
То овқати пишгунча
Ухлаб қопмиз тошдақа...
1969.

ДАЗМОЛ

— Буви, нега пешанангиз
Ажин босиб, тиришган?
Сабабини айтинг ёки
Хафамисиз бир ишдан?
Бунга Зеби холанинг

Қистаб кетди кулгиси.
— Эркатойим, бу ажин
Қариганлик белгиси.
— Ҳалиги-чи, — деб Акмал
Сүзин баён этади. —
Дазмол босиб олсангиз,
Текис бўлиб кетади.
1963.

ҚАЙНАЯПТИ

Мушукчага ёқиб қолиб
Ўтнинг тафти,
Хуррак тортар ёки ухлаб
Қолди апти.
Акром айтар: — Мушутимиз
Қайнаяпти...
1966.

БЕРКИНМАЧОҚ

Пар ёстиқقا
Буркаб бошин
Беркинмачоқ
Ўйнар Ҳошим.

— Уйда йўқман,
Қараб кўр-чи?
Ўша заҳот
Топар Йўлчи.

Яхши ўйин
Беркинмачоқ,
Аммо чойнак
Бўлди пачоқ...
1969.

ИНСОФИ ЙҮҚ

Бир гала чумчук қўнди
Чорпоянинг раҳтига.
Қолган экан бурда нон
Паррандалар “бахтига”.

Хўрз пахса девордан
Гердайганча ўтарди.
Инсофи йўқ чумчуқлар
Бирдан жанжал қўтарди.

Хўрз нонни шарт олиб:
— Сиз иноқ бўлинг, — дерди.
Жўжаларга улашиб,
Бурдани бўлиб берди.
1978.

СЎНА

Кўғирмоч қовургудай
Саратоннинг қозони.
Ҳатто кўзга илашмас
Дайди гирдоб тўзони.
Қалдирғочлар анҳорга
Тўш уради керилиб.
Кўй ва моллар сояда
Кавш қайтарар эриниб.
Шу маҳал ола буқа
Шаталоқ отиб қолди.
Кўйлар хушёр тортишиб,
Серкалар қотиб қолди.
Яйловнинг чанги тўзиб,
Тўпалон бўлиб кетди.
Буқанинг фазабидан
Кўп чивин ўлиб кетди.

Думини хода қилиб
Чопа кетди, бўкирди.
Ё унга бирор бехос
Игна санчди, ток урди.
Тўғри келган одамни
Аямай сузигб ўтди.
Четан деворни шартта
Шохи-ла бузигб ўтди.
Така сўрар Кўчқордан:
— Буқа мунча тархаш-а?!

— Бир сўна қўнганига
Шунча ташвиш, хархаша...

ЖИРАФАНИНГ КЎЙЛАГИ

Зебранинг уст-бошига
Кўплар ҳайрон қолишди.
Шундай йўл-йўл матодан
Йўлбарсга ҳам олишди.
Буни кўргач Жирафа
Ичи куйди, тошиқди.
Кенгуру чевар эди,
Шуникига ошиқди.
— Хуш келибсиз, оғайни,
Хизмат бўлса айтингиз.
Соз кийиниб, қоматни
Кўз-кўз қилар пайтингиз.
Тираф қўйиб шотини
Жирафанинг бўйнига,
Үлчаб бўлиб қайчини
Солар экан қўйнига,
Бор матони кўрсатиб
Жирафага тутади:
— Сал қимматроқ, лекин сизга
Ўн беш метр етади.
Сабаби бўйнингизга

Тенг ярмиси кетади.
Бир метрга қолганда
Чидамади Жирафа,
Буюртма битди, аммо,
Кенгурудан у хафа.
Түғри уни күрганда
Хавас билан боқасиз.
Лекин, унинг кўйлаги
Тикилган-да ёқасиз...
1983.

БАҲС

Кўйни қўшиб подага,
Айри миниб ходага,
Санжар, Ашур,
Баҳслашур:
— Ин солишда қарқуноқ
Чумчук, читтакдан нўнок.
— Нор тогамнинг сўзича
Энг дангаса мусича.
— Йўқ, қарқуноқ.
— Йўқ, мусича.
— Сен билмайсан,
Үйла пича.
— Нега билмай?
Ахир шошма:
— Ўпкангни бос!
— Ҳаддан ошма!
Шу пайт хода қарс синиб,
Узилди баҳс-тортишув.
Аранг чиқди анҳордан
Бир-бирини тортишиб...
1981.

ТУФЛИСИГА ҚУМ КИРАР

Савол берди Маткарим
Синфдоши Захрога:
— Нима учун одамлар
Туя минар сахрода?
— Сахрода туя миниш,
Хар нарсадан зиёда —
Туфлисига қум кирап
Кимки юрса пиёда.
1986.

ҮРГАТЯПМАН

Чийчиyllашиб жўжалар
Бедазорга қочар кириб.
Кучук эса уларни
Тинмай қувлар айлантириб.
Мушук сўраб қолди итдан:
— Аввал бизга мазайди.
Сен келдинг-у, жўжалар
Кундан-кунга озайди.
— Ахир, мен бошқалардай
Дайдиб юрмай кўчаларда,
Тулкига чап беришни
Ўргатяпман жўжаларга...
1983.

ЛАҚМА ЧУМЧУҚЛАР

Айвондаги хонтахтага
Бир тўп чумчуқ қўнди шошиб.
Ўз тилида суҳбатлашар
Чам-чам, чам-чам, чам-чамлашиб.
Хонтахтада шиша банка,
Гурунчи бор ярим-ёрти.

Бир ёнида никель чойнак.
Хеч вақо йўқ ундан ортиқ.
Олис кетмай хонтахтадан
Нари-бери ўтишади.
Ялтираган бўш чойнакни
Нега ҳадеб чўқишади?
Шишадаги гурунч акси
Чойнак узра ўтган экан.
Текин доннинг хушхабари,
Чумчуқларга етган экан.
Зўр беришиб чўқиб, донлаб,
Ўзларича яйрашади.
Никель чойнак атрофида
Тумшуқларин қайрашади...
1983.

БЎКИБ ҚОЛГАН

— Ким биринчи топади:
От нимага ётади?
— Балки чарчаб қолгандир,
Шунга ётиб олгандир.
— Бўкиб қолган, — дер Эгам, —
Ем-хашакдан кўп еган.
Дилфузা сўзлар: — Наҳот?
Сизга айтсан ўша от
Ўтиришни билмайди,
Гулшан момо: — Балли! — деб
Зимдан боқиб жилмайди.

ХАЙРЛАШМАЙ...

Толнинг барги сувга тушиб
Қайиқ бўлди.
Бу айниқса чумолига
Лойиқ бўлди.

Күш қирғоқни түлкін ялаб
Күкка сапчир.
Эшқакни-ку ўзи әшар
Чаққон-абжир.
Тенг-түшлари қолди гап-сүз
Тайинлашмай.
Чумоливой жүнаб кетди
Хайрлашмай...
1984.

ОҚ БУЛУТ

Оппоқ булут, оқ булут,
Тоғ бағрига оғ, булут.
“Оқ олтин”ни тергунча
Әнди камроқ ёғ, булут.
Оппоқ булут, оқ булут,
Әтагингни қоқ, булут.
Үз түпингдан айрилиб,
Қолма танҳо, тоқ, булут,
Пахтадайин оқ булут,
Осмонга арқоқ булут.
Савачүп урса ойим,
Бўласан тарқоқ булут
Оппоқ булут, оқ булут,
Тоғ бағрига оғ, булут.
То тергунча пахтани,
Әнди камроғ ёғ, булут.
1983.

ДҮЛ

Лойхўраклар лой чувар,
Атроф кўм-кўқ ложувард.
Барра пиёз найчалаб
Бамисоли най чалар.

Бинафшалар қисман оқ,
Ойим терар исмалоқ.
Бирдан булут қоплади,
Дўл ёғди, шитоблади.

Чўғ тушгандай патакка —
Товуқ қочар катакка.
Майса чирт-чирт узилди,
Райҳон беҳол сузилди.

Дўл ҳовлиқиб тошман дер,
Муз ва қорга бошман дер.
Унинг бағритошлиги,
Ҳовлиқма, бебошлиги
Бошига етди, қаранг.
Ерга сингиб йўқ бўлди
Куёшдай қочиб аранг.
1985.

ЎРГИМЧАКНИНГ ҲИЙЛАСИ

Дор катакка ипак йўлдан
Фириллаб,
Лангарчўпсиз чопиб юрар
Зириллаб.
Сехргардай оғзидан ип
Чувалар.
Чигириқда ўз-ўзини
Қувалар.
Пастга сакрар минг мақомда,
Ён ташлаб,
Хузур қиласар беланчакда
Ёнбошлаб.
Ўлжасини юбормайди
Қочириб.
Бир пашшанинг унга оғзи

Очилиб,
Деди: — Фойдам тегиб қолар
Сенга ҳам.
Дор ўйнашни ўргатиб қўй
Менга ҳам.
Бу таклифдан Ўргимчак шод,
Яшнади:
— Қани юр, — деб уйи томон
Бошлади.
Текин ўлжа — бир зумдаёқ
Пашшанинг
Қўл-оёғин шипга боғлаб
Ташлади...

БУГДОЙ БОШОФИ

Бугдой пишди, етилди
Қадди-басти ёй каби.
Пайкал узра ҳар бошоқ
Қалқиб турар ой каби.
Кутар гўё зор, интиқ
Ўз миришкор устасин.
Балки деҳқон бошоқдан
Олган ўроқ нусхасин...

“Ш” БИЛАН “Ч”

“Appa”, “Kappa” сўзларини
Бурро айтар укам Ботир.
“Ш” билан “Ч” ҳарфларига
Бир оз тили келмаётир.
— “Пишлоқ едим қишлоқда,
Шермат юрар “Чайка”да.
— Пислоқ едим қислоқда,
Сермат юрар “Сайка”да.
— Чиноранинг чинниси бор,

Чиннисида шинниси бор.
— Синоранинг синниси бор,
Синнисида синниси бор.
Ана шундай жумлаларни
Сал қийналиб айтар Ботир.
Лекин, жуда машқи баланд.
Олманг ундан хавотир...
1984.

ШОШМАЙ ТУР

Қир-адирлар эгнида
Бобомнинг оқ якtagи
Сирғанишга соз бўпти
Дўнгтепанинг таг-таги...

Хуштак чалар изгирин,
Дов-даражатлар булдуруқ.
Деразага қорбобо
Сурат чизган қулдириб.

Бутун бошлиқ ўрмонни
Ойнакка қўйган жойлаб.
Тулки пишлоқ есам деб
Қарғани тураг пойлаб.

Тўқайзорнинг четида
Кўш тегирмон, таниш қир.
Қуён жуфтак ростлади,
Қувиб борар қаришқир.

Лақма бўри, шошмай тур,
Ўз бошингга етасан.
Қуёш чиқса, ҳолингвой,
Зумда эриб кетасан...
1983.

ОҚБУРА ТҮЛҚИНЛАРИ 1985

ХАШАР

Чүққиларга илинди
Оқ булатлар туғ бўлиб.
Ерга сингмай қор суви,
Кўкка ўрлар буғ бўлиб.

Мусичага манзил-макон,
Таниш бўғот, пешхари.
Бобом тортар ўқариқ,
Бар урилган пешлари.

Момомнинг фикри-зикри
Жағжагу, исмалоқда.
Шанба куни тўпланиб,
Синфимиз чиқди боқقا.

Дов-дараҳтни боғбонлар,
Соч-соқолин қийишди,
Биз оқлаган дараҳтлар,
Оппоқ пайпоқ кийишди.

Шодмон бобо шод бўлиб,
Кўлимизни қисадир:
— Ушбу ҳашар боғимизга
Сизлар қўшган ҳиссадир.

АРҚИТДА

Кўкийбелим¹ ортда қолди,
Кўниб ўтдик Арқитга.
Табиат ҳам бу ерни
Буркаб қўймиш бархитга.

Нортуюдай лўкиллаб,
Шошиб оқар Қапчигай.
Бир-бирига гал бермай,
Сайрар майна, чақчигай².

Бурқсир арча буроғи,
Ўрмон яшил, қир яшил.
Суғур ухлар хотиржам,
Юмронқозиқ дон ташир.

Бир бедаво шу маҳал,
Какликларга ўқ отди.
Ваҳший садо тинчликка —
Барҳам берди, йўқотди.

¹ Кўқийбелим — довоннинг номи.

² Майна, чақчигай — тог қушлари.

Шошиб-пишиб ўлжасин
Патин юлар ютақиб,
Тофу тошлар асабий,
Арча ёнар тутақиб...

БАҲОР ТУШИБ КЕЛАР ТОҒДАН

Қорлар эриб,
Туни билан
Ерга ёзиб
Яшил гилам,
Баҳор тушиб келар тоғдан.

Тобланиб
Қиш аёзида,
Синчалакнинг
Баёзида,
Баҳор тушиб келар тоғдан.

Бойчечакдан
Чамбар бошда.
Таъзим қилиб,
Юрт, қүёшга,
Баҳор тушиб келар тоғдан.

Қўлга олиб
Янгроқ торин,
Кўз-кўз қилиб
Иқтидорин,
Баҳор тушиб келар тоғдан.

ҚИШЛОГИМНИ СОФИНИЙ

Бултур ўғлим қишлоқдан
Бир даста бойчечакни —
Олиб келиб экканди,
Ўша мурғак чечакни.

Эртаю кеч парвона,
Қарагани-қараган.
Сўлиб қолди негадир,
Куз ҳам ўтди орадан.

Хайриятки, бойчечак
Енгиб довулни, қорни,
Бу йил қийғос очилди
Кутлаб наврўз-баҳорни.

Ўғлим силаб-сийпалаб,
Бойчечакни ўпади.
Мени-чи кўз ўнгимдан
Она қишлоқ ўтади...

КАМАЛАК

Пайдо бўлди ёй камалак
Кўл бўйида, етти рангда.
Етти қатим ипак мисол
Бўлиштириб санга, манга,
Сакрамачоқ қилиб бирин,
Муҳаррамхон ўйнар тонгда.

УЙИН ТОПМАЙ

Туни билан булут қорни
Элаб чиқди.
Тўқайзорни оқ чойшабга
Белаб чиқди.
Хавфу хатар қор остида
Қолгандайин,
Қаддин букиб таъзим қилар
Арча, қайин.
Қуён полвон қайтар эди
Оқшом ишдан,
Тўқ-тўқ қилиб ўлжа излар
Қизилиштон.
Қуён ўйлар: — Бу ҳам мендек
Сархуш — гаранг.
Уйин топмай, ҳар эшикни
Чертар қаранг...

ДАРОЗ САРТАРОШ

Африкада сартарошман,
Дўконим Саваннада.
Филга ўхшаб чўмилмайман
Чад кўлидек — ваннада.
Ота-бобом Жирафа деб
Исмимни билиб қўйган.

Баландлигим олти метр,
Табиат берган бўйдан.
Мижозларни қашқир каби
Қолдирмайман бир тишлаб.
Заранг баргин эринмасдан
Эҳтиётлаб, қиртишлаб,
Атрофини соябондек
Қайчилайман типпатик,
Туякушга паноҳ бўлар,
Ёмғир қўйса тикка-тик.
Ишга тушсак, овқат пайти
Бўйинбоф ҳам тутилмас.
Соч-соқоли ўсган дараҳт,
Биздан қочиб-қутулмас...

ПИШЛОҚ

Қор тиззадан, қайрағочга
Булдуруқлар инибди.
Чумчуқларнинг бозори ҳам
Эрта кунда тинибди.
Чилла ҳукми сингиб кетган
Ернинг мағзи-мағзига.
Қарға мағрур қўкка боқар,
Парча пишлоқ оғзида.
Бу гал кутиб ўтирмасдан
Эртакдаги Тулкини,
Емоқчийди тумшуғига
Илиб олган мулкини.
Култепада ётган Эшак,
Ханградией-хангради.
Бефаросат хатосини —
Сал кейинроқ англади.
Хушёр тортиб, бир ютиниб
Атрофига қараса,
Ерда сароб тўлқин урап,

Иссиқ қирқ беш даража.
Қордан нишон күринмайды,
Бош оғриғи босилган.
Фақат тили сангиллаб,
Пишлоқдайин осилган...

ИНСОФ ТИЛАБ

Она мушук ўғлига
Алла айтар баралла.
Сичқон унинг сўзига
Кулоқ солар шу палла.
— Сен Арслоннинг зурёди,
Чўнг бобонгдан қолишима,
Арслонга хос иш қилгин,
Сичқон билан олишима.
Ором олгин аллаё,
Ухлай қолгин аллаё.
— Хайрият, — деб Сичқонбой
Иягиға қўлтираб,
Инсоф тилаб Мушукка,
Нон кемириб ўтирас...

ЧИЛ ОВИ¹

Бу йил қишки таътилни
Ўтказдим Бешбодомда.
Чунки тоғам моҳир овчи,
Номи кетган одам-да.

Тоғам мени апил-тапил
Саман отга миндириб,
Саҳар овга жўнадик
Ёғли кўмач қилдириб.

Етиб келгач манзилга,
Отни толга жиловлаб,

Қор устига жели² ёзди,
Күниб қолган чил овлаб.

Бир гала қүш учиб келиб,
Шүнғиди қорга тикка.
Қанотлари олачипор,
Үхшаб кетар какликка.

Бирдан қорга шүнғиди,
Жуда ҳайрон қолдим ман.
Сүнг ўрдакдек сузиб чиқди
Үн метрча олдиндан.

Қувиб бордик мүлжалга,
Саман тураг дам олиб.
Сузиб бориб бештаси
Тўрга тушди қамалиб.

Нега қорга шүнғиркин
Ташвиш илиб бошига?
Овдан қайтдик ўн чилни
Боғлаб эгар қошига.

¹ Чил — какликсимон қүш, қор остига ўрдакдек шүнғийди.

² Жели — каклик овлайдиган тўр-сетка.

ЁРДАМ СЎРАБ

Африкада дув-дув гап,
Уққан ҳайрон қолибди.
Чопиб бориб Туяқуш
Филни миниб олибди.
Туяқушга ўчакиши
Маймуннинг бордек қасди.
Сүнг чирмашди Мангуста,

Тушгиси келмас асти.
Мангустанинг бўйнига
Сўна келиб ёпишди.
Кейин унинг ортидан
Пашша, чивин чопишиди.
Шунча юкни қўтариб,
Фил лапанглаб жўнади.
Искабтопар шошганча
Энг устига қўнади.
Гандираклаб фил шўрлик,
Кўтаролмай бўкирди.
Кўзи тушиб сичқонга,
Ёрдам сўраб ўкирди...

КЎЗИН ОЧСА

Бир қоп сабзи ортиб олиб
Бўрига,
Дўқ урганча ҳайвонларнинг
Зўрига,
Қуёнполвон борар милтиқ
Ўқталиб.
Бўри шўрлик қолса баъзан
Тўхталиб,
Сапчиб кетар бошга тушган
Тўқмоқдан.
Келар экан бир товон йўл
Сўқмоқдан.
Бу аҳволни лайлак кўриб
Боғ аро
Чалди бирдан ўрмон бўйлаб
Ногора.
Қуён чўчиб очса филай
Кўзини,
Дуб остида кўриб қолди
Ўзини.

БОБО ҚАНЧА ЁШДАСИЗ?

(Топышмоқ)

— Бобо кенжә набирангиз
Нечә ёшга чиқди ҳозир?
— Кенжам Назир,
Мен қанчага чиққан бўлсам,
Шунча ойлик бўлди, бўтам.
— Сиз қанчага чиқдингиз? —
Қайтиб-қайтиб сўрар Жавлон.
— Етмиш саккиз ёшга чиқдик,
Набирамиз икковлон.
— Вуй, қизиқ-а, хўш қандай?
— Менинг ёшим уникига қўшганда...
Ким топади Рўзмат бобо
Қанча ёшга тўлганлигин?
Набираси Назир эса,
Нечә ойлик бўлганлигин?..

ЛОЙИХАДА ЙЎҚ УЙЛАР

Юмронқозиқ ёқа ушлар,
Ҳайрон Кирпи, Каламушлар.
Ҳа, Кўрсичқон сўзлар эди,
У олисни кўзлар эди.
— Бу Тошбақа қурган сарой,
Шиллиққуртга шоҳона жой.
Бош планга нолойиқдир,
Мана кўрсин халойиқ, — дер.
Уй қуришнинг ташвишидан
Олис бўлган,
Холис бўлган,
Тошбақа
Тош саройин қўйиб бошга
Йўртиб кетди сафар тортиб.

Шиллиққұрт ҳам жүнаб қолди,
Карнай нусха уйин ортиб...

УЧ ПАХЛАВОН

Уч пахлавон,
Уч қаҳрамон
Жанг-жадалга
Солиб нүхта,
Үш тоғида —
Барокүх¹да
Айланишиб,
Тилсим — тошга
Ухлаб ётар
Харсангларни
Қўйиб бошга
Болакайлар,
Сал нарида,
Тоғ остида
Кулиб, ўйнанг.
Баҳодирлар,
Ҳордиқ олсин,
Оромини
Бузиб қўйманг.

¹ Барокүх — Сулаймон тоғи

КИМ АЙТАДИ?

Жам бўлишиб ҳайвонлар,
Қил ўтмай орасидан.
Ҳасратлашиб қолишиди
Гап очиб боласидан.
Тулки сўзлар: — Фарзандим,
Содда, сўтак, тўпори.
Олмахон дер: — Меники,

Кўпollarнинг-қўполи.
От айтади: — Кулуним,
Хеч эпи йўқ чуноқдир.
Эшак мақтар: — Хўтигим,
Эсли, қамишқулоқдир.
Бўри хурсанд: — Бизники,
Хеч тенги йўқ, мулойим.
Диёнатли, инсофли,
Кўз тегмасин илойим.
Йўлбарс мамнун: — Ўғилчам,
Оқибатли, меҳрибон.
— Кенжам озиб кетди, — деб
Ташвишланар Каркидон.
Фил юпатиб дўстларин,
Кўтаради кўнглини.
Хўш, ким айтар, уларнинг —
Шу гаплари тўғрими?

ФОЗ КАРНАЙЧИ БЎЛМАСИН

Бола борки чўпчакка
Сериштиёқ, серталаб.
Бобом эртак айтади
Ҳасанбойни эркалаб;
— Қарға қақимчи экан,
Чумчук чақимчи экан.
Фоз карнайчи экан,
Ўрдак сурнайчи экан.
— Фоз карнайчи бўлмасин,
Ўрдак сурнай чалмасин.
Карнайчи Шокир тоғам
Хафа бўлиб қолмасин...

БОШИНГ КҮККА ЕТСА ҲАМ

— Қушлар қандай кийинар?
— Бири созу, бири зўр?
Қора камзул, оқ кўйлакда
Олақарға дирижёр.
Сариқ китель тиктирибди
Ёзга мослаб Заргалдоқ.
Тўтиқушнинг қулоғида
Тақа нухса зар балдоқ.
Поча-пўстин тўғри келмай,
Қораялоқ хит-хуноб.
Малла костюм зап ярашиб,
Там-там босар Қарқуноқ.
Қизилиштон боши узра,
Энлик алвон тож билан.
Чумчук юрар етаклашиб
Сергап читтак гож билан.
Калҳат сўзлар: — Пўпишакхон,
Бугун жуда пўримсиз.
Қалдирғоч дер: — Дўстлар, наҳот,
Қадр-қиммат кийимда.
Бошинг қўкка етса ҳамки,
Булбул бўлиш қийин-да...

АЯМАДИ МЎЙЛАБИН

Чалган эди чигиртка
Созни авждан юқори,
Тун ярмида узилди
Фижжагининг бир тори.
Хайриятки, баҳтига
Устахона — дўкон бор.
Лекин ишлар кундузи
Шоҳдор қўнғиз дўкондор.
Тонгни кутиб ўтиrmай,

Устани кетди излаб.
Топиб шохдор қўнғизни
Илтимос қилди сизлаб.
Чирилдоқлар нағмаси,
Чиқар авжга — заптига.
— Қолмайин, — дер кўриқдан,
Кафтин ишқаб кафтига.
— Дўкон ёпиқ, эртага
Келгин деб айтолмади.
Чигиртканинг сазасин
Уста ҳам қайтармади.
Иzzат-икром кўрсатди
Шохдор қўнғиз эъзозлаб.
Юлиб битта мўйлабин
Фижжагин берди созлаб...

ТОПҚИР БЎЛСАНГ...

(Қирғиз халқ топишмоғи)

Байталнинг боласини тойчоқ дерлар,
Туянинг қўрап кўзи бўталоқдир.
Эчкининг эркатоий улоқ бўлур,
Қўй эса қўзи билан қўнгли чоқдир.
Борди-ю сигир туғса дерлар бузоқ,
Айиқнинг арзандаси мамалоқдир.
Кийик, йўлбарс кенжасин недир оти?
Хўш нимадир маймун, бўри боласи?
Нима бўлар кирпитикан зурёди?
Доно бўлсанг, топ ва тўлдир чаласин...

ЎТ КЕТДИ

— Ўт кетди! — деб қолди кимдир,
Тўс-тўполон бошланди.
Икром толнинг шохин юлар,
Мен челакка ташландим.

— Қани? Қайда? — сўрар шошиб
Анвар шу ҷоқ Очилдан.
Чопиб борар болакайлар.
— Тезроқ югур, бос, илдам.
— Ана, қаранг! Қир бағрини.
Үчирамиз биз қандоқ?
— Эсинг борми, бу оловмас,
Очилибди қизғалдоқ...

ВАННАСИНИ ЭСЛАДИ

Саратон офтобида
Мудрар ҳорғин далалар.
Тулпоркүлда чўмилар
Қишлоқдаги болалар.
Равшан шўнғир фаввосдек,
Карим қулоч отади.
Ўшдан келган Садриддин
Ўй-хаёлга ботади.
Ечмай кийим-кечагин,
“Уф” тортади, эснайди.
Кўп қаватли уйдаги
Ваннасини эслайди.
Садриддинга қолсами,
Бу ер маза жой эди.
У сузишни ўргатмаган
Дадасини койиди...

АДОЛАТЛИ ҚОЗИ (Ўйғур халқ әртаги)

Товуқларнинг арз-додини
Қози — Арслон тинглади.
— Топинглар, — деб Тулкини
Саркотибга имлади.
Ясовуллар отланиб,

Кетишди қир томонга.
Қозикалон буйругин
Бажармаслик ёмон-да.
Пайдо бўлди қув Тулки,
Етмиш етти букилиб.
Қўлтиғида парёстиқ,
Таъзим қилар юкуниб:
— Давлатингиз бир умр,
Бўлсин бекам, зиёда,
Кавар¹ териб юрибмиз,
Зоф учмаган қиёда.
— Қўл солибсан, тўғрими,
Хўрозларга, товуқقا?
Олий жазо лозимдир
Сендай турқи совуқقا.
— Тўғри, тақсир булардан
Кўп ташвишга тушдик-а,
Қирон келсин бу зотнинг —
Авлод-аждод — пуштига.
Шодмиз сиздек тақсирнинг
Ярасак хизматига.
Бизлар ўчмиз товуқнинг —
Гўштигамас, патига.
Ушбу совфа, ҳазратим,
Сизга атаб тикилган.
Белга мадор, фанда ҳам
Исботланиб чиқилган.
Парёстиқни қозининг
Ёнбошига сужди.
Арслон эса Хўрозга
Қош-қовоғин уяди.
Тушунтиrap Хўрозбой:
— Тулки ноҳақ мутлақо.
Қози сўзлар хотиржам,
Бўлмагандек ҳеч вақо:
— Ҳал қиласиз бу ишни

Беш-олти кун ораси.
Гуноҳига яраша
Тулки олар жазосин.
Инобатга олинмай,
Она товуқ фарёди,
Тинчиб кетди шу тахлит
Шўр тумшуқлар арз-доди.

¹ Кавар — тулки севиб ейдиган ўсимлик меваси.

Тулки ўпка қўлтиқлаб,
Билган ишин қиласарди.
Жўжаларни пайт пойлаб
Қақшатарди, шиласарди.
Кун ортидан тун ўтиб,
Фалак чархи айланди.
Бу орада Қашқирбой
Қози қилиб сайланди.
Бошга тушган қайғудан,
Кўз-ёшларин яширмай,
Нажот истаб товуқлар
Кириб келди шошилмай.
Баён этди бирма-бир:
— Тингланг, тўрам, арзимиз.
Шум Тулкининг дастидан
Сарғайди-ку, тарзимиз.
Асло чўзиш мумкинмас
Бундай ишни шу кезда.
Қўлтиғида парёстиқ,
Тулкивой келди тезда.
— Давлатингиз бир умр,
Бўлсин бекам, зиёда.
Кавар териб юрибмиз
Зоф учмаган қиёда.
— Олиб икки ўғлингни
Тунов куни шатакка,

Ўғирликка тушибсан
Ярим тунда катакка.
— Ҳа, рост! Фақат Сиз учун
Шу ишга бордим, нетай?
— Мен учун?! Хўш! Хўш! Нега?
— Яхшиси баён этай.
Шу бадкирдор товуқлар
Айтган чоги ошириб.
Ёстиқ тикиш касбимиз,
Ўтирмайман яшириб.
Кони гурбат, майда иш,
Ҳар бир болиш, ҳар ёстиқ.
Камтарин қулингиздан
Сизга ушбу парёстиқ.
Шу гапдан сўнг Тулкини
На сўқди, сўроқлади.
Бечора товуқларни
Айёр яна доғлади.
Бўри уни қўллагач,
Элни ҳангу манг этиб.
Тухумларни ўғирлар
Макиённи гангитиб.
Кун ортидан кун ўтиб,
Фалак чархи айланди.
Вақти келиб бир Тайфон,
Қозиликка сайланди.
— Таваккал, — деб товуқлар
Яна арзга келишди.
Бўлган гапни Тайфонга
Қўймай айтиб беришди.
Дарғазаб бўлиб қози,
Бошқа ишни қолдирди.
Қаранг, ҳаш-паш дегунча
У Тулкини олдирди.
— Давлатингиз бир умр
Бўлсин бекам, зиёда.

Сизга атаб парёстиқ
Тиқдим кезиб қиёда.
— Менга қара, шум шайтон, —
Бақириб берди Қози.
Арқоннинг узуни соз,
Яхшидир гапнинг ози.
Този, Бургут, Лочинни,
Тайғон овга шайлади.
Парёстиқни Хўрозга
Сийлов — тортиқ айлади.
— Бу маккорни ҳозироқ
Қирга қувлаб чиқинглар.
Терисини сидириб,
Тезда сомон тиқинглар.
Тилёғлама, айёрлик,
Жанжалларнинг асоси.
Ит қавмининг шу боис,
Тулкида кўп қасоси.
Тозиларга бир умр,
Шудир менинг фармоним.
Тулкисифат озайса
Ушалгуси армоним.
Охиривой, ўртага —
Ким солса гар адоват.
Енгиб чиқар ниҳоят
Ҳақиқату адолат.

ОРИЯТЛИ ХЎРОЗ

*“Чархим таноб ташлайди,
Бир балони бошлайди”.*
Халқ қўшиғидан.

Хури момо етмишида
Есир қолди чолидан.
Йўқлагувчи ҳеч кимса йўқ

Ёлғиз кампир ҳолидан.
Күниб кеттган ҳаётнинг у
Аччиқ-чучук талхига.
Ҳасратини айтар фақат
Эрта-ю кеч чархига.
Қафасдайин ҳовли-жойи,
Тўртта товуқ, хўроzi.
Мис қумғону, чўян декча
Чолдан қолган мероси.
Момони кўп ўйлантирап
“Дакан” отлиқ дарози.
Унинг чакки юришидан
Товуқлар ҳам норози.
Тўғри, сира эринмайди
Эрта-саҳар туришдан.
Лекин кўрса хўroz зотин,
Уришгани-уришган.
Ўзи нимжон, бироқ қайсар,
Аранг юрар килдираб.
Бехос тушган тепкилардан
Учиб кетар пилдираб.
Калтакни еб, остоnадан
Зўрға ҳатлар чалажон.
— Шундай бўлиб қолди қаранг,
Кечиргайсиз, холажон.
— Вой, шўrim, — деб чипор Товуқ
Қўлтиғидан йўлайди.
Супра ёзиб буламиққа,
Кампир унни элайди.
Хола койир: — Иш қилса-чи,
Ўз ҳолига яраша.
Ё илиги тўқроқ эмас,
Ноғорачўп, тараша.
Қисир эмди аташади,
Бузоқ қолса кам сутдан.
Табиат ҳам ўчакишиб,

Уни бўйдан камситган.
Уч кун ўтиб-ўтмасданоқ,
Туриб кетар оёққа.
— Ҳўл балодан асра ўзинг,
Ҳой, дўзали қаёққа?
— Ташвиш қилманг мендан хола,
Тезда қайтиб келаман.
Тўрт кўчалик Даканбойга,
Бир гап айтиб келаман.
Дарвозани оқшом кимдир,
— Очинг, — деди, — холажон!
Курғур яна атак-чечак,
Кириб келар чалажон.
Чап қанотин таянганча,
Турмоқ бўлар чоғланиб.
Ўн кун ётди ўн кураги
Тахтакачга боғланиб.
Ўхтин-ўхтин алжигандা,
Дори-дармон берилар.
“Мен уларга кўрсатаман” —
Гоҳ алаҳсиб керилар.
Кампиршонинг эски чархи
Яраб ёмон кунига,
Дон ва емиш олиб чиқар
Калавасин пулига.
Кўп ўтмайин жир битади,
Ўзбошимча, саёққа.
Айтиб қўймас товуқларга
Кетганлигин қаёққа?
Пўстагини роса қоқиб,
Уйга ташлаб кетишар.
Қасам ичар, — уришмайман, —
Бўлди хола, етишар.
Ким кўрибди парранданинг
Бундай қийиқ, гожини.
Бир оёғин синдиришиб,

Чүқіб опти тожини.
Бу гал узок ётиб қолди,
Үзи айбдор, на чора?
Хури хола жиғибийрон
Нима қылсын бечора?
Фув-фув ишлаб турған чархи
Бирдан таноб ташлайди.
Кампир сезар, яшшамагур
Бир балони бошлайди.
Хүрөз құлтиқтаёғини
Ташлаб авжи баҳорда,
Сүраб қолди кечирим,
Туриб эрта наҳорда.
— Узр, хола, иш қымадим
Тузингизга яраша.
— Яна қайға жүнаб қолдинг,
Хой нотавон, зумраша.
— Овулда мен уришмаган
Хүрөз зоти қолмади,
Бирортаси на енгилиб,
Бошин ерга солмади.
Рухсат беринг, кетмоқчиман
Олисларга бош олиб.
Макиёнлар ҳайрон, хафа,
Күзларига ёш олиб.
Енгиб чиқсам ўзга юртда,
Фақат шунда қайтарман.
Қолган гап-сўз саргузаштни,
Келгуси гал айтарман.
Шундан бери кўп йил ўтди,
Бошқаларга билинмас.
Хури хола мижжасига
Уйқу савил илинмас.
Ёғсираган чархнинг ўқи,
Аламзада фичирлар.
Тақдирига шукр айтиб

Момо хазин пичирлар:
— Соғ-саломат юрганмикин?
Оғриб-нетмай, чүқилмай.
Ёки ўлиб кетдимикин
Жанозаси ўқилмай?
Қадр-қиммат топиб балки,
Бегона юрт-ўлкада.
Эрта-индин кириб келар,
Сафар халта елкада.
Ҳамон унинг йўлин пойлаб,
Ҳафта, ойни санайди.
“Тириқ” этган садо келса,
Дарвозага қарайди.

ОЛТИН ЁЛЛИ ТУЛПОР ҚИССАСИ

(Арим Акбаралиевга бағишлайман)

Олабуқа қишлоғидан
Ўн чақирим нарида,
Чотқол тизма тоғларининг
Этагида — барида
Булутларга манзил бўлиб
Тулпорқўли жойлашган,
Булбул, майна баҳор ва ёз,
Уни макон айлашган.
Баландлиги ер сатҳидан
Минг қулочга юқори.
Кўрган кўзни қамаштирап
Салобати, виқори.
Қизил, сариқ ва тимқора
Уч хил лола ўсади.
Чор тарафин арчазорлар
Киприк мисол тўсади.
Ушбу эртак момолардан
Мерос бўлиб қолгандир.
Тулпорқўлнинг афсонаси

Эс-хушимни олгандир.
Эмиш бир чол Чотқол ёқдан
Овул томон келаркан,
Айтиб билган қүшиини
Байталида еларкан,
Тулпоркүлга дуч келибди
Айни пешин чофида.
Уловига дам берибди
Ям-яшил қирғофида.
Майса узра чакмонини
Аста ёзиб ташлабди.
Кун ботарга юзланиб чол
Намоз ўқий бошлабди.
Шу пайт кўлнинг ўртасидан
Олтин ёлли от чиқиб,
Кўзни очиб-юмгунчайин,
Соҳил томон бот чиқиб,
Кўкка сапчиб пишқирди-да,
Кўзи ёниб, шайланиб,
Бўз байталнинг атрофидан
Ўтди уч бор айланиб.
Кишиногига тофу тошлар
Садо берди узмасдан.
Чўпон эса беғам, беғарқ
Ибодатин бузмасдан —
Туриб боқса дулдул айфир
Шўнғиди кўл қатига.
Калимасин айтиб бобо
Қамчи босди отига.
Кунлар бир-бир ўтаверди,
Ўн икки бор ой туғди.
Баҳор чоғи тўриқ байтал
Олтин ёлли той туғди.
Бу ҳодиса тез орада
Овул бўйлаб тарқалди.
Кўшиб-чатди қўрганлар ҳам

Газак олди, фарқ олди.
Чол ҳангу манг, кампир эса
Уни қистаб қўймади.
Яна битта қулун олиш
Чорасини ўйлади.
Тўғри келди кампиршонинг
Тонгда очган фоли ҳам,
Тараддудга тушиб қолди
Унинг қайсар чоли ҳам.
Мол-дунёга ҳирсин қўйган,
Режасидан қайтарми,
Эгар уриб йўлга созлар,
Силаб-сийпаб байтални.
Тулпоркўлга жўнаб қолди,
Ўзга йўлга қайрилмай.
Олтин ёлли тойчоқ чопар
Онасидан айрилмай.
Авжи пешин, атроф сокин
Кўлда ошуфта ҳолат.
Ёзди шошиб чакмонини
Олиб-олмай таҳорат.
Чол шунчаки, номи учун
Намоз ўқиб ўтирас.
Олтин ёлли от ташвиши
Юрагини ўпирас.
Тофу тошлар янграб кетди
Шу маҳал шовқин-сасдан.
Айғир тўғри ўтиб бориб,
Байтални айланмасдан,
Тўнғирчоқлаб ўхтин-ўхтин
Депсиниб кишнаганча,
Олтин ёлли қулунни у
Елкадан тишлаганча
Кўл остига кириб кетди
Икки дулдул бир бўлиб.
Чол овулга қайтди ночор

Хафсаласи пир бўлиб.
Бу бир чўпчак, чўнг момомдан
Бизларга мерос қолган.
Тулпоркўлнинг афсонаси,
Балки рост, балки ёлғон...

АРСЛОНБОБ АФСОНАСИ 1988

ОҚ ФОТИҲА СЎРАДИМ

Қирқ бешинчи йил ёзи,
Уст-бош юпун оқ сурп.
Ёрилган товонимга
Онам пиёздоғ суриб,
Ҳолва бериб бир чақмоқ:
— Дамингни ол, — дер, — қани.
Тонгда жўнаб кетардик,
Қирга — бошоқ тергани.
Гоҳо эслаб шуларни,
Кўзларимдан ёш томар.
Бувим белбоғ тикарди,
Хизматида тошфонар.
Безгак хуруж қилганда,
Кўкка чиқиб нолишим,
Тол баригига кўмишса,
Беда бўлган болишим.
Аён эди беш қўлдай,
Қапчигайнинг даласи.
Бир ўнгарда тўрқовоқ,
Унда жўрнинг¹ боласи.
Бошоқ теришдан ўзга
Эрмагимиз йўқ эрди.
“Кунтуғмиш”ни Давронбой²
Оқшом ёддан ўқирди.
Тетикланиб қолардик

Унутилиб иш, чарчоқ.
Болалигим — эпкиндай
Сезилмай ўтди ҳар чоқ.
Онам бурчоқ³ қовурса,
Оқшом чоги хўракка.

¹ Жўр — тўрғайнинг бир тури.

² Даврон Шабданов — халқ достонларининг билимдони, бадиҳагўй юртдошим.

³ Бурчоқ — ёввойи нўхат.

Сигмас эди ҳаддимиз,
Бир ҳовучдан бўлакка.
Рўзгор деган ташвишдан,
Бўлмагун-чун ошиниб.
Қўёлмадик отамга,
Ҳатто қабр тошини.
Қатнаб қўшни қишлоқقا,
Ўнинчини битирдим.
Кўл калтайди, наинки,
Бирор ўқишига кирдим.
Кейин ишга жойлашдим,
Олис эди қишлоқдан.
Холам сафар халтамга
Солгач толқон, пишлоқдан.
Дафтар тўла машқимни
Эҳтиётлаб ўрадим.
Сўнг ийманиб онамдан
Оқ фотиҳа сўрадим.
Пешанамдан ўпди-ю,
Бир зум боқиб афтиимга
Дуо қилиб, йўл харжин
Аста босди кафтиимга.

* * *

Поезд учар шимолга
Йўрға отдек пилдираб.
Ўтиб кетди орадан
Ўттиз йил ҳам гилдираб.

...Тилардингиз, онажон,
Улкан бардош ва тўзим.
Сизнинг ёрқин руҳингиз
Менинг йўлчи юлдузим!

АСФАЛЬТДАГИ РАСМЛАР

Ким танимас кўчамизда,
Дилшод, Сора, Қосимларни.
Асфальт йўлда уймалашиб
Чизар турли расмларни.
Вақтингчалик унутишган,
Китоб, қалам, дафтарларни.
Акс эттирас шар ушлаган,
Болаларни, капитарларни.
Оқшом чўкиб, тун оҳиста
Қора чойшаб ёпганида,
Кўкнинг момогулдираги
Бўз тулпорин чопганида,
“Сувга оқиб кетмасайди
Йўлда қолган расмлар”, деб
Дилшод тунда ухлай олмай,
Ташвишланиб чиқди ҳадеб.
Эҳ, хайрият, ёмғир бу гал,
Суратларни ўчирмабди.
Машиналар капитарларни
Чўчитмабди, учирмабди.
Тонг ёришиб, офтоб тоқقا
Алвон рангдан дурра боғлар.
“Тинчлик”, “Она” деган ёзув,

Ўтганларнинг дилин чоғлар.
Шар ушлаган қизалоқлар,
Кечагидан ёрқин, аниқ.
Қуёш акси байроқларга —
Ўтган каби ёлқинланиб.

БАЙРАМ КУНИ

Немис фашистларининг Майданек ўлим лагерида кўрганларимни айтишга тилим бормайди... Гитлерчи жаллодлар маҳбусларни бир сафга тизиб, уларни бирваракайига жодидан ўтказиб, экинзорлардаги карамларни инсон қони билан сугорар экан. Шунинг учун полиздаги карамлар қип-қизил эди...

**Зоя НАЗАРОВА,
ҳарбий журналист.**

ХОТИРА

Биз хотира байрамини,
Ҳар баҳорда нишонлаймиз.
Энди уруш бўлишига
Йўл бермаймиз, ишонмаймиз.

Манфур фашист маҳбусларни
Қиймалаган жоди билан.
Биз яшармиз боболарнинг
Покиза рух, ёди билан.

Сувмас, қонлар эвазига
Наҳот, карам сугорилса?!

Одамларнинг терисидан,
Кўлқоп билан сумка қилса?

Байрам куни момом олиб,
Бобом тишлиб кетган нонни.
Аста ўпид, күзга суртиб,
Алқар бизни, тинч замонни.

Нон, туз ҳаққи, бу байрамни
Чин юракдан нишонлаймиз.
Энди йўл йўқ уруш-жангга,
Уни буткул кишанлаймиз.

ОҚБУРА ТҮЛҚИНЛАРИ

Нортуюдек пишқириб
Авж саратон кунлари,
Кирап осмон рангиға
Оқбура түлқинлари!
Оқбура түлқинлари!

Алла айтар шаҳримга
Мижжа қоқмай тунлари.
Саркашу саргаштадир
Оқбура түлқинлари!
Оқбура түлқинлари!

Тонгдан бергай хушхабар
Майна, булбул унлари.
Қимиздай пишиб келар
Оқбура түлқинлари!
Оқбура түлқинлари!

Барокўҳга ой миниб,
Акс этар ёлқинлари.
Ўшга белбоғ — зар камар
Оқбура түлқинлари!
Оқбура түлқинлари!

Бағриға сингиб кетар
Күча-күй шовқынлари,
Билмас кеку адоват
Оқбура тұлқынлари!
Оқбура тұлқынлари!

Ювгай дилдан губорни
Шифобахш қултумлари.
Бекиёс шүх-шан нахр
Оқбура тұлқынлари!
Оқбура тұлқынлари!

Эмиш Алиф Лайлонинг
Оқ туясын хунлари...
Бетакрор, мангу қўшиқ
Оқбура тұлқынлари!
Оқбура тұлқынлари!
1985.

САРИЧЕЛАК

Саричелак номи кеттан
Қўриқхона — улкан кўл.
Беш минг метр тепада,
Тоғ устида қулган кўл.

Асқар тоғдан сув тушар
Қояларда янчилиб.
Дейсан, наҳот қарағай
Кўқда қолган санчилиб.

Келар чанқоқ босгани
Кийик, қулон оҳиста,
Архар шохи илиниб
Тўкилар хандон писта.

Қорли чўққи эслатар
Қирғиз оғам тумоғин.
Тоғ асалнинг ҳидидан
Битиб қолар димоғинг.

Йўлга тушдим, елкамда
Сафар халта — белагим.
Учрашгунча омон бўл,
Хайр, Саричелагим!
1982.

“ЭРТАКЛАР ДУНЁСИ”

“Эртакларнинг дунёси”
Бордир десам шу тобда,
Асқар бунга ишонмай,
— Бор, — дер фақат китобда.
Билсанг, Ялта шаҳридан
Ўн чақирим узоқда,
Кенг ўрмонзор қўйнида,
Сен уни кўриб — боқ-да.
“Эртакларнинг дунёси” —
Атай ташкил этилган.
Дарвозадан ўтиш билан
Ажойибот бошланар...
Гоҳо кулиб, лол қолиб,
Кўзларингиз ёшланар.
Пушкин ёзган эртаклар,
Кўрк бағишлар боғ аро.
Балиқчи чол ва кампир,
Ёнда тешик тогора.
“Алдарқўса” отида
Овул кезар айланиб,
Ана машхур “Уртўқмоқ”
Тураг жангга шайланиб
Тулки хафа, ёрдам сўрар,

Қорлар ёғиб қовоғидан.
Турна эса чўнг сүякни
Тортар унинг томоғидан.
Жуда мослаб йўнилгандир,
Ҳайвонларнинг шакли, изи.
Аслида-чи, улар бари
Арча, толнинг жўн илдизи.
“Зиёд ботир” йўлда борар,
Аждарҳода қасоси бор.
Кўргазмага сабаб бўлган,
Эртакларнинг асоси бор.
1970

ЁРДАМЧИЛАР

Буғдој қопти,
Миталаб,
Териб бўлмас
Битталаб.
Ҳолиқ бобо
Бир-бирдан,
Ўтказса ҳам
Фалвирдан,
Қурт аrimас
Негадир,
Донга наҳот
Эгадир?
Ҳолиқ бобо
Ҳайратда
Уни ерга
Яйратди.
Биласизми
Шу маҳал,
Чумолилар
Галма-гал.
Бу текинхўр,

Митадан,
Қолдирмади
Битта ҳам.
Бобом бундан
Шодланди.
Тегирмонга
Отланди.

ОМОН БҮЛСИН

(*Татар шоирлари Боту Турай,
Рустам Мингалим ва
Гарай Раҳимларга*)

Овлоқ ўрмон, зумрад кўлдан
Балиқ овлар бизга Рустам.
Сухбатимиз шеър ҳақида,
Тўрттовимиз тўрт улусдан.

Шоир аҳлин билса бўлур
Дилда ёнган эзгу ҳисдан.
Ҳасан Тўфон юбилейига
Бордик оқшом дабдурустдан.

Ҳасан абзий сўзлар мамнун:
“Мир Алишер зукко устам”.
Муса Жалил, Тўқай назми
Бир умрга чиқмас эсдан.

Дўстлар меҳрин мен инкишоф
Этдим бу гал шул хусусдан.
Омон бўлсин, Оқ Эдил-у
Гарай Раҳим, Боту, Рустам.
1981

ОЛҚИШ

Хамирдайин қўпчишиб ерни
Қуёшни март бир оз кўтарди.
Ўз сафини бузмай турналар
“Кир-ров” дея куйлаб ўтарди.

Бобом нарвон тиркаб дарахтга
Шох-шаббани кесар, қайчилар.
Навбаҳорнинг саломин айтиб
Кезар синчалаклар — жарчилар.

Увададай тўзиб бормоқда
Тоғлар оша ҳоргин булутлар.
Болакайлар варрак учириб
Гулбаҳорни олқишилар, кутлар.
1981

НЕГА ОФРИМАС БОШИНГ?

— Қизилиштон, темирчига
Ўхшаб кетар бардошинг.
Эртаю кеч тўқ-тўқ қилиб
Оғриб қолмасми бошинг?
— Уқиб олгин гапимни,
Олғир ҳакка қардошим.
Касби-корим уй қуриш,
Демак, ҳалол нон-ошим.
Пешона тер тўқканнинг
Оғримас сира боши.

ИШОНМАСАНГ...

Бир маъноли гап айтишда
Ким тенглашар Тўланга:
— Эгизакдир ҳар доим,

Соя билан қўланка.
Биласизми, аслида,
Олис жойни дер узоқ.
Баланд ерни тепалик,
Қопқонни — темир тузоқ.
Қуёш — офтоб, кўча — йўл,
Қулоқчин — телпак, тумоқ.
Эркалатиб қуённи —
Дейдилар шалпангқулоқ.
Энсиз — қисқа, энли — кенг.
Жарлик-чи — ўнгир камар.
Тоф ораси — қапчифай.
Оймомо — шамсиқамар.
Бир мазмунни англатар,
Ченов — ўлчов — тарози.
Қолган сўзларни ёзиб
Муаллимни қил рози.

БЕШ ПАНЖА

Ўнг қўлимда беш панжа,
Чап қўлимда беш панжа.
Ҳар бирининг исми бор
Иноқ, аҳил, эш панжа.
Ўнг қўлдаги:
Бошмалдоқ,
Барамалдоқ,
Ўрта бармоқ,
Хўжа мерак,
Кенжа бувак.
Чалғи тутиб бирлашиб,
Буғдой ўраг сирлашиб.
Чап қўлдаги панжаларим,
Бошоқларни дасталайди.
Бошмалдоқ,
Барамалдоқ,

Үрта терак,
Хўжа мерак,
Кенжা, бувак.
Ер ва дехқон шаънига
Тўрғай қўшиқ басталайди.

ТАЛЬАТНИНГ ТУЛПОРИ

Тўрт туёғи кумушдан —
Тақаланган тулпордек.
Кеч қолгандай юмушдан
Чопқиллайди шунқордек.
Ўн иккита довонни
Бир кечада ошади.
Шошади,
Манзил йироқ,
Ҳормас бироқ.
Куни-тунга улашдан,
Курашгани-курашган.
Мана, тонг ҳам отаётир
Йўли бўлар нурафшон.
Бир зум тиним билмайди,
Талъатжоннинг тулпори.
Вақтни ўлчаш борасида
Шунқорларнинг шунқори.

ТЎРТ АМАЛ

Ўқиш борар ўрмонда,
Қатнашмаган армонда.
Чинор ости паккадир.
Муаллими Ҳаккадир.
Арифметик тўрт амал
Ўргатилар галма-гал.

1. ОЛУВ

Ёнгоқقا ўч Олмахон
Хадеб бошин қашыйди.
Учдан түккіз олинмагач,
Уйга нима ташийди?
Күрсатмайди Қарқуноқ
Шпаргалка қорасин.
Уч ортига ноль қўйиб
Топди охир чорасин.

2. ҚЎШУВ

Доскадаги ёзувларни
Думида артиб,
Ўрганмоқда қўшувни
Мушук батартиб.
Бу амалда саноқ сон
Боради ортиб.
Тўғри топса ўнта сичқон
Ўзига тортиқ.

3. КЎПАЙТИРИШ

Куён бўлса ҳисобдан
Энг олдинги мэррада.
Вазифани ишлар зумда
Оддий усул — каррада.
Тулки атай Қуёндан
Сўради шу пайт қўққис:
— Уч жойда учта сабзи?
— Бўлади роса тўккиз.
— Олти карра олти-чи?
Дўстим қанча бўлади?
— Ўттиз олти карамга
Олақопим тўлади.

4. БҮЛУВ

Қизилиштон наздида,
Бўлиш оғир кўринар.
Бироқ саккиз иккига,
Оппа-осон бўлинар.
Тумшуғида ҳисоблаб,
Тер тўкар анча-мунча.
Нольдан нольни айирса
Қолади тешиккулча.
Беш иккига... мумкин эмас,
Сизга аён тушунча.
Бу-чи уйга вазифа,
Дарс тугади бугунча.

КЎЙЛАК ТИКАР

Навбаҳордан —
Элчи “Хут-ют”.
Кетмон сопга —
Заранг ва тут.

Сўнгти музлар —
Қиши қирмочи.
Попукка зор,
Толнинг сочи.

Алғов-далғов,
Кўқда булут.
Фуррак куйлар.
Куррвон қур-рут.

Дехқон ҳордик,
Бериб қишига,
Енг шимариб,
Тушди ишга.

Ноз уйкудан
Туриб наҳор,
Кўйлак тикар
Чевар баҳор.

ТУШ БЎЛИБ ҚОЛСИН МАЙЛИ...

Қирда юрган эмишман...
Қора тариқ сидириб.
Тополмадим негадир,
Бу гал бурчоқ қидириб.
Думбул бўлган буғдойдан,
Кимдир айтар: “Оловур”.
Қувиб қолди шу маҳал
Аббос деган қоровул.
Жон ҳалпида уйғондим,
Ҳа, қоровул туфайли.
Хайрият, тушим экан,
Туш бўлиб қолсин, майли...
1962

ЗОФОРА

Қийғос пишиб жўхорилар,
Авжида ўроқ чунон,
Хамир қориб тонг чофи,
Онам ёпар ўроқчи¹ нон.

¹ Ўроқчилар учун атай ёпилган тўқоч.

Бўғриқиб бўртиб кетган
Саратон офтобида.
Тандир оғзин беркитгач,
Қозоннинг қопқоғида,

— Сингиброқ пишсин, — дерди.
Мен парвона мўлтираб.

Онам чўпчак айтади,
Иягиға қўл тираб.

Худди эртакдагидай
Чалпак ёқсан кун эди.
Қаҳатчилик тугашига
Зобора якун эди...

“СЎНГГИ” ЖАНГ

Қирқ бешинчи йилнинг қиши,
Совуқ чиқсан учига.
Сандалимиз кўниб қолган
Ўрик ўтин кучига.

Бозиллаган оловга,
Бағримизни товлаймиз.
Чўғ пасайса, косовдамас,
Товон билан ковлаймиз.

Уйга кирдик кўчадаги
Яхмалакни унутиб.
Ивиб кетган этиқ, шимни
Олиш керак қуритиб.

Энг каттамиз Абдухалил,
Ундан бир оз чўчиридик.
“Уруш-уруш” ўйинин
Тор хужрага кўчиридик.

Лабда қамиш найчаси,
Ёлғиз отар — тўпимиз.
Тугаб жийда данаги,
“Асир тушдик” кўпимиз.

Бирдан сандал ичида
Портлаб қолди “Замбарак”.

Кўлим тегиб тушиб кетди,
Осма чироқ — чамбарак!

Сандал ичра турган қумғон,
Пов-пов этди наърадор.
“Сўнгти жангда” оёқ куйиб,
Карим бўлди ярадор...

“СОХТА” БУЗОҚЧА

Чаккагарлик... фалтак ипдан¹
Сув силқийди чакиллаб.
Жомга айтар ҳасратини,
“Чак-чак” дея макиллаб.

Қозонимиз жазлика зор,
Кели интиқ бўғиз²га.
Бир кун шомда тарғил туғиб,
Ёлчиб қолдик ўғизга.

Чаккагарлик тингунча
Боғлаб қўйдик даҳлизга.
Кепак ундан атала,
Эрмак топилди бизга.

Шодлигимиз эҳ, аттанг,
Чўзилмади узоққа.
Бир ой ўтмай ўлиб қолди,
Недир дариб бузоққа.

Онам койир “Контузия”,
Бўлиб қайтган отамни.
Тоғам сал-пал енгиллатди
Чипқон бўлган мотамни.

Бузоқчанинг терисига,
Сомон тиқди, қамади.

Чокларини билинтиrmай
Эҳтиётлаб ямади.

¹ Чакка ўтган жойларда ип тортилиб, унинг учлари бир нуқтага бирлаштирилади.

² Бўғиз — ошлиқ.

Тол қозиқдан туёфи,
“Бузоқ” деса бўлади.
Тарғилимиз буни сезиб
Аламзада мўради.

Ёлғон шаклу шамойилга,
Боққани йўқ қайрилиб.
Тушди роса қимматга,
Бу тасодиф — айрилик.

Тарғил мўрар, ерда сомон,
Туарар ҳамон чайналмай.
Сутдан қолди молимиз,
Икки ҳафта айланмай.

Ўттиз кило тариқقا
Уни сотиб юбордик.
Ҳамал оий кириб келди,
Ёмғир ювган губордек.

ШАФТОЛИ

Кун нуридан тафт олиб,
Ҳил-ҳил пишди шафтоли.
Холвой кўриб тўсатдан,
Тош иргитиб ўшатдан,
Солди қўйин-қўнжига
Бир донаси лунжида.
Бўймас эди шошмасдан,

Лекин девор ошмасдан,
Күйлагин ташлаб қочди.
Қорнини қашлаб қочди.
Қишиштириди зафт олиб
Уни тукли шафтоли...

УЧ БҮТАЛОҚ ВА СИРЛИ ҚОВОҚ 1991

ОҚҚУШЛАР

(*Үйғур шоири Учқунга*)

Қанотларин қиличдек
Тиглаб борар оққушлар.
Изтиробин ичга ютиб,
Йиглаб борар оққушлар.

Турна каби аргимчоқ
Солиб борар оққушлар.
Пинҳон сақлаб дардини
Нолиб борар оққушлар.

Азал шундай, оёгин
Йигмай борар оққушлар.
Үз юртига негадир
Сифмай борар оққушлар.

Балки бу табиатнинг
Қатъий хукми — фармони.
Бу Туманбой¹ оқыннингмас,
Бу Учқуннинг армони.

¹ Туманбой — қозоқ шоири Туманбой Мұлдағалиев.

ҚҮШ ҚАЛДИРФОЧ

(Холматжон Юсупов ҳикояси)

Элчи баҳор келди яна.
Қир-адирга дурлар сочиб.
Дутор нусха иinin йўқлаб
Қайтди тоғнинг қалдирғочи.

Бироқ унинг уясини
Ҳеч тортиниб ўтирмасдан —
Эгаллашиб опти, қаранг,
Икки чумчуқ атай, қасдан.

Қўш қалдирғоч чуғурлашиб
Бири инни турди пойлаб,
Иккинчиси дўст-ёрларин
Бошлаб келди парвоз айлаб.

Энди аҳвол танглигини
Икки чумчуқ қўриб туар.
Ҳашарчилар тўрт томондан
Ин оғзини қўриб туар.

Қалдирғочлар ишни бошлаб
Лойни чилаб, қўшиб сомон —
Эшик оғзин беркитдилар
Оқибати бўлди ёмон...

ЛОЛА

Қуёшни қўриб лола,
Бу менинг шуълам, деди.
Кўрганнинг кўзи ёнар,
Янграп ашулам, деди.
Оқшом офтоб ёнбошлаб,

Уфқа ётиб қолди.
— йўқолдим, — дея лола
Ташвишга ботиб қолди.
Куёшнинг бир четини
Лахтак булут ямлади.
Лола кўқда шуъласин
Бўлмаслигин англади.

МУҲАРРАМНИНГ МАШГУЛОТИ

“Дарс ўтиш” Муҳаррамга
Кунлик машғулотку-я,
Қўғирчогин бирма-бир
Деворга йўлаб-суяб.

Улашиб дафтарларни
Дейди: “Бугун ёзма иш!”
Барча “ўқувчи” учун
Бир ўзи чекар ташвиш.

Ўқир дона-доналаб:
“Ҳар до-им бўл-син о-нам,
Ҳар до-им бўл-син қу-ёш!
Ҳар до-им бўй-лай мен ҳам!”

Ўқитувчи опага
Ўхшайди тақлид, қайди.
Йигиштириб дафтарни
Бир четдан баҳолайди.

Қулоқ солмас ва кирмас
Таниш-билиш сўзига.
Кўплар олди “икки”, “уч”,
“Беш”ни қўйди ўзига.

УЧРАШУВДА

Шеър ўқиши тугади, одатдагидек,
Хилма-хил саволга тутар болалар.
Ҳозир-чи, ёлғоннинг бозори касод
Гапнинг дангалини кутар болалар.

Ўйга толдиради тирранчаларнинг
Турмуш ҳақидағи турфа талқини.
— Машинангиз нечта? Уйларингиз-чи?..
— Бадавлат яшар, — дер шоир халқини.

— Хизматга яраша маошим тайин.
Демакки, меҳнатта ҳамиша шаймиз.
Кроссворд катагидек бетон уйларнинг
Биқиқ хонасида бир нав яшаймиз.

Учта фарзандим бор, икки машинам,
Аслида шулардир суяңган тогим.
Битта машинада ҳафталик кирни
Қотириб ювади турмуш ўртоғим.

Иккинчи машина менинг измимда
Кўникиб кетганман унга тоза ман.
Юрагимни анор каби эзғиляб,
Сизга атаб қувноқ шеърлар ёзаман.

1970

ЎН ИККИ ВАРАҚ ДАФТАР

Навбат ҳуснихатларга,
Ёзув “Л-о-л-а, о-ш” бўлди.
Поезд изи дафтарга
Ҳарфлар бошма-бош бўлди.

Перо бехос қитирлаб
Қофоз чилпиб, қатланди.
Хижжалайман пицирлаб,
Сал қийшайди, чапланди.

“Ло-ла” ошни олмасдан
“А” қулогин қайирди.
“О” ҳарфи тушгач қасдан
Дархол йиртдим, айирдим.

Носир най партадошим
Бармоқ босди, кир қилди.
— Афсус, — дер Абдуҳошим,
Яна уч бет йиртилди.

Үн икки варақ дафтар
Холис хизмат этмади.
“Ло-ла, ошга бу сафар
Ёзиш учун етмади.

ЖҮНАТАМАН ҚҮЁШНИ

(“Кишилоқдан мактублар” туркумидан)

Салом, дада! Соғинарми —
Сизни мендек ҳеч киши.
Сузиб олди укамни
Умри холам эчкиси.
Ойижоним соққан сут
Дошқозонда кўпирар.
Зеби аммам айвонда
Кўрпа қавиб ўтирас.
Нон ёпгани етарли
Бостирамада ўтинлар.
Армиядан Аҳад акам
Келиб қолди бутунлай.

Осдик беҳи, нокларни,
Бу куз учун хоску-я,
Тоғам айтди, шу кунда
Совуқ эмиш Москва.
Учгим келар Сиз томон
Қамиш қулоқ отимда.
Жүннатаман қүёшни
Мен келгуси хатимда...

МОСКВАДАН САЛОМ ХАТ

Раҳмат, ўғлим, қизларим,
Тинчми бувинг, аянглар?
Қадрига ет момонгни,
Дов-дараҳтга қаранглар.
Бизёқ совуқ; ҳужра тор,
Ишлайпман қисиниб.
Хатингдаги қүёшнинг
Суратига исиниб.
Тўплаб қўйдим ранг-баранг
Маркалардан анчасин.
Ёзлик бошмоқ ва кўйлак,
“Жўхори қаламчаси”н.
Оқил бўл, барча гапни
Эслатиш шартмас хатда.
Бўтам, қўни-қўшнига
Салом айтгин албатта.

САЛОМ, САФЕД БУЛОНДАН!

Баҳорги таътилни ҳам
Овулда ўтказгани
Абдуғани амаким
Келтириб қўйди мани.

Кунлар илиб тобора,
Қишининг шаштин қочирган.

Арчамозор ям-яшил,
Бойчечаклар очилган.

Ердан ҳовур буриқсир,
Қор сувига түйинган.
Бу ердаги “боллар”нинг
Хуши йўға ўйинга.

Ланка тепмас, учирмас,
Илонча-ю, варрагин.
Ўлмасвой дер: — Оғайни,
Юр, далани қарагин.

Ўғил-қизлар саф тортиб,
Лой-тупроққа қоришиб,
Бармоқ суқиб эгатнинг
Нам жойини ёришиб,

Тамаки кўчатларин
Битталаб ўтқазаркан.
Баҳорги таътилларин
Шу тахлит ўтқазаркан.

Сизга айтсан, қишлоқда
Кунлар узун, тун калта.
Мансурбекнинг ачаси
Курут берди бир халта.

Олиб қўйдим ярмини
Авайлаб, эҳтиётлаб.
Момом Сизни кун ора
Дуо қиласи ёдлаб.

СОРАНИНГ МАКТУБИ

Салом, тоға! Тинчликми?
Жиянингиз — Сораман.
Зубайда холамлардан
Ўзим хабар оламан.

Кечак янгам, Муроджон,
Жўнаб кетди қишлоққа.
Эртаги қўқон гилос —
Бирин-сирин пишмоқда.

Жала ёғиб, дўл тушиб,
Фўза ерга қапишди.
Яна икки ҳафтага
Мактабларни ёпишди.

Юмшаяпти қатқалоқ,
Сихмолалар тегиниб.
Қилаяпмиз ягана
Ерга минг бор эгилиб.

Шишиб кетар қовоқлар
Ягананинг дастидан.
Узум хомток қилинди,
Ташвишланманг асти ҳам.

ОВУЛДАН САЛОМНОМА

Бу гал олиб кетдилар,
Адаҳамжон амаким.
Ўттиз сотих пайкалга
Эккан эмиш тамаки.
Эрта тонгда япрогин,
Сайлаб-сайлаб узаркан.
Сўнг уни кабобдайин

Сихга бир-бир тизаркан.
Қуритилган шодаларга,
Мунтазирдир димхона.
Балиқдайин осилар,
Ҳар бир япроқ, ҳар дона.
Сардор мерғаннинг ўғли,
Дароз ошнам Зокиржон.
Дориланган сув ичиб
Касал бўпти — зотилжам.
Тамакининг ўтиналари
Тандирбоп эмиш ахир.
Шувоқ¹, почадарангни²
Унутишган тап-тақир.
Дадажоним, меҳрибоним,
Софинганман тоза ман.
Навбатдаги хатимни
Ўшга боргач, ёзаман.

^{1,2} Тандирбоп ўтиналарнинг турлари.

АРАВОНДАН САЛОМ ХАТ

Ассалому алайкум,
Жонимдан ортиқ дадам.
Сизга хат йўллаётган
Қизингизман — Муқаддам.
Бугун икки ой бўлди,
Биласизми, дада, биз
Аравон қишлоғида,
Ҳашарда — пахтадамиз.
Нураб кетган шийпонни
Ётоқ учун беришган.
Саҳар чиқиб кетамиз
Фақат “подбор” теришга.
Хирмондаги “вараха”
Хўл кўсакни чайнайди.

Дошқозонда кун ора
Карам шўрва қайнайди.
Кеча келди ёрдамга
Учта синф — еттилар.
Ойим байрам олдидан
Мени кўриб кетдилар.
Қоп тўсилган хонада,
Қолаяпмиз шамоллаб.
Ётар касалхонада
Санобархон, Камоллар.
Ҳаво совуқ, изирин,
Қор учқунлар бу оздек.
Чаноқ ялаб, қўлимиз
Шалдирайди қофоздек.
Пайпоқ билан “Гилцирин”
Берди Садбар холамлар.
Солиев домламидан
Сизга қизгин саломлар.
Ноябрь ўтар балки,
То жавоб беришгунча.
Дадажоним, соғ бўлинг,
Хўп хайр! Кўришгунча.

ШИРИН-ШАКАР ҚИЗЛАРИМГА

Салом, она қизларим,
Муқаддамхон, Муҳаррам.
Ишларим яхши анча
Хотирингиз бўлсин жам.
Қишлоқдаги амакинг
Келди ўтган ҳафтада.
Биламан, йилда шундай
Ҳашардасиз — пахтада.
Оз терганни аямай,
Газетада уришар.
Сиз тенги қизлар бунда

Ит ўйнатиб юришар.
Январ ойи таътилмиш
Деган яхши хабар бор.
Қизим, Зулфи бувингдан
Бўлиб тургин хабардор.
Жавратманглар ойингни,
Умрига берсин тўзим.
Қани бўлса имконим,
Учиб борардим ўзим...
1970.

ФУФАЙКА

Минг тўққиз юз қирқ еттининг
Тўққизинч майида,
Мактабимиз ҳовлисида —
Кўш чинорнинг пойида,

Горн чорлар бизларни,
Турна қатор сафларга.
Барабанлар чек қўяр
Шивир-шивир гапларга.

Сўз олар илмий мудир
Тартиб қатъий сақланар.
Узун стол устига
Фуфайкалар тахланар.

Ажабланманг, бу уст-бош
Аталган деб кимларга? —
Отаси жангда ўлган
Бечора етимларга.

Алфавитга биноан
Ўқилар рўйхатлар:
Абдуллаев, Аброров...
Кўзимдан олов чатнар.

Хуруж қиласар безгагим,
Силлам қуирір — зирқираб.
Қүрғошиндай зил ёшдан
Киприк ночор — пирпирап.

Зич сафларнинг орасин,
Аста суриб, очаман.
Менга навбат етгунча
Үйга қараб қочаман.

Онам шўрлик ҳангуманг,
Олазарак алантлар.
Қулғимнинг остида
Таниш номлар жаранглар.

ҚУЙМА КАЛИШ

(Дўстим Маҳмуджон Норхўжасевга)

Фронт орти. Қаҳатчилик
Менинг учун ёддан таниш.
Оға-ини ўртасида
Фақат битта қўйма калиш.

Ҳар кун саҳар акам уни
Дарсга шиппа кийиб кетар.
Тушдан кейин ўша матоҳ
Хизматимда — бурчин ўтар.

Шанба куни бирданига
Касал бўлиб қолди акам.
Қор тиқилиб калишимга
Мактабимдан қолдим мен ҳам.

Синфдошим Абдураҳим
Оқшом йўқлаб келиб қолди.

— Ҳа, тинчликми?
Қор кўп ёғиб,
Қуйма калиш дамин олди.

Калишимнинг патагини
Онажоним янгилаб дер:
— Бўтам, қиши ҳам тугаб қолди,
Бу биз учун янги гапдир.

Омонов домла эса,
Бизни роса хурсанд этиб —
Овулнимиз ҳисобидан,
Совға қилди бир жуфт этик.

Кирза этик асқотди хўп
Олашовут қиши чоғида.
Қуйма калиш яраб турди
Енгил-елпи иш чоғида...

СУШИЛКА¹

(Абдулмажон Шайитовни хотирлаб)

Гавжум клуб, чойхона,
Бунда бобом, акамлар —
Кўсак чувиб тонггача
Фронтга пахта жамлар.

Абдулла раис ночор,
Сушилкага ўтин йўқ.
Райком келиб кун ора
— Топасан! — деб урар дўқ.

Қалови бор, чўғи оз,
Бурган билан бўзтикан —
Яна қишлоқ боғига
Raис ночор қўз тикар.

Сушилқада иш қайнар
Пахталар сопирилиб.
Үтхона атрофига
Келамиз ёпирилиб.

Гүлахи Салим гуппи
Енгіда симни артиб,
Хазанак картошкани
Сихга тизар батартиб.

Чўғда турган илгакни
Гардиш қилиб керади.
Пишганларин бизларга
“Туя қилиб” беради.

Бир оёғи ногирон
Рўзи полвон қоп ямар.
Собиқ жангчи наздидা
Бу майда иш, бесамар.

Кеч куз. Кўсак чувиймиз
Бўлмас ўтин ғамламай:
Унсун момо бофини
Сушилка ер ямламай.

¹ Сушилка — пахта қуритиш хонаси.

ОНАМНИНГ СЎНГТИ ИЛТИМОСЛАРИ

— Сўзларимни қулофингга
Илиб олгин ахир сан.
Шаҳар олис, эшитмайсан,
Ўнфор тоғдан чақирсан.

Эҳтиёт бўл, шаъннингга
Гарду губор индирма.

Кўрар кўзим, укангни
Ёлғизлигин билдирма.

Берсин сенга боболарнинг
Бардошини, сабрини.
Қилиб тургин зиёрат,
Ўслим, отанг қабрини.

Тегирмоннинг тошидек
Йил айланар ўртадан.
Мендан кейин қишлоққа
Келмайсан, деб қўрқаман...

УЧ БЎТАЛОҚ ВА СИРЛИ ҚОВОҚ

(Тескари эртак)

Эртакларнинг қиёси йўқ,
Ўрнин босар қай таъриф?..
Қалбингга нур бағишлиайди
Айтган саринг қайтариб.

Ёлғон-яшиқ сўзни тизиб,
Чўпчак қилгандан кўра.
Қайраочни тўйинтирмай,
Гупчак¹ қилгандан кўра,

Қадим қирғиз ҳангомасин,
Қўшиб-чатмай айтаман.
Фақатгина шеърий йўлга,
Солдим уни қайтадан.

Жўлон бобо деганнинг
Уч фарзанди бор эди.

Менгди момо ўғлонлардан

¹ Гупчак — қуритилган қайраоч фўласи. Сувда тўйинтирилмаса, аравага гупчак бўлмайди.

Хушнуд бахтиёр эди.

Яхши ният билан бобо
Мол бозорин айланди.
Ховлидаги қўкан¹ узра,
Уч бўталоқ бойланди.

Турмуш тарзи текис эмас,
Баъзан ёмғир, қор бўлди.
Гоҳ чўмич мой, айрим пайтда,
Бир мирига зор бўлди.
Уч эгизак ўсиб-униб,
Бўталоқлар нор бўлди.

Тўнфич ўғил Собир бўлса
Чўпонликни танлайди.
Қодир косиб — тагчармга
Сув пуркайди — намлайди.

Нодир савдогарликни
Маъқул кўрди, на чора?
Момо ўйлар, кенжасига
Омад кулсайди зора?

Гап-сўзлари қовушмай
Чолу кампир тортишар.
Уч тевага ошланмаган
Тери, жунлар ортишар.

Етов учун шай турар
Тофасининг оти ҳам.
Оқ йўл тилаб Нодирбекка
Бобо берди фотиҳа.

¹ Кўкан — ҳайвонлар боғланадиган қил арқонли маҳсус ўрин.

Кенжә ўғлон ирим қилиб,
Бир оз тупроқ, туз олди.
Ёш савдогар шу аснода
Қишлоғидан узалди.

Иш юритди аслига зид,
Ха, тамоман тескари.
Бундайини ҳеч бир инсон
Күрган эмас эс таниб.

Не орзуда юк ортилган
Үша учта түяни
Алмаштириди уч байталга,
Ортиқ күриб бияни.

Чақмоқ чатнаб туёғидан
Саман борар етовда.
Уларни-чи уч новвосга,
Гаров қилди ўтовда.

Бир кун тунаб Косонсойда,
Шаҳандга кириб борди.
Уч байтални учта қўйга,
Бор-барака деворди.

— Тангри ўзи қўлласин, — деб,
Чойхонада берди ош.
Уч совлиқни — уч эчкига,
Алмаштириди бошма-бош.

Қирғизқўргон қишлоғида
Авжида тўй-маърака.
Уч эчкини — уч товуқقا,
Қилишди бор-барака.

Қовоқфуруш чолни кўргач,
Нодир авраб бир зумда,
Алмаштириб уч қовоққа,
Солди уни хуржунга.

Савдогарлик юмушини,
Ўз наздида “қотириб”,
Йўлни бурди овул томон,
Отни чангга ботириб.

Кенжа ўғлон ишларидан,
Менгди момо ўкинар.
Жаҳли чиқиб акаларин,
Ўз ҳолича сўкинар.

Зуғум қилас Жўлон бобо
Сангиллаган қош-қовоқ:
— Мол ортилган уч туяга,
Наҳот учта ошқовоқ?!

Қачон сенга эс киради,
Қолдинг ахир улғайиб.
— Қовоқ сомса ҳазми таом, —
Сўзлар Нодир мунфайиб.

Бор бисоти — бир оз унни,
Онаси сутга қорди.
Сўнг қовоқнинг биттасини
Пичоқда шартта ёрди.
Шу пайт қаранг:
Кўш палладан дув тўкилиб,
Фиж-фиж тилло жаранглар,
Чол-кампирнинг эси чиқиб,
Супра узра аланглар...

* * *

Қиссадан ҳисса шулким,
Нажиб эртак сўнгида
Нияting холис бўлса,
Ишинг келар ўнгидан.

БУРГУТНИНГ ЎЛИМИ

(*Овчи Мусахон бобо ҳикояси*)

Овулдошим Мусо бобо
Зўр бургутчи, мерган эди.
Менга ушбу ҳикояни
Ўзи сўзлаб берган эди:
— Асли, бу иш содир бўлган,
Юксак Ўнфор тогида,
Январ ойи, қор тиззадан
Айни чилла чофида.
Сира қуруқ қайтмаганман,
Бўзбу билан Ўнфордан.
Овчи халқи ризқин топар,
Ўнта формас, жўн фордан.
Чап кифтимда сор бургутим,
Қалқиб-қалқиб боради.
Лоф емасдир, сиртлонни ҳам
Бир ҳамлада олади.
Ўн ой уни обдон тоблаб,
Зерикмадим, дангал гап.
Куённи-ку чап оёқда
Эзиб қўяр чангллаб.
Ҳатто тоғлар соғинармиш,
Мерганларни, овчини.
Из қидириб топиб борар,
Содиқ итим — Лочиним.
Қўқийбелим довонидан
Изни чапга солдириб,

Таниш манзил Бешбодомда
Хуржун, отни қолдириб,
Ёлғизоёқ сүқмоқ билан
Ошиб ўтдим Осқадан.¹
Овнинг шарти: “Эҳтиёт бўл,
Шарпа қилмай бос қадам”.
Атроф оппоқ. Арчазорлар
Холи туман, губордан.
Гўёки қиши тоғ бошидан
Шакар сепиб юборган.
Каклик, чиллар тўдалашиб
Пастга учиб ўтарди.
Бургутимни силаб-сийпаб,
Тумоға²син кўтардим.
Шу пайт бирдан сайҳонликда
Тулки кўзга кўринди.
Қарчигайим қанот қоқди,
Қани, тезроқ ол энди.
Сермаб улкан қанотини
Сузар осмон тоқида.
Тулки эса борар бегам
Қатламтош пештоқида.
Итим бўлса бу ҳолатни,
Пайқамади, сезмади.
Бургут ўзин овга чоғлаб,

¹ Осқа — қоя.

² Тумоға — бургутнинг бошига кийдирилган
чарм ниқоб.

Пайт пойлади, тезлади.
Қизиқ, тулки ниманидир
Маҳкам ушлаб кўнқайиб,
Сор бургутдан узмай кўзин,
Ўтиради чўнқайиб.
Бу нимаси, ўзимни ҳеч

Тиёлмадим кулгидан.
Хар қандайин айёрликни
Кутиш мумкин тулкидан.
Тарлон бургут уч айланиб,
Шүнгіб қолди зарб билан.
Човут солди ўлжасига,
Шиддат билан, ҳарб билан.
Тулки ёнлаб, ҳатлаб ўтди,
Қор түзғиди янчилиб.
Бургут ўзин тұхтатолмай,
Қолди ерга санчилиб...
Бир оёгин бургут узра
Сал күтариб муттаҳам
Пешоб қилди, шу қилиғи
Малол келди жуда ҳам.
Хийла-найранг ғолиб чикди,
Бундоғи кам бўлгандир.
“Бопладимми” деган каби
Борар тулки мугомбир.
Қий-қиёлаб инграр бургут,
Итни қўйиб юбордим.
Жон-жаҳд билан ўпкам тўлиб,
Ортидан етиб бордим.
Пастга томон айёр тулки
Қочса-да қувмас Лочин.
Финшир қушнинг атрофида,
Йўқ дегандай иложим.
Кўрсам, кескир қиличдайин
Кекса арча танаси —
Баландлиги нақ тиззадан,
Яшин урган чамаси
Тулки уни ушлаб туриб,
Чўққайганда наф берган.
Бургут ўқдай отилганда,
Алдаб кетган, чап берган.
Сўнгги марта бир талпиниб,

Қанотин қоқди шунқор.
Чүкүларга армон билан,
Сүк билан боқди шунқор.
Үшанды мен, янглишмасам,
Етмишга чиққан әдим.
Мерганчилик, ов ҳақида
Күп нақл уққан әдим.
Лекин бундай ҳодисани
Биринчи бор кўришим.
Ким ўйлабди бургутимнинг
Бу ҳолатда ўлишин.
Шу воқеа сабаб бўлиб,
Ташладим овни, ўелим.
Аммо сенга ростин айтсам,
Тоғларга пайванд кўнглим.
1970.

СУВАРАКЛАР САРДОРИ

Тўқсон тўққиз ёшга чиқди,
Сувараклар сардори.
Чеваралар олқишлишиб,
Қилар бардор-бардори.
Уни табрик қилмоқ учун
Ургуф-чуруқ келишган.
Хизмат қиласар неваралар,
Зир чопишган — елишган.
Гажак мўйлов, бари чапдаст,
Уст-бош қўнғир-чипори.
Сардорлари ўрин олгач,
Чорпоядан юқори,
Зурёдларин қуршовида,
Кўрганларин айтади.
Маконлари қаерларда
Бўлганлигин айтади.
Сўзлар ҳатто шажарасин,

Аждодларин кимлигин.
Шу маҳалда бир зумраша,
Бузиб давра жимлигин:
— Бобо, бизлар қайси юртдан
Келганмиз? — деб қизиқар.
— Бу саволинг ўринли, — дер
Ўтирганлар жим уқар.
— Эллигинчи йиллар эди,
Самарада турадик.
Ҳоли-қудрат кун кечириб,
Картошка еб юрадик.
Уй бекаси Настя хола,
Ҳамда Саша амаким,
Битта китоб топиб келди,
Берган экан аллаким...
Роса уч кун давом этди,
Китобхонлик касали.
Александр Неверовнинг
Сизга таниш асари.
Яъни “Тошкент — нон шахри” деб,
Даъват учун аталган.
Шунинг учун кўпнинг кўзи,
Тошкент томон қадалган.
Момонг билан ўша пайтни,
Эслаб ўйга толамиз.
Бирдан йўлга шайланишди,
Саша, Настя холамиз.
Дудлаб чўчқа гўштларини,
Халталарга жойлашиб,
Сўнг, поездга патта олиб,
Якшанбани пойлашиб,
Кузатишди кўни-қўшни,
Тўрт халтада самогон.
Бизлар учун паноҳ бўлди,
Лаш-луш солган жомадон.
Поезд деган сандиқ уйлар,

Анча талотүп экан.
“Нон шахри”ни қўзлаб чиққан,
Йўловчилар кўп экан.
Деразанинг тирқишидан,
Чор тарафга қараймиз.
Тер ҳидидан бижиб кетган
Бошмоқларни санаймиз.
Шундай қилиб, тўрт суткада
Етиб келдик Тошкентга.
Ҳар жиҳатдан қиёси йўқ,
Тўкин шаҳар — бош кентга.
Бу диёрда мева-чева,
Сероб экан, мўл экан.
Одамлари ишchan, абжир,
Сахий, очиққўл экан.
Бу томонга уруғимиз,
Келмаган эди асло.
Жаннатмакон юрт экан,
Кин, адovат мустасно.
Европада бизнинг қавмни,
Атайдилар таракан.
Осиеда суварак дер,
Каминадан тарқаган.
Энг қадимий ҳашаротмиз,
Билмоқ бўлсанг, асли биз.
Термитларга қариндошмиз,
Етти пушти-наслимиз.
Ризқимизни териб еймиз,
Гоҳо баланд, паstdamiz.
Жой-пой танлаб ўтирмаймиз,
Доим жаҳонгаштамиз.
Дунё бўйлаб эмин-эркин
Чопқиллаймиз-кезамиз.
Қай гўшада яшамайлик,
Ўзни эркин сезамиз.
“Суваракни қиринглар” деб,

Талай ҳукм ўқилган.
Кўплаб олим дори излаб,
Сочи тушган, тўкилган.
Шундай қилиб аждодимиз,
Ўз зурёдин таратган.
— Олимлар биз ҳақимизда
Қандай китоб яратган?
— Шоир, рассом жонзотларнинг
Энг яқин, биродари
Маршак, Корней Чуковский,
Яна Жанни Родари.
Корней ота достонлари
Ўзига хос мухтасар.
Султон Жаббор, М. Раҳмон ҳам
Бағишилаб ёзган асар.
Барчасидан мусаввирлар,
Кўнгли бўшроқ — ошнадир.
Уруғимиз, аймоғимиз,
Шириналликка ташнадир.
Рассомнинг мой бўёғига,
Тоза асал қўшарлар.
Шу сабабдан, сувараклар
Шўхлик қилиб, жўшарлар.
Туни билан эскизларнинг
Ранг-рўйини кемириб.
Давру даврон сураяпмиз,
Мўйлов буриб, семириб.
Таниш Себзор даҳасидан
Бир оз ўтгач, қўйида
Машхур рассом Гуломовнинг
Устахона — уйида,
Ёки Рустам Зуфаровнинг
Хилват ишчи дўкони,
Ранг-бўёғни хуш кўрганнинг,
Ўзига хос макони.
Ана, тўрда ўтиришган

Меҳмонларга бир қаранг.
Карнавалга келгандайин,
Камзул, қўйлак турфаранг.
Сизга айтсам буёни,
Урчилик — тараб кетдик.
Бир томони Термиз, Хива,
Бухорога қараб кетдик.
Тинч, хотиржам яшаяпмиз,
Доруломон замонда.
Қариндошлар минг, миллион,
Ўш, Андижон томонда.
Нафс қўйига кираверманг
Сабр қилинг, шошилманг.
Чумолилар еб кўрмаган
Нарсаларга осилманг.
Бегам, иркит уй бекасин,
Мендан яхши биласиз.
Тонг отгунча ошхонада,
Маишатни қиласиз.
Қорин тўйгач, пештахтада,
Тураверманг сўппайиб.
Бизга қарши дори-дармон
Бораётир кўпайиб.
Ҳа, қаерда яшамайлик,
Омон бўлсин, бошинглар.
“Дихлофос”ни кўрган заҳот,
Жуфтак уриб қочинглар.
“Хитойларнинг қалами”дан,
Юрган маъқул сал узоқ.
Бизни қириш илинжида
Кўярлар ҳар хил тузоқ.
Синовлардан ўтаётир,
Янги оғу — “Пих-пах” ҳам.
Шарт-шароит, вазиятга,
Бўлинглар мосланувчан.
Ошхонадан ташқарида,

Бўлмасин ҳеч ишингиз.
Термитларга тақлид қилманг,
Синиб қолар тишингиз.
Бошларингиз тошдан бўлсин,
Пешанангдан ўпайин.
Озиқ-овқат мўл жойларда
Ўзингиздан қўпайинг...
1994.

БЕШИК

(Саломатхонни хотирлаб)

Уч ойда ёзда қайта қурдик,
Бузиб эски томларни.
Янгиладик дарвоза-ю,
Ҳаттоки ишкомларни.

Қўш қаватли иморатнинг
Қандил, нақши бўлакча.
Гулхонани айлантириб
Тортдик шинам йўлакча.

Куя еган кигиз, полос,
Ўрин олди панадан.
Кумfon, чироқ жойин топди
Хилват омборхонадан.

Боқарканман пешайвонга,
Кунгурали эшикка
Кўзим тушди нок остида
Қолиб кетган бешикка.

Шу бешикда фарзандларим
Алла тинглаб ётганди.
Набиралар ором олиб,
Файзли тонглар отганди.

Лол қолардим рафиқамнинг
Садоқат, бардошига.
Ижарали уйга кўчсак,
Бешик унинг бошида.

Ўшал дамлар кўз ўнгимдан,
Ўтар тез-тез туш каби.
Ўғлим, қизим парвоз этди,
Кўкка учган қуш каби.

Фарзандларим ётган бешик,
Сигмай қолгач чорбоққа,
Оқ чойшабга ўраб уни,
Осиб қўйдим чордоққа.

БОШИМ УЗРА

(*Тегирмончи Fойиб ота Раҳимовни хотирлаб*)

Тўрт овулнинг тақдирини
Кўш тегирмон ечар эди.
Сойгузарда навбат кутиб,
Шўх-шан ёшлик кечар эди.

Бирор арпа, бирор тарик,
Макка соглан линчасига.
Эрмак учун қўғирмоч бор,
Ўнгиб кетган нимчасида.

Дон-дунларни фалвирлатиб,
Тозалаб тош, чорларини.
“Шамол, отанг ўлди!” дея
Сопиргани чорлар уни.

Фойиб тоға тагдор сўзлаб,
Кулиб қўяр мийифида.

Пиёз қүшган чевати нон
Ушатилгач қийифига.

Бир бурдадан баҳам кўриб,
Ушоини кўзга суртиб,
Ун солинган хуржунларни
Елкамизга қўяр уртиб.

Ичкарида қўш тегирмон,
Ором билмай фувуллайди.
Тобга келган чанқовуздай
Бир маромда зувуллайди.

...Тегирмоннинг паррагидай
Чир айланди йиллар, ойлар.
Курдик яхши орзу билан
Данғиллама қўш саройлар.

Битта эмас беш-олтита,
Тегирмонлар ишлаб турар.
Холис хизмат илинжида
“Пўлат отлар” кишинаб турар.

Юртдошларим оқибатли,
Ёппа борар ҳашарига.
Айримлари сал йўлиққан,
“Манмансираш” касалига.

Овулдошлар мөхри билан,
Ўсиб-ўниб қўкаргайман.
Қишлоғимнинг тупроғини
Бошим узра кўтаргайман.

ЎРНАК

(Олимжон ҳожи Жўраевни хотирлаб)

Инсон доим интилиб яшар
Киндик қони тўкилган жойга.
Шоир кунни санаб ўтирмас,
Ҳафталар-чи айланар ойга.

Эллик йилким Сафед Булонни,
Олислардан излаб келаман.
Тупроғини қўзимга суртиб,
Тошларини Сизлаб келаман.

Менинг учун, азиз дўстларим,
Она қишлоқ, қутлуғ хилхонам.
Шу гўшага дағн этилган
Боболарим, отам ва онам.

Ўзгаларни билмадим, аммо,
Қишлоқ деса кўзларим ёнар.
Овулдошлар Сизни эсласам,
Софинчларим қофозга томар.

Бу оламнинг ишлари жумбоқ,
Фаниматдир учрашув дамлар.
Каптардайин учиб кетишар,
Фақат, фақат яхши одамлар.

Минг шукрким, азрўй-азалдан,
Яхшиларнинг ўчмагай ёди.
Тўғри гапни айтарди дангал,
Жўравой бобомнинг зурёди.

Маслаҳатгўй, суюнчим бўлган,
Иссиқ-совуқ маъракамда ҳам.

Фарзандларнинг ишидан кувнаб,
Шодликларни кўрардик баҳам.

Бир кун аввал дардлашган эдик,
Ташвишларни бир четга қўйиб.
Қадрдоним Абдураҳимнинг
Шийпонида суҳбатга тўйиб.

— Аттанг! Аттанг! — дейишдан ўзга,
Таскин борми? Инсон чорасиз.
Бошқаларни билмадим, аммо,
Менга ўрнак бўлиб қоласиз.

“КЕНЖА БОТИР” ТУГАМАЙ

Ёнимда қўш набирам,
Сафар тортдик қишлоққа.
Қўйиб берсанг, шай улар
Қанот ростлаб учмоққа.
Овулимиз шартига,
Иккови ҳам кўнинкан.
Ҳеч тушгиси келмайди
Олмурутдан, ўриқдан.
Анҳор босар уларнинг
Файратини, шаштини.
Балиқ тутиб, тобланиб,
Сурар ёзниңг гаштини.
Ўтирадим шийпонда
Қалам йўниб, хат тузаб.
Тушов бўлди чумчуққа
Беҳзод қўйган пат тузоқ.
Қатнашади кун ора,
Каратэга, боксга.
Сабаби ҳозир таътил,
Вақт йўқ китоб ўқишига.
Отамдан қолган уйни.

Қайта қурдик — янгидан.
Барчамиз банд, иш тифиз,
Усталар ҳам гангиган.
Тоҳир қимиз олгани,
Сойгузарга югурап.
Беҳзод қумғон қайнатиб,
Чой ташишга улгурар.
Дўстлар, ҳашар аслида,
Миллатга хос бир зийнат.
Оқибат-чи, рости гап,
Қишлоқча хос фазилат.
Сени қўллаб-кувватлаб,
Кўмаклашар — кўплашар.
Ҳеч бўлмаса, бир коса
Қатиқ билан йўқлашар.
Шу аснода овулга
Файзли оқшом чўкади.
Айри миниб Ўнфорга
Ой зиёсин тўкади.
Иккови ҳам шийпонда,
Дам олишни истайди.
— Бобо энди эртакдан
Айтасиз, — деб қистайди.
“Уртўқмоқ”дан Тоҳирнинг
Эҳтироси ортади.
Аста туртар, қарасам
Беҳзод хуррак тортади.
Кўш набирам ёнимда,
Бир оз чарчаб, толибман.
“Кенжা ботир” тугамай,
Ўзим ухлаб қолибман...

2004.

НАБИРАЛАРИМГА

Сизларга айтар сўзим,
Тоҳир, Беҳзод, Жаҳонгир,
Кутлуғ йўлда қувончингиз,
Тенгсиз, оламжаҳондир.
Ҳавасимнинг поёни йўқ,
Бастингга, уст-бошингга.
Тангрим ўзи тўзим берсин,
Сабрингга, бардошингга.
Ҳар нарсанинг маром, ўрни,
Мақоми бор, вақти бор.
Дўст танлашда эҳтиёт бўл,
Ботирали, Бахтиёр.
Номардларнинг изин ўпиб,
Ялтоқланиб бўзлама.
Виждонингни гаров қўйиб,
Асло ёлғон сўзлама.
Мушкул йўлда қўлласин,
Кутлуғ руҳлар, имконлар.
Буюк Ҳабиб Абдулаев,
Улуг Иззат Султонлар.
Турмуш тарзи етмиш рангда,
Товланади гаройиб.
Менга ибрат Одил ака¹

¹ Одил ака — атоқли ёзувчи Одил Ёқубов.

Иброҳим Ҳамрабоев.
Ҳозир сени ота-онанг,
Суяб, тутиб турибди.
Ҳали қанча имтиҳонлар
Йўлда кутиб турибди.
Орзуларинг қадамингдек,
Тетапоя-чалажон.
Эътиқодли, субутли бўл,

Ботиали, болажон.
Турмуш заҳми туфайли,
Сочим эрта оқарган.
Кимга мақтов, кимгадир,
Ёлғон мойдай ёқаркан.
Ланж-у, эзма чурикларни,
Тоқатим йўқ кўргани.
Битта айбим, тўғри сўзман,
Дангальчиман бўлгани.
Беҳзод, Тоҳир, Жаҳонгирбек,
Бахтиёржон, Ботиржон.
Она юртни, насабингни,
Чиқармагин хотирдан.
Тупроғини гавҳарга ҳам.
Бермасман гапнинг рости.
Киндик қонинг томган ерни,
Қилмагин оёқости.

БОТИРАЛИНИНГ САВОЛЛАРИ

Гапга чечан набирам Ботиали,
Аҳён-аҳён бошимни қотиради.
Саволлари ажабтур, турфа ранг:
— Бобо, — дейди — майналарга бир қаранг!
Тўрғай нега кўкда қанот қоқмайди?
Кумриларга новвот берса боқмайди...
Нега қирни хуш кўради чақчифай?
— Шўх болалар қувлашган-да тош олиб,
Шунинг учун тоққа қочган бош олиб...
— Шаҳарликлар булбул созин уққанми?
У ерда ҳам уя солиб, туққанми?
— Битта булбул чидаб йўғу борига,
Кувончларин қўшиб фижжак зорига,
Макон тутиб қўниб олган, кўниккан,
Камолиддин Раҳимовнинг торига.

ТУЛПОРКҮЛДА

Ой чиқди-ю Тулпоркүлда,
Юз-күзини чайқади.
Эпкинлар кулча ясар,
Тилло баркаш қалқади.
Ҳарирдайин товланади,
Ойдан тушган ҳар қатим.
Тонгга қадар сарпо тикди,
Арқоқлари зар қатим.
Күркамлиқда ўхшали йўқ,
Шу жиҳатдан фарқ қиласар.
Кўқда туриб оламни у,
Қутлуғ нурга фарқ қиласар.
Туннинг содиқ посбонини
Тангритоғ ҳам алқади.
Оймоманинг дам олишин
Чўлпон юлдуз пайқади.
...Куёш тоғдан мўралади,
Оlamнинг очиб кўркин.
Бошимиздан қут-барака,
Сочади, ана кўргин.

ТЕНГИ ЙЎҚ

Уст-боши ола-чипор
Камзулининг енги йўқ.
Муттаҳамлик, ўжарликда
Кушлар ичра тенги йўқ,
Олти нафар олақанот,
Мажлис қуарар гужумда.
Навбат Туман бобомларнинг
Бодомига — хужумга.
Чағ-чугини эшитганнинг,
Эсхонаси оғади.
Бодомлари фалвираг-у¹,

Бўлгани йўқ қофати².
Буни кўргач ҳаккаларнинг
Жаҳли чиқди, фашланди.
Ўн тўрттаси бирданига
Ўғриларга ташланди.
Тепиб олақанотларни,
Чўқиб сўлу соғидан.
Битта қўймай қувиб чиқди,
Туман бобом боғидан.

¹ Фалвирак — пўчоғи юмшоқ, чақишга қулай.

² Қофати — пўсти, қобиғи арчилмаган.

ЯНА БИР СЎЗ

Эгамберди ёз пайтида
Таътилга чиққан чоғда.
Бобосидан кўп сўзларни
Уқиб олди қишлоқда.
Биялари туққан экан,
Пешанаси оқ тойчоқ.
Онасининг атрофида
Ирғишлиб ўйнар ҳар чоқ.
У бир ёшга тўлган кунда,
Кенжা қулун бўларкан.
Сўнг, Ёпоги деган номга
Кўникаркан-кўнаркан.
Кейин Қамишқулоқ бўлар
Тулпор, Дулдур аталар.
Асовларин мингич қиласар,
Чавандозлар, оталар.
Қашқа, Тўриқ ва Қорагир,
Ранг, тусини англатар.
От депсиниб кишинар экан,
Бўлса бирор хавф-хатар.
Бобомларнинг сухбатлари

Дил губорин ёзади.
Яна битта сўз ўргандим,
Омоч тиши — позадир.

ЗАВҚ

Чархоб¹нинг соясида,
Салқинлаб ётганмисиз?
Бошоқни ёстиқ қилиб,
Хаёлга ботганмисиз?

Табиат кунга мослаб
Усти-бошни кенг тикар.
Авжи ўрим, ҳаво дим,
Чигиртка ҳам энтикар.

Чўққиларнинг қўйнида,
Ҳордиқ олар булутлар.
Писиб ётар инида
Зағизғон, Головутлар².

Анғиздаги бедовлар,
Сўнадан безиллашар.
Чумолилар тинмайди
Авжидა қизғин ҳашар.

Тўрғай кўқда муаллақ,
Олқишлиб, қўшиқ айтар.
Қанотларин қоқмасдан
Куёшни тўсиб айтар.

Бундай завқ шоир учун —
Топилар қачон? Қайда?
Хирмондан садо келар,
— Хўп майда-ю, хўп майда!..

¹ Чархоб — фарам.

² Головут — кўкқарға.

ҚИШНИНГ СЕПИ

Бебош шамол ишқириб,
Бўғотларга бош урди.
Кузнинг чала ишларин,
Қишининг сепи яширди.
Изфириnda қор тўзғиб
Адирлар гуртки¹ бўлди.
Силлиқтошда сирғаниш,
Баҳона-туртки бўлди.
Уста Аъзам тоғамлар,
Тулпорларни тақалар.
Кўпкарига ошиқар,
Ҳатто бола-чақалар.
Отни қичар чавандоз,
Қапчиғайни ёқалаб.
Қор упадек қуп-қуруқ,
Қулогингни чимчилар.
Силар отнинг сағрисин,
Улоқчилар, синчилар.
Тунги аёз чоғида
Қорлар қотди — тўнглади.
Дилшод хитой чанасин
Кавшарлатди — ўнглади.
Бугундан яна гавжум,
Яроқтепа, Дўнгтепа.
Болаларга эрта-кеч,
Сирғанишга ўнг тепа.
Ойнақда аксин топган
Қишининг ҳукми-фармони.
Абдуқаҳҳор мерғаннинг
Тоғда қолган армони...
Кутилмаган паллада,
Чил-чил синди хаёли.
— Кўйларга ем беринг, — дер
Зулфияхон аёли...

¹ Гуртки — қор уюмлари.

КЎЗ ТЕГМАСИН

(Хоразмлик машҳур қўғирчоқ
устаси Мансуржон Курёзовга)

Она юртнинг асотирларин
Кўргазмадан оласиз таниб.
Қадим Урганч. Кўҳна Фарфона,
Аксин топган бекиёс — ёниқ.
Мансур Қурёз касбга меҳрини
Юлдузлардек сочиб ташлаган:
Бекасам тўн кийган боболар
Меҳмоннавоз — кўнгли яшнаган.
Атлас кўйлак кийган қизчалар,
Гул дасталар ўқтам ва шоён.
Шинам залда, турфа рангларда,
Ўзбекистон бўлар намоён.
Кўз тегмасин, Сиздай ўғлоннинг
Иқтидори, файрат, шаҳдига.
Фабриканинг аҳволи тайин
Улар чаққон фақат нақдига...
Болажонлик — буюк фазилат,
Тарқ этмасин қаён бормайлик.
Ўзгаларнинг қўлида, дўстим,
Биз қўғирчоқ бўлиб қолмайлик...

МЕН ЎША ЛАТИФБОЙМАН

Мен, ўша Латифбойман,
Битта ишни дўндиридим.
Олтига ўргимчакни
Тўр тўқишига қўндиридим.
Учтаси ўриш эшар,
Қолганлари арқоғин.
Бериб турдим пашшадан
Ёзиб хумор, чарчоғин.

Иш тугади беш кунда,
Түрмисан түр бўлибди.
Ҳатто Ойга ёпгудай
Фаройиб, зўр бўлибди.
Энг машхур балиқчилар
Ҳавас қилди ўлгудай.
Ҳимарса Асқар тоқقا,
Оппоқ салла бўлгудай.
Роса юз минг чумоли,
Иш бошлади эрталаб.
Қоплон кўлга етказди,
Ўша тўрни елкалаб.
Уни синаш машқини
Якшанбада ўтказдик.
Итбалиқ, Маринкани,
Маромига етказдик.
Бардош берди иплари,
Осетрага, сазанга.
Тушиб турди бирма-бир,
Ёғ доғланган қозонга.
Бизни қутлаб келишди,
Чагалайлар қўшини.
Яширолмай қувончин
Сувга урап тўшини.
Икки кун ҳордиқ олиб,
Тўрни яна ташлаймиз.
Бу сафар акулани,
Китни овлай бошлаймиз.
Афсус, ов юришмади,
Ростини айтсам Сангга.
Бандаргоҳда тўполон,
Эсиз меҳнат, аттангга!..
Каламушлар кечаси
Тўрларни кемирибди.
Ёлғон эмас, ҳар бири
Чўчқадай семирибди...

ОВ ГАШТИ

Қирқ ёлғондан бир ёлғон,
Қадимдан мерос қолган.
Елкамда сафар халтам,
Ёнимда сергак тозим.
Овда не күрган бўлсам
Сизга айтмоғим лозим.
Чўл бағрида биқирлаб
Булоқлар қайнаб ётар.
Битта сичқон қоплонни
Мижиглаб чайнаб ётар.
Дўстлар, буни ростмана
Зўр ов деса бўлади.
Сиртлон билан Қашқирнинг
Оқиб кетди сўлаги.
Фингшиб чиябўрилар
Чор тарафда айланар.
Ўлимтик қуш чарх уриб,
Ўлжа сари шайланар.
Ит безовта бу ҳолдан,
— Сабр қил, — деб озига,
Суяқ олиб қопчиқдан,
Ташлаб бердим тозига.
Хаёллар — учқур тулпор,
Сиз қандай кишанлайсиз?
Латифбойнинг лофларига
Гоҳида ишонмайсиз.

ЮГАН СОЛИБ, ЭГАР УРИБ

Кулоқ солинг Латифбойнинг
Яна битта эртагига.
Юган солиб, эгар уриб,
Чигиртканинг эркагига,
Қамишлардан найза ясаб,

Отқулоқдан қалқон қилиб,
Хуржунига түқоч солиб,
Тутмайиздан толқон қилиб,
Ёй камалак елкасида,
Ёнбошида гулдор садоқ,
Узангини никтаб борар,
Латифбойнинг феъли чатоқ.
Чигиртка ҳам ўқтин-ўқтин
Асовланиб лўкиллайди.
Уни кўриб юмронларнинг
Юраклари пўкиллайди.
Майдадчуда даррандани
Эътиборга илгани йўқ,
Маймоқ қуён, каламушни
Назар-писанд қилгани йўқ.
Бу гал Латиф бораётир
Қизил Унгур зовига,
Хайри хола чақиртирган,
Уни тулки овига.
Кампиршонинг товуғин еб,
Суягини кемирганмиш,
Агар миш-миш рост бўлса,
Бегемотдай семирганмиш.
Чигирткани роса емлаб,
Кейин толга боғлаб қўйди.
Тулкиларнинг инларини
Дурбин билан чоғлаб қўйди.
Сездирмайин форга кириб,
Мўлжал олиб анча ётди.
Пешин чоги бегемотдай
Бир тулкини шартта отди.
Ёй-камоннинг зарбидан у
Жон ҳалфида бақирганда,
Итдай улиб, ёрдам сўраб
Дўстларини чақирганда,
Жилгадаги қарағайлар

Акс-садога синиб тушди,
Олмахонлар шошиб қолиб,
Бир-бирини миниб тушди.
Сүқмоқ йўлдан чопганича
Ўлжасига етиб, алҳол,
Типирчилаб турган маҳал
Бўғизлади уни дарҳол.
Семирибди ҳаддан ортиқ,
Куйруги ҳам икки қулоч.
Тўрт паҳлавон тери шилар,
Сабаби, йўқ ўзга илож.
Қолган-қутган ҳангомани
Кўнчилардан эшит, дўстим:
— Ўша тулки мўйнасидан
Тикиб бердик ўнта пўстин.
Латифбойдай зўр мерганга
Арзир эди ҳисоб берсак.
Икки қулоч куйруғидан
Тайёрладик қирқта телпак.
Кузғун кўқдан човут солиб,
Тулки гўштин улоқ қилди.
Арслон билан йўлбарс эса
Бир-бирини чуноқ қилди.
Мерган тулки калласини
Хуржунига солиб келди.
— Мени эслаб юрарсиз, — деб,
Икки қўллаб олиб келди.
Хайри хола нарвон кўйиб
Товуқ катак ёнбошига,
Ирим қилиб каллани у
Осиб қўйди том бошига...

БАРЧАСИ ЁДИМДА

Барчаси ёдимда, эсимда,
Ҳали туғилмаган кезимда,

Бобомнинг йилқисин боқардим,
Харсангтошга қозиқ қоқардим.
Барчаси ёдимда, эсимда,
Ҳали туғилмаган кезимда,
Келардим отларни қайтариб
Қарасам, йўқ тўриқ байталим.
Уни боғдан, тоғдан қидирдим,
Яёв ҳаммаёқдан қидирдим,
У пайтларда ой ҳам ётмасди,
Қуёш эса сира ботмасди.
Булут бўлмаса ҳам дўл ёғарди;
Момом қисир эчкини соғарди.
Фойда борми гапни чўзгандан,
Байталимни топдим Ўзгандан.
Ойна кўлнинг шундоқ ёнида,
Жуман улоқчининг томида,
Кулунлаб ётибди, қаранглар,
Тойчоқ мени таниб, аланглар.
Ҳаракатни бошладим шомдан.
Олиб тушгач, уларни томдан,
Отни миниб, қулунни ортсам,
Чўх, деб унга қамчинни тортсам,
Туролмади байтал бечора,
Юролмади байтал бечора.
Сўнгра, тойга отни ўнгариб,
Эгарини боғлаб-тўнкариб —
Қамчи урсам, қаноти бордай,
Кулун чопиб кетди шунқордай.

БЕШТА САНОЧ

Лоф гапларга Латифбойнинг
Суяги йўқ,
Сал мақтанчоқ, оғзини-ку,
Жияги йўқ.
Ёшлигидан ўта абжир,

Чаққон эди,
Бўрдоқига бешта чивин
Боққан эди.
Чархлаттириб болта, пичоқ,
Асбобларни,
Ишга солди гузардаги
Қассобларни.
Бир чивинни айиргунча
Жўрасидан,
Тушов солиб чиқаргунча
Кўрасидан,
Икки қассоб тушиб кетди
Қора терга,
Эплаб-сеплаб ётқизишиб,
Уни ерга,
Шоди қассоб, таваккал, деб,
Тортди пичоқ,
Терисидан бешта саноч¹
Тикди шу чоқ.
Мен уларни чўпонларга
Совға қилдим.
Кўплар бунга ишонмасди,
Тавба қилдим.
— Ёларини бераётсак
Совунгарга,
Гўштларини олиб қочди
Бир тўп қарға.

¹ Саноч — қимиз қуйиладиган идиш. Эчки ва қўйининг ошланган терисидан тайёрланади.

ПОЙГА ЗАВҚИ

Пойга завқин сургани,
Тақалатдим Бургани.
Кўникмаган сиёғи,
Бир оз оқсан туёғи.

Оқ қанд бериб овутдим,
Терларини совутдим.
Яхши боқдим, тинмадим,
Бехудага минмадим.
Унга ўтган шанбадан,
Арпа солиб дамба-дам,
Парваришни дўндиридим,
Йўргалашга кўндиридим.
Демак, тайёр пойгага,
Соврин қолар фойдага.
Силаб-силаб эркалаб,
Миниб чиқдим эрталаб.
Ҳайъат қуръя ташлади,
Пойгани ҳам бошлади.
Ўн газ ерга бир ҳатлаб,
Туёғидан ўт чатнаб,
Ўнта кулук — тулпорни,
Унга минган шунқорни,
Толиқтириб, толдириб,
Боплаб ортда қолдириб,
Етдик марра-финишга,
Арзир кўз-кўз қилишга.
Шундай қилиб, Сичқонбой,
Сурди овнинг гаштини.
Мен эса, маза қилдим
Кезиб овул даштини.

ФУРГУЛДАЙ

Майна каби бир қуш бор,
Асли номи Фургулдай.
Фаросатли, жонсарак,
Овозлари булбулдай.

Шўх, шарқироқ сойларнинг,
Сувтол ўсган пойига,

Уя солар, шамолда,
Тебранар ўз жойида.

Шаршара оҳангида,
Бола очар, туш кўрар.
Балиқни, чигирткани
Нонуштага хуш кўрар.

Илонларга чап бериб,
Шўнгийди сув остига.
Файрати сифмас унинг,
Жажжи қадди-бастига.

Жайрага алла айтиб,
Оҳуларни уйғотар.
Саркашлиқда тенги йўқ,
Ой ҳам хотиржам ботар.

Тиними йўқ шу қушча,
Тадбиркор чиқиб қолди.
Ҳозир жуда урф бўлган,
Телефон топиб олди.

Бу хушхабар ҳақида
Жар солди Олаҳакка.
Фулгулдайнинг макони,
Қушларга бўлди пакка.

Зарғалдоқ, Фурғулдайнини,
Табриклаб, кўнглин хушлар.
Кўриб қўл телефонни,
Майналар ёқа ушлар.

Кўрибсизки, айни пайт,
Тоғлик турфа қушларни
Телефонда битирад,
Шаҳарга хос ишларни.

Байрам билан құтлайди,
Қарқуноқ холасини.
Читтак тергар ўқишиша
Үтмаган боласини.

Раҳмат айтар қўшнилар,
Бундай савоб юмушга.
Телефон ҳақи учун,
Ниначи-ю, қумурсқа.

Хаёллар мўъжизага,
Айланган шу чоғларда
Бозор тарзи оқибат
Етди ҳатто тоғларга...

ФЕРМЕР

Ёлғон эмас, лоф эмас,
Бу шунчаки гап эмас.
Осон тутманг Жайрага,
Кулги бўлмас Майнага.
У ёввойи Тўнғизни
(Сиз ўйламанг Кўнғизни)
Тўқайда уч кун пойлаб,
Нўхталаб, уни бойлаб
Беш-олти кун совутди.
Карам бериб овутди.
Елкасига қўм¹ ургач,
Ва устига чўм² ургач,
Рўйи-рост бўлди хачир,
Кўрганнинг кўнгли ачири.
Тижорат — ўтин ташир,
Мўлжалдан кўпин ташир.
Буюртма бўлиб қолса,
Пичан-у, чўпин ташир.
Имкон ва шартга лойик,

Жайра ҳам кетди бойиб.
Үз ишини пухталаб,
Уч түнгизни нүхталаб
Түртта қилди — жуфтлади
Кафтига шарт туфлади...
Таваккал — олчи-пукка,
Мақсадга боқиб тикка
Асос солди тоғда у,
Күлбола хўжаликка —
Бундайин чоғда ахир,
Кўпчилик доғда ахир.

^{1,2} Кўм, Чўм — эгар нусха афзаллар.

Юролмайди техника.
Оралаб тоғда ахир.
Фермер банд иши билан,
Кузги ташвиши билан.
Тўнгизлар ер ҳайдашар,
Кўш омоч — тиши билан.
Омад келди ўнгидан,
Қийналмади гўнгидан
Лавлаги экиб қўйди,
Картошканинг сўнгидан.
Кўрасини созлади,
Атрофин лўмбозлади.
Тўнгизларни қадрлаб,
Ем бериб, эъзозлади.
Иш бир оз юришганда,
Қарға бўлди кушанда...
Чумчуқ икки орада,
Гап ташиди ўшанда.
Пашша тушди ошига,
Келиб Жайра қошига
Тулки бош солиқчилар,
Тегаётир ғашига...

ЯЙЛОВДА

1

Милтиқларни шай қилиб,
Тунадик Учқайинда.
Кейин тоққа йўл олдик,
Демак, ов ҳам тайинда.

Отилмаган какликни,
Патладик-эй, патладик.
Фалвирда сув олгани
Куруқсойга қатнадик.

Кейин каклик гўштини,
Солдик тешик қозонга.
Човлига шўрва қуйиб,
Ичиб олдик аzonда.

Апил-тапил эгарлаб,
Минилмаган тойларни,
Кунтегмасда кўрдик биз
Томчи деган жойларни.

Дўстим, тоғлар аслида,
Бутунлай бошқа олам.
Чўпон бобом эркалар:
— Қимрондан ичгин, болам.

2

Отлари йўқ яйловда,
Кўпкарилар чопилди.
Чалинмаган карнайнинг,
Овозлари топилди.

Кўқда момогулдурак,
Арслондайин бўкирди.
Чақмоқ чақиб юлдузлар
Ёнфоқдайин тўкилди.

Жала қўйди, сел оқди,
Тўнфизбулоқ қўпириб.
Бизлар қайтдик шаҳарга
Булутларга ўтириб...

КАЛХАТНИ ҲАМ

Латифбойнинг жуда ўжар
Беданаси бор эди.
Минг афсуски, тўрқовоғи,
Кушча учун тор эди.
Тагли-тугли, насаб-насли,
Асли савзивор эди.
Бир зарб билан тўрқовоқни,
Ипин узди қаранглар.
Баҳром тоға беданага
Боқар ҳайрон аланглаб.
Толга қўниб, — бит-билик — деб
Сайрашни эшиб қўйди.
Чигиртка-ю, чумчукларнинг
Кулогин тешиб қўйди.
Кўриб қолди сўридаги
Каттакон мислаганни.
Жез тумшуқдан, панжалардан,
Табиат қисмаганди.
Мева тўла идишни у
Тепарди, аҳвол тайин.
Эрмак учун мислаганни,
Чўқиди галвирдайин.
Латифбойнинг беданасин,
Ўзига хос одими

Вақти келиб қалхатни ҳам
Берса керак додини.

КАПАЛАК ТУГИЛГАНДА

Даврадошлар Латифбойнинг,
Лофларин хушлаб турар.
Қизлар эса ҳаяжонда,
Ёқасин ушлаб турар.

— Чигирткалар туғилганда,
Суюнчи олган ҳакка.
Бирдан кўкнинг қорни оғриб,
Гулдираб чақмоқ чаққан.

— Балолардан асрасин, — деб
Тимсоҳ сувга бош урган.
Каркидонлар қирга қочиб,
Фил хартумин яширган.

Латифбайдан сўраб қолди,
Сарвар билан Ирода:
— Капалак туғилганда
Нима бўлган, биродар?

— Ўша куни Ой ҳам қулиб,
Юлдузлар чарақлаган.
Бойчечак қарсак чалиб,
Офтоб-чи ярақлаган.

ҲУШТАК ЧАЛИБ ТУРАСИЗ

Ҳайвон зоти турфа феъл,
Одати, йўриги бор,
Табиатдай ранг-баранг,
Чипори, тўриги бор.

От минганды азалдан
Тизгин силтаб “чүх” дерлар.
Күкка қараб сапчиса,
Учкур экан “үх” дерлар.
Хуржун ортгач, эшакка
“Хих”лаб йўлга соласиз.
Қашшанг-у — тихир бўлса,
Халачўпни оласиз...
Туя зотин аслида,
Чўқтирасиз “чих-чих”лаб.
Кейин қанор, қопларни,
Тангийсиз унга юклаб.
Ҳайвонларнинг ичида
Кўтос бир оз жагалроқ.
Узангини ниқтагач,
“Иҳ-иҳ” дейсиз дағалроқ.
Чўққи соқол эчкини,
Кўриқлаймиз “чек-чек” деб.
Кўй-кўзини чорлаймиз,
Печак тутиб, “мех-мех” деб.
Мушук ошса ҳаддидан,
Ҳайдаймиз уни “пишт” лаб.
Товуқларни “ту-ту”лаб,
Экин титса “кишт-кишт”лаб.
Бузоқча бир маромда,
Ялқовланиб “мүү”райди.
Она говмиш “бў-бў”лаб,
Ҳол-аҳволин сўрайди.
Кўмсаб қолса ойисин,
Кўзи нозик “баа”лайди.
Қуйругини силкитиб,
Улоқ шўхчан “ма”райди.
Уюр боши айғирлар,
Ўзлигини англашиб.
Кишнар “аҳанг-аҳанг”лаб,
Тоғларни жаранглатиб.

Тулпор тилин билмоқлик
Синчи¹лардан қолганда.
Хуштак чалгин отингни,
Суфоргани борганда...
Бургут “чийқут-чиҳо”лаб,
Йўрифингга қўнади.
Каптарни “беҳ-беҳ”ласанг
Кифтинг узра қўнади,
Томорқада бир курка,
Кибор-ла лапанглайди.
Унинг “фул-фул” деганин,
Макиёни англайди.
Овчи ёйгач жели²ни,
Эринмайди, шошмайди.
Чуркиракда мастакка
Тақлид қила бошлайди.
“Бит-билиқ” оҳангидан,
Дала-даштлар яшнайди.
Ноғорасоз лайлакдан,
Какликлар қолишмайди.
“Как-ри-ка-как” қўшиғин
Булбулга алишмайди.
Биласизми аслида
Жонзотда ҳикмат катта.
Имкон бўлса, уларнинг —
Феълин билинг албатта.

¹ Синчи — отларнинг феъл-авторини билгувчи.

² Жели — бедана ушлайдиган тўр.

БЕКМУРОДНИНГ ТАРЛОНИ

Қамбар ота таклиф этди,
Саночсойга.
Кўркам яйлов — Бешқўлдайин
Ажиб жойга.

Бекмуроднинг Тарлон ити,
Экан синчи.
Бизни таниб, кутиб олди,
Энг биринчи.
Қамбар ота унга шодмон
Қарар эди.
Эркаланиб ит маҳсини
Ялар эди.
Ота уни ёшлигидан
Боқиб олган.
Шу боисдан вафодор-да,
Ёқиб қолган.
Аста-секин кўниб борган,
Чорва отга.
Катта бўлгач, совға қилган
Бекмуродга.
Мол юрмаса думларидан
Кўяр тортиб.
Чопогонлик бурчи ундан,
Қолмас ортиб.
Сигирларни ёлғиз ўзи,
Кўриқларкан,
Кўрагача ҳайдаб бориб,
Тўлиқларкан.
Худди шундай кўмаклашиб,
Ишлар Тарлон.
Ким ҳаддидан ошар бўлса,
Тишлар Тарлон.
Юзга яқин бузоқ молни,
Сергак ҳар дам.
Кеча-кундуз қўриқлайди.
Қашқирлардан...

ТОФНИНГ ТОФДЕК ТАШВИШЛАРИ

(*Китобхон оғам Қамбарали Жакпаровга бағишилайман*)

Тоф билан сув бўлмагандан,
Не кечарди ҳолимиз?!.
Балки тупроқ ялармиди,
Кўйларимиз, молимиз?!
Онажоним — табиатни,
Чевар Тангрим яратиб,
Бир-бирига боғлиқ қилиб,
Ўз хукмига қаратиб,
Таъкидлади: — Чиқа кўрма,
Мутаносиб қоидадан.
Кўзингга сурт, эҳтиёт қил,
Инсоф билан фойдалан.
Дўппидайин Сафед Булон.
Юртимнинг бир парчаси
Томчида кун ярқ этгандай
Элга аён барчаси.
Минг йилдирким боболарим,
Яйлов сари қатнаган.
Бедовларнинг туёғидан
Тўзон, олов чатнаган.
Тўйбулоқ¹да, Сарбағиш²да,
Кузен³да, Куйкуё⁴да,
Йўргалатма⁵, Чагирвой⁶да
Пода боққан пиёда.
Ҳозирда ҳам ўн беш ўғлон
Фидо айлаб ўзини,
Қишлоғимнинг чорвасидан
Топар ризқи-рўзини.
Солижоннинг турмуш тарзи,
Тоғлар билан бойланган.
Зокир, Одил, Алишернинг

^{1,2,3,4,5,6,7,8} — Яйловларнинг номлари

Тақдирига айланган.
Баҳор, ёзни Қора дўнг⁷да
Гоҳ Томчи⁸да қаршилар.
Муродилло, Убайдулло,
Қатордаги нор шулар.
Тоғнинг тоғдек ташвиши бор,
Сизга айтсам буёгин.
Баъзан оҳу, жайронларнинг
Дош беролмас туёғи.
Қирлик, жарлик арчазорда,
Толиқар ҳатто отлар.
Йўл топмай гангид қолар,
Биз каби етти ётлар.
Бир товон йўл, ости ўпқон,
Уловлар тошинқирап.
Гоҳо овчи тайfonлар ҳам
Мудрашар, босинқирап.
Ҳабибулло минган “Виллис”,
Манзил сари тирмашар.
Овчи укам Абдуқаҳҳор,
Улор⁹ билан тиллашар.
Тоғнинг тоғдек ташвишларин,
Йўқдир чеки-чегаси.
Бу сир эмас, турфа хилдир,
Кўй ва молнинг эгаси.
Орасида комили кўп,
Оқил, содда, тўпори.
Тиррифи бор, айримлари
Кўполларнинг қўпули.
Кутилмаган ҳодисалар,
Чиқар оёқ остидан.
Бўри кўккис ҳужум қиласар,
Совлиқ, бузоқ қасдида.

⁹ Улор, Ҳилол — фаройиб қушларнинг бири.

Эртакларда айтилгандай,
Юлдуз санаң ётилмас.
Тонгни бедор кутар чўпон,
Ортиқча вақт топилмас.
Йилқичилар меҳмон қилиб,
Қимиздан хўп заплади.
Даврага жон бағишлади
Овчи Зокир гаплари.
— Кучимизга-куч қўшади,
Тофни билган, тушунган.
Шароитдан хабари йўқ,
Айиради хушингдан.
Мамасоли акамизнинг,
Моли жардан қулади.
Бозор нарҳда ўша жонвор,
Тўрт юз доллар туради.
Сиз чўпоннинг аҳволини
Бир муддат ҳис қиласангиз,
Улгурмадик бўғизлашга,
Буёгини билсангиз...
Мамасоли акам асли,
Дўлвори инсон эди.
— Бу Оллоҳнинг буйруфи,
Ташвиш қилманглар, — деди.
Аёлларнинг иши қизир,
Кун сайин оқшом пайти.
Софин қўйлар, сигирлар,
Кўтонга келар қайтиб.
Салти-сувой буқа, новвос,
Тоф бағрида тунаиди.
— Фалокатдан асрасин, — деб
Чўпон ният тилайди.
Чорвани ўз эгасига,
Соф, тўқис қиласак тортиқ.
Бизлар учун шу мавсумда.
Байрам йўқ бундан ортиқ.

Бир дўстимнинг молларини,
Боқар экан Ботиржон.
Сўзлаб берди, дилда борин
Кўшиб, чатмай хотиржам.
— Юзта молнинг юз ташвиши,
Эртаю кеч бошимда.
Ўз вақтида ҳақин бермас,
Ҳаловат йўқ ошимда.
Ўта қирриқ, бир новвосни,
Оларканман гаровга.
Шундан кейин, ўз-ўзидан,
Пул топилар дарровда.
Шу устознинг бу одати,
Такрорланар йил сайин.
Эски усул кўлланади,
Ўзга чора йўқ, тайин...
Менга қолса фермерларнинг
Иши келсин ўнгидан.
Даромад ҳам топаверсин
Ҳатто молнинг гўнгидан.
Тоғнинг тоғдек ташвиши бор,
Дил тубини емирган.
Чўпонларнинг бардошлари
Ясалмаган темирдан.
Сиз ўйларсиз, улар тоғда,
Қимрон ичиб семирган.
Қўйчивоннинг таёфидан
Молнинг семиз, орифи.
Бирор ҳайвон йўқолсами,
Тўзид кетар чориги.
Тоғнинг тоғдек ташвиши бор.
Қарсак икки тарафдан.
Қир, адирга зийнат асли,
Шўра, какра, алафлар.
Яйлов кўкка муштоқ боқар,
Ёмғир тилаб булутдан.

Кимлар тотмас насибасин,
Сариёғдан, қурутдан.
Чўпон-чўлиқ маконини,
Кўз нуридай сақлагай.
Бироқ айрим каслар иши
Кўпчиликка ёқмагай.
Юракларинг зирқирайди,
Кўриб тоғнинг жуссасин.
Ўтин қиласар довулға¹син,
Арча, ҳасса-муссасин²
Айбин айтсанг, тан олмайди,
Сўзлаб тангри номидан.
Инсофни-ку еб битирган,
Ортиқча имконидан.
Кўш қаватли уйлар учун
Тоғу тошни қўпориб.
Тек қўйсангиз отгиси бор,
Замбаракка тўп олиб.
Табиатни топтаб, хўрлаб,
Гуноҳларга ботиб биз.
Кўзга суртиб, тавоф қилмай,
Уни ғажиб ётибмиз...
Тоғнинг тоғдек ташвишига,
Малҳам бўлган киши йўқ.
Онажоним — табиатнинг
Мадори йўқ, хуши йўқ.

* * *

Отағози бобомларнинг
Рухларига юкуниб,
Сажда қилгум тоғларга,
Етмиш етти букилиб.

^{1,2} — Дов-дараҳтларнинг номи.

ЯССАВИЙ ЗУРРИЁТЛАРИ

Туркистон деб аталмиш,
Қадим юртнинг фарзанди,
Билгин етти отангни,
Сен кимнинг асал-қанди?..

Бу шаҳарни ардоқлаган,
Амир Темур Жаҳонгир.
Тарихи ҳам, таърифи ҳам
Дўстим, олам, жаҳондир.

Хўжа Аҳмад ҳазратни
Буюк Темур пир тутган.
Турк қавмининг қадрини
У доимо бир тутган.

Кўхна Турон заминнинг
Дилгир, шўхчан боласи.
Сенга дастур Яссавийнинг
Дилдан чиққан ноласи.

Қадим қозоқ тарихи,
Аблайхондан бошланар.
Варақласанг қатларин,
Гоҳо кўзинг ёшланар.

Абулхайр, Улугбеклар,
Бўлишган қуда-анда.
Ўтмишинг ёдга тушса,
Ифтихор жўшар танда.

Аллома Югнакийнинг
Рухлари парвонадир.
Гавҳарбегим ибрат асли,
Робияхон онадир.

Аҳли илм диёри,
Шон-шуҳратга эли бой.
Муса жиров, шоир Эргаш,
Адиб Саттор — Ерибой.

Кўҳна замин, турк қавмин
Фахри дея аталур.
Иқон эса Миртемирдай
Улуг зотнинг Ватани.

Не табаррук инсонлар,
Сенга қанот бўлишар.
Шуҳрат, қадринг, шавкатинг
Достон, баёт бўлишар.

Икки элнинг эрка ўғли,
Одиг Ёқуб, Носир Фозил.
Қутлуғ ёшга чиқарди,
Анорбоев бўлса ҳозир.

Устоз акам Сиёвнинг
Ўзига хос имзоси бор
Зурётларнинг сафларида
Мирпўлатдек Мирзоси бор

Муҳаммаджон Ҳайруллаев
Дилбар адид, менга оға,
Отаули Раҳимжоннинг,
«Тилсим»ига жон садага.

Осмонга отса арзир,
Туркистонлик бўркини.
Тавсифлашга сўзим етмас,
Бу ўлканинг кўркини.

“Хикматлар” ким Яссавийнинг
Ёниб ёзган оҳидир.
Туркистоним — турк қавмининг
Кутлуг саждагоҳидир.

Бу юрт асли Осиёга
Меҳвар учун яралган.
Шу макондан туркийлар
Жаҳон бўйлаб таралган.

Қондош халқмиз, тилагим
Кўнглинг баҳор, ёз бўлсин.
Хўжа Аҳмад зурётига
Гуллар поёндоз бўлсин.

Туркистоним, шу бағишлов,
Жўнроқ шеърий баёндир.
Сенинг ёшиңг, бир Тангриму
Яссавийга аёндир...

ҚИСМАТ (Баллада)

Минг тўққиз юз тўқсон бирнинг
Авжи Наврўз чоғида,
Гўзал Қрим диёрининг
Тўнғизтоғ қучоғида,
Гурунглашдик уч оғайни,
Туркман¹, ўзбек, армани.
Бунда ҳордиқ чиқарганнинг
Қолмас сира армони.
Ҳар кун оқшом чой баҳона
Дилдан гурунг қурамиз.
Ва хаёлан Ўш, Қорабоғ
Копетдоғда юрамиз.
Кажрафторнинг ишларига

Учов уч хил боқамиз.
Жумбоқларни ўзимизча
Имкон қадар чақамиз.
Охир суҳбат йўналишин
Шамойили ўзгарди.
Алғов-далғов замона
Бор ҳар кимнинг ўз дарди.
Ҳасратлашдик, дардлашдик хўп
Ахир нима дейин мен.
Икковига “Темурнома”
Совға қилдим кейин мен.
Шоир Юрий Саакян² ҳам
Солномани вараклаб,
Саркарданинг жанг-жадалин
Кўшиб-чатиб, сал оқлаб,
Фаройиб бир воқеани,
Сўзлаб берди даврада.

¹ Оғагелди Алланазаров — туркман шоири.

² Юрий Саакян — арман шоири.

Ўзига хос усул билан
Астар бичди аврага.
Амир Темур лашкар тортиб,
Табриз сари ўтганда.
Ҳаяstonни енгиб охир
Арпалига етганда.
Ризқин излаб кенг даладан
Чолу кампир юкуниб,
Сарак терар тўрvasига
Етмиш икки букилиб.
Кўш набира бошоқларни,
Тўқмоқ билан янчади.
Кўшин билан ишлари йўқ
Ким ҳориб, ким чарчади,
Отдан тушиб олампаноҳ

Бормиш улар қошига.
Саломлашди сабр тилаб,
Чол-кампир бардошига.
Мезбон эса саркардани
Сийлади күмоч билан.
Соқчиларни бир хўпламдан,
Атала-умоч билан.

— Олампаноҳ, — дейди, — бобо
Ҳасратидан чанг чиқиб, —
Зўрга етдик дон ўримга
Ўтган қишдан танг чиқиб.
Бу кунларга йўлиқмасин
Ҳеч бир инсон зоти ҳам.
Дастурхонга дуо ўқиб,
Амир тортгач фотиҳа.
Фармон берди йигитларга,
Чолга ёрдам беришга,
Сомон тўплаб, похол йифиб,
Бир кун бошоқ теришга.
Сарак терар саркарданинг
Сон-саноқсиз жангчиси.
Хашагини чархоб қилиб,
Дон-дунларин янчишиб.
Қоплаб арпа, буғдойларни
Ҳовлисига уйдилар.
Қолган қисмин кулбасининг
Мўрконидан қуйдилар.
Ҳашарчилар ҳордиқ олиб
Туриб тонг-ла саҳарда,
Отни миниб йўлга тушди,
Табриз сари сафарга.
Фалак чархи айланаб денг,
Ойлар, йиллар ўтибди.
Араарат-у, Арпалини
От дупури тутибди.
Темур чолни йўқлатибди

Ҳол-аҳволин билгани.
Үтган галги қўмочидан
Татиб, суҳбат қилгани.
Кўш чопар йўрғалатди
Овул сари отини.
Йўлатмади чорбоғига
Чолнинг очқўз хотини.
Улар шу пайт ёдга солди,
Бошоқ терган жойларни.
Қўмоч билан аталани,
Хулво қўшган чойларни...
Чопарларни қарғай-қарғай
Етмиш ёшли “нозанин”,
Кириб кетди ҳовлисига,
Тамбалаб дарвозани,
Қолдимикан эҳ, ажабо
Чол кўзин шира боғлаб.
Таваккал, — деб ҳукмдорнинг
Ўзи борди сўроқлаб.
Чолнинг бурни осмон қадар,
Нимадандир домангир.
Ўдағайлаб чиқиб келди,
Кўш набира давангир.
Амир Темур ғазаб отин,
Босолмади ҳовурин
Кулин кўкка совуртирди,
Очқўз чолнинг овулин...

* * *

Саакяннинг сўзларидан
Сеҳрланиб, сирланиб,
Раҳмат айтдик бизлар унга
Лол қолиб, таъсирланиб.

* * *

Түнғизтоғ ҳам ҳикоятдан
Тош қотиб қолди роса.
Бу ёғига энди Сизлар
Чиқаргайсиз хулоса...

НАФАРМОН СУТ ҲАНГОМАСИ *(Рассом Толибжон Қаноатовга бағишилайман)*

Бундан ўн тўрт йил аввал,
Бўстонлиқда авжи ёз.
Табиатни олқишилаб,
Кушлар айтар сарафroz.
Носир, Руслан, Убайдулло,
Толиб ака бош бўлиб.
Хизмат билан келишган,
Ҳамкор-у, сирдош бўлиб,
Болалар оромгоҳин,
Мавсумга созлаш керак.
Тўртта рассом тўрт ёқдан,
Уни жиҳозлаш керак.
Мой бўёғу — ранг билан,
Боғлиқ бизнинг ҳангома.
Қилқаламлар ишга шай,
Ва кийилди коржома.
Тўрт челакка бўёқлар
Қориштириб чийланди.
Бўлтаклари эзғиланиб,
Қилчўткада ийланди.
Бир пақирда сарик ранг,
Бирида кўк товланар.
Қизил бўёқ мисоли,
Куёшдай оловланар.
Шу аснода рассомлар,
Ўз фамини ейишиб,
Челакдаги бўёқлар,

Бир оз тинсин дейишиб,
Думбул кўмиб қуврайнинг,
Лахча чўғли қўрига,
Тамадди қилмоқ учун,
Тўпландилар сўрига.
Суҳбат ҳам қизиб кетди,
Чой баҳона ўтириб.
Гурунглашар касбдошлар,
Гап қумfonдай кўпириб.
Авжи чошгоҳ, Бўстонлик,
Нур қўйнида ярақлар.
Сайҳонликдан сас келди,
Недир бирдан тарақлаб.
Толиб ака ўгирилиб,
Сой тарафга қараса,
Бебош сигирнинг иши,
Зап ўзига яраша.
— Хўш! Хўш! — дея улфатлар
Етди унинг қошига.
Қизил рангли челакни
Мол кийганди бошига.
Рассомлар-чи лол, ҳайрон,
Қиёсга сифмас таққос.
Пақирдаги бўёқни,
Ичиб қўйибди паққос.
Абдурасул чўпоннинг
Нафси ёмон молини
Меҳмонлар ҳайдар, аммо...
Ҳис қилинг аҳволини...
“Ҳали иш бошланмасдан,
Бир кор-ҳол бўлиб қолса.
Эски таниш чўпоннинг
Сигири ўлиб қолса”...
Ана шу ўй, васваса,
Ташвишга солиб қўиди,
Шаҳарлик меҳмонларнинг

Оромин олиб қўйди.
Шундай қилиб азизлар,
Шуқуҳли тонг ҳам отди.
Саҳархез майна, булбул,
Меҳмонларни уйғотди.
Толиб ака андармон,
Юраги фаш, бош гаранг.
Шу пайт чўпон: — Уста, — дер.
— Мана бу сутга қаранг.
Мунозара бошланди,
Шундоқ қўшни йўлакда.
Худди олма гулидай,
Нафармон сут челакда.
Ажабланманг сира ҳам
Идроки зўр ўқувчим.
Бу воқеа сирини,
Сизга айтмоқлик бурчим.

* * *

Асал қўшиб тайёрлар,
Нодир бўёқ — рангларни,
Рассомлиқдан бехабар,
Одам буни англарми?..

УСТОЗЛАРГА

Суҳбат кетса аҳли қалам,
Шеърга доир
Кўз ўнгимдан ўтар дойим
Учта шоир

Шеъриятда уч устознинг
Ўз ўрни бор.
Кудрат Ҳикмат, Султон Жўра,
Зафар Диёр.

Шубҳа қилсанг китобхондан
Ўзинг сўра:
— Зафар Диёр, Кудрат Ҳикмат
Султон Жўра.

Шеър, эртаги, достонлари
Билмас сарҳад.
Султон Жўра, Зафар Диёр,
Кудрат Ҳикмат.

Уч устознинг ёзганлари,
Болга татир.
Бири Султон, бири Зафар,
Кудратлидир.

ЎГЛИМ МУРОДЖОНГА ТИЛАГИМ

Эр йигитнинг қалби ҳар дам —
Чўғли бўлсин.
Пок ниятли, комил инсон,
Тўғри бўлсин.
Эътиқодли, умри узун —
Ризқи фузун
Ҳар банданинг диёнатли,
Ўғли бўлсин...

ҚАРОҒИМ ЎШ

Қайда юрмай, қаён турмай,
Нигоҳим узра пайдосан.
Бароқўҳсан, дилбар, шўхсан,
Хазин Оқбура дарёсан —
Қарофим Ўш, ҷарофим Ўш!
Чарос қори, Қамбарнисо,
Самарбону, Ҳувайдосан.
Шоир Маҳжур каби содик

Бир умр ошиқу шайдосан.
Бобур Мирзо тавоф қилган,
Фаройиб, қутлуғ маъвосан —
Қарофим Ўш, чарофим Ўш!
Миллатимнинг фуур, фахри
Якто Ҳабиб Абдуллосан.
Сен — Иброҳим Ҳамробоев,
Ўзинг Иззатли Султонсан.
Таърифингни ёзар бўлсам,
Қайнаган чашма, вулқонсан!
Қарофим Ўш, чарофим Ўш!
Мен бағрингда камол топдим,
Арзир меҳринг учун ёнсам.
Сен — Шавкатнинг ҳасрат, дарди,
Юракдан чиққан оҳсан.
Икки элнинг онахони —
Курмонжонсан — Додхоҳсан.
Қарофим Ўш, чарофим Ўш!

ҚУШЛАР ТАБРИГИ

(Шоир Анвар Обиджоннинг 60 ёшга тўлиши
муносабати билан)

Кувнаб булбул илҳомидан,
Асал тотиб гул жомидан,
Аввал қаламга тушмаган
Паррандаларнинг номидан,
Довот қилиб Оқкуш патин
Ёздин атай қутлов хатин.
...Қондиргани ташналарни,
Обод қилдик чашмаларни.
Зарғалдоғлар сайраб кетди.
Гүё олам яйраб кетди.
Улор Сочни имлар эди,
Ихлос қўйиб тинглар эди.

Шу зайлда тўплаб барин
Ўқир “Булбул чўпчаклари”н.
Ажиб эртак, тиниб қолдик,
Кўп сирларни билиб олдик.
Булоқбўйи манзил — пакка
Беданага, Синчалакка
“Ботирвойнинг кундалиги”н
Ифодали ўқир якка.
Кушлар асли кўп уйликдир,
— Биз ҳам бир оз чўқийлик, — дер
“Мешполвоннинг жангномаси”н
“Аламазон ҳангомаси”н
Анча қалтис чоғларда ҳам
Етган овул, тоғларга ҳам
Яширмоқнинг ҳожати йўқ.
Ибрат бўлган зоғларга ҳам
Життирлали¹ сергап Жўр²та,
Дер, — “Салом хат” жуда зўр-да!
Бир-биридан турфа, ҳар хил,
Фалсафа қурч, тагдор, сархил.
Кувнаб “Булбул чўпчаги”дан
Маъно уқиб кўп тагидан.
Кумрилар лол, ҳайрон қолди
Чиқиб шувоқ, чўп тагидан.
Чил, Қирғовул, Тўвдоқ, Читтак.
Тинглар ҳадик олмай қиттак.
Головут³ билан Фургулдай⁴,
Эртакни уқиб Булбулдан
Жар солар тоғу тошларга,
Инсоф тилаб ёшларга.
Чагалай каби қўнимсиз
Қайрилма қалам қошларга
Анвар бобо!
Биз томонда китобхонлик,
Ана шундай ўтар жонлик
Чақмоқ чақсин товонингиз,

“Шкафчангиз” — жавонингиз.
Китобларга тўлаверсин,
Ҳурматингиз биз яшаган
Тоғдек юксак бўлаверсин.
Ўн ўғил-қиз ўрни бошқа,
Кўпайишин бошма-бошга,
Набиралар хўп ажойиб,
Ким қаламдан кетган бойиб?..
Турфа қушлар табригини
Ёзиб олган Адашбоев.

^{1,2} Житирлали — Жўр — тоғ қушлари
^{3,4} Гуловут, Фургулдай — тоғ қушлари

ИБРАТ

(*Биринчи халқаро шарҳловчи, овулдош оғам*
Жумабой Мўминовга)

Қаҳатчилик эди у кезда,
Қўноқ гўжа, тариқ нон ердик.
Зогоранинг қадри ўтганда
Тегирмончи бўламан дердик...

Тахчил эди “ойнаи жаҳон”,
Бир овулга битта етарди.
Гузардаги шинам чойхона,
Жуда гавжум бўлиб кетарди.

Қалдирғочдек тизилиб олиб,
Мультфильмлар кўриб тинардик.
“Оламда нима гап” бўлган чоф,
Мўминовга тақлид қиласардик.

Дарс сўнггида Ҳамдамов домла,
Уқтиради, — укалар, демак.

Ўз йўлингни топмоқчи бўлсанг,
Жумабойдай ўқишинг керак.

Муаллимнинг юрак сўзлари,
Йўлимиизни нурдек ёритган.
Ҳалол меҳнат, холис ниятлар.
Мўъжизадай, йўқни бор этган.

Сўнг, мурувват нелигин асли,
Устоз Миртемирда кўргандим.
Шогирдга меҳрни, жўралар,
Мен Кудрат Ҳикматдан ўргандим.

Ибрат бўлгач, шундай оғалар,
Шукronа айтмоқقا қодирман.
Фарзандларим инсофли, оқил,
Эл қатори яшаётирман.

ТАНДИРЧИ

(Устоз Турсали Жалиловни хотирлаб)

Ўсмирлик, ёзги таътил ёдга тушар,
Гап кетса, Ҳазратишоҳ борасида.
Бу гўша, қутлуг макон ўрин олган,
Бўзбу билан Ўнгор тоф орасидан.

Саратон, сувхон ўрик авжи пишган,
Қимизак олмадан қўзинг яшнайди.
Соз тупроқ лойини Абжалил бобо,
Хамирдай қоради, эшиб ташлайди.

Кўйининг тивитларин Турдали акам,
Сомондай сепади — хамиртуришга.
Бобонинг қўлида ўйнар тахтакач,
Тандирни айланиб, кирар хурушга.

Пешинни ўқигач, Абжалил бобо,
Лўвак лойни ўтказади кўрикдан.
Бу орада кўзин қилиб шамғалат,
Маза қилиб еймиз сувхон ўриқдан.

Эшакка қўм ургач, буёғи тайин,
Четан аравада тупроқ ташилар.
Сўнг, бизга бош бўлиб Турдали акам,
Шаршарага чўмилгани шошилар.

Комил инсон, дилбар муаллим оғам,
Ўргангандарин ташвишин ерди,
— Отамнинг касбини унутсам, укам,
Қорним насибага тўймайди, — дерди...

САФАР БИЛАН...

Олтмишинчи йилнинг авжи кузагида,
Дўрмон деган қароргоҳнинг ўзагида.
Пойга қўйдик, зоти чопқир ўзади-да,
Ҳар қандайин чориқлар ҳам тўзадида?
Мушкул йўлда ҳамроҳ бўлгач Сафар¹ билан.

Писанд қилмай ўтдик довон, қияларни,
Ел учирди қамроқларни, чияларни,
Четга суриб қирчангани, бияларни,
Чавандозлар кўпкарида уяларми?!.
Тўсиқлардан дадил ўтдик, зафар билан.

Етимликнинг изтиробин, доғин тотдик,
Ўксимадик, талабалик чоғин тотдик.
Сўз оламин кеза-кеза тоғин тотдик,
Дилтанг кезда анча-мунча чоғир тортдик,
Бу оламга боқдик очиқ назар билан.

Зафар, Диёр, Кудрат Ҳикмат² байроқ бўлди.
Машқларимиз тасвир, рангга бойроқ бўлди.
Ҳаёт тарзи гоҳ сокин, гоҳ қайноқ бўлди.
Давр — қалам чархлагувчи қайроқ бўлди,
Кудуқ қаздик зер билан забар билан.

Қинғир йўлдан, адоватдан олис турдик,
Тарафкашга қўшилмадик, холис турдик,
Мужмал гапни дангал сўзга алиштиридик,
Шеърни янги ташбеҳ билан қориштиридик,
Дўст тутиниб кам бўлмадим Сафар билан.

¹ Болалар ёзувчиси Сафар Барноев назарда тутилмоқда.

² Атоқли болалар шоирлари.

КЎПНИ КЎРДИК

(Шоир Сафар Барноевга жавоб)

Олтмишга чиққунча кўп ишни кўрдик, биродар,
Ўттиз баҳор, ўттиз қишини кўрдик баробар.
Бу фалакнинг чархиидир, тегирмон навбат билан
“Ёз-ёз”ни, “Боз-боз”ни қанча “миш-миш”ни
кўрдик, додар.

“Оқ йўлни олиб” тинчиб кетди қанча қаламкаш,
Айб кимда, боқмаса илҳом париси қаламқош?
Гар шеъри босилмаса дўсти нодон биздан аламкаш,
На у ёқда, на бу ёқда бор сарсон-саросар.

Кўрдик садоқатда тенгсиз Зулфия опани,
Улуг Миртемирни,Faфур акадай чапани
Бемор чоғда ҳам тинч қўймадик Асқад акани,
Бу каби ков-ковларга ҳатто фил қилмас бовар.

Бир акам олтмиш китоб чиқарди аён сенга,
Мазмунини ўлчасанг, холи хароб аттангга,
Қудрат Ҳикмат шеърларининг олдидага у бир танга,
Улар ношири қисир қилиб, ҳомийни соғар.

Наҳот фарқлай олмасак атласдан оддий бўзни,
Қадрига қачон етамиз диёнат деган сўзни?
Иблис ва шайтонлардан эҳтиёт қилгин ўзни
Башарти чоғар бўзласа кўнгил бўшдир, биродар...

РАВИЛ АЛБЕКОВНИНГ ХАЗИНАСИ

Қирқ йиллик фото — тасма
Бор бойлиги — топингани.
Уч хонали уйдан бошқа,
Йўқдир унинг оширгани.

Ленталарда аксин топган,
Ўзбекистон солномаси.
Бунга далил “Тонг юлдузи”,
“Гулхан”, “Фунча” ойномаси.

Турфа, гўзал тасвирларга
Тенг келмагай дур, марварид.
Имкони йўқ, шу сабабдан,
Олтин, кумуш қилмас харид.

Боқар бизга эҳтирос-ла,
Бургут келбат устоз Ойбек.
Faфур Fулом ва Миртемир,
Ҳам Зулфия опам ойдек.

Муҳрланган Асқад Мухтор,
Шайзода, Қаҳҳор яшар.
Ана, Куддус Муҳаммадий,
Қудрат Ҳикмат суҳбатлашар.

Бу тенги йўқ хазинадан.
Ўрин олган буюк зотлар.
Зар, забаржад сақлагандай,
Равил Албек эҳтиётлар.

Сўнгги пайтда бир хавотир
Унга тинчлик бермаётир.
Хазинага энг муносиб
Дарё дилни излаётир.

ЗУМРАША

Ултарманинг беданасин
Ўта хушкор сайраши бор,
— Бит-билдиқ, — деб жўр бўлар
Унаг қўшним мулла Сардор.

Миттигина жониворнинг
Ва-ваглашин қаранг энди.
Шу қушчанинг нағмасидан
Хаёл чил-чил — таранг энди.

Хапдоридан каппа отиб,
Чойдан ютгач фўлтиллатиб.
Беданадан хабар олгин,
Ҳой, қайдасан, Абдулатиф?

— Лаббай бобо!
— Янгилаб қўй
Күшнинг сувдон, хўрагини,
Акангга айт, қўйга қараб,
Терсин кана — жўлагини.

Топшириқни уддалайди
Набираси қойиллатиб.
Бобо хушнуд дуо қилас;
— Балли, ўғлим, Абдулатиф.

Шўх бўлса ҳам яхши ўқир,
Ҳар соҳада билгир чиқди.
Кўз тегмасин зумрашага,
Анча зийрак, дилгир чиқди.

Кенжатойни синаш учун
Савол берар қалаштириб.
Жавоблари қисқа, лўнда,
Чучук тилга яраштириб.

— Пеле, Яшин, Марадонна,
Футболчилар сараси-да.
Ва Миржалол Қосимов бор,
Ана шулар орасида.

— Елкаси ер искамаган
Айт-чи, болам, қайси полвон?
— Амир Темур совриндори,
Эралидир марду-майдон.

— Жаҳон аҳлини лол қолдирган
Яна қайси чемпион бор?
— Уми, Акбар Қурбоновдир,
Ота ўғли, довқалб сардор.

— Балли, полвон, шахматдан-чи?
Сўрар бобо чойга қониб.
— Шахматданми, ҳозир бизда,
Машхур Рустам Қосимжонов.

— Қойил, ўғлим, бугун жуда
Кўнглим тоғдек кўтарилди.
Энг охирги саволимга
Дангаль жавоб айтгин энди.

Беҳудага санқиб юрмай
Китобга ҳам қўйдинг ихлос,
Бурро-бурро сўзлаб, ўғлим,
Мени хурсанд қилдинг хўroz.

Болалиқдан ёд олгансан
Шеърларини севиб жондан:
Ҳабиб Раҳмат, Кавсарбону,
Ҳамда Анвар Обиджондан.

Ўзига хос Дилшод Ражаб,
Фикри тиниқ, яхши ёзар.
Сенга дастхат ёзиб берган,
А.Акбаров, Рустам Назар.

Ҳа, шулардан қай бири зўр,
Тўғри жавоб айтгин бироқ?
— Бобо, буни китобхонлар,
Билар мендан яхшироқ.

Бобо кулиб дейди: — Бўтам,
Олим бўлар сиёғидан.
Эркалатиб набирасин,
Чўзиб қўйди қулоғидан...

БЕШТА APPA

Рақамларнинг ёрдамида тўртта амал,
Дафтарингда ёзилгандай КАРРА бўлар.
Тегирмонда дон-дунларни тортиб кўрсанг,
Майдаланиб ун бўлар, ЗАРРА бўлар.
Ким ўзарга пойга қўйсак манзил сўнгги,
Чавандозни аниқловчи МАРРА бўлар.
Сабзавотнинг номлари ҳам турфа хилдир,
Бодирингни жайдариси ТАРРА бўлар.

Талай сўзнинг маъносини англаб етдинг,
Миршаб тутган таёқ эса ДАРРА бўлар.
Бу сўзлардан бош ҳарфини олиб қўйсак,
Дурадгорга бирмас, бешта АРРА бўлар.

ЧУМЧУҚЛАРГА УЯДИР

Ашраф ака АНОР сўйди,
Анормисан-анор дейсиз.
Ҳар донаси гавҳар мисол
Ялт-юлт этар ФАНОР дейсиз.
“Ф”ни “Қ”га алмаштиrsак,
Пахта тўла ҚАНОР бўлди.
“Н” ўрнига “Б”ни қўйсак,
Йўқ нарсадан БОР бўлди.
“Н” ҳарфини қўшган эдик,
Кўш ўркачли НОР бўлди.
Болакайлар, билиб қўйинг, —
Нор деган ТУЯдир.
“Т” ҳарфини қисқартиrsак,
Чумчуқларга УЯдир.

ФАРҚИ БИТТА ҲАРФДА

БОЛ деганда тамшангайсиз чорасиз,
Битта ҳарфдан камайтириб борасиз.
“Ол” сўзини эшигандан мезбондан,
Сўнг асалдан нонга суртиб оласиз.
“О” ҳарфини алмаштиrsак “Ё” билан,
Тулпор — тойга у елпигич “ЁЛ” бўлар.
“Ч”ни қўшсак тўқсон ёшлик “ЧОЛ” бўлар.
Алмаштиrsак агар “Д”га тўсатдан,
Тўқсон ёшлик бобом қадди “ДОЛ” бўлар.
Тўғри келса, “Х” ҳарфини қўллашга,
Холиданинг ёноғида “ХОЛ” бўлар.

* * *

Жуда бойдир тилларимиз, сўзимиз,
Энди давом этдирамиз ўзимиз.
БУЛОҚ доим тупроқни энчилаган.
УЛОҚ эса шўх жонивор, тинчимаган.
ОҚ аслида ризқ-рўзимиз ун ва сутдир.
Ёки момиқ пахтадир, — уст-бош қутдир.

* * *

Зийрак, зукко болажонлар,
Ўйлаб кўринг-чи бир оз.
Навбатдаги саккиз жумбоқ,
Сизлар учун қулай, мос.
“ҚАЙИҚ”, “ҚАЛҚОН”, “ҲАККА”, “ЛОЛА”,
“ТҮРА”, “АНОР”, “АРИ”, “ЧАНА”.
Битта ҳарфни алмаштириб,
Ўзга бир сўз топинг яна...

НЕЧТА ШАЛПАНГ ҚУЛОФИ?!

Умаржоннинг тўрут қўзиси,
Улоклари бор эди.
Ва уларнинг ўн саккизта
Кулоқлари бор эди.
Чорвасининг сон-саноғи,
Чиқиб қолиб ёдидан.
Ўйинқароқ Умаржон
Сўраб юраги Шодидан.
Қани ўйланг, ҳар бирининг
Тўрттадан-ку туёғи.
Демак, унда улоқларнинг
Нечта шалпанг қулоғи?..

МАЙМУННИНГ ШУКРОНАСИ

Еру қўкка ишонмасдан,
Кўзининг оқ-қорасини.
Она маймун ювинтирап,
Шум кенжатой боласини.
Совун суркаб,
Сувдан пуркаб,
Эркалатиб силаб-сийпаб,
Дилда борин аён этди.
Елкасини ишқар экан,
Мақсадини баён этди;
— Минг бир қуллук, қуёш нурин,
Оlamга teng таратганга.
Минг бор шукр, бизни эса,
Маймун қилиб яратганга.
— Шукронангиз нима ахир?
Сўроқлади бола фақир.
— Типратикон бўлсанг агар,
Бўтам, нима қиласр эдим
Игна босган елкангни мен,
Қандай ювиб, силар эдим...
2004.

ОЛАҚАНОТНИНГ ПОЛАПОНЛАРИГА НАСИҲАТЛАРИ

1

Насибанг боғу роғда,
Азизим, палапоним.
Лочинлар ҳам лол қолсин,
Жонингга пайванд жоним.

Бургутлардай ёвқур бўл!
Барча гап аҳилликда.

Пайтин топиб, бехосдан,
Үлжангга ташлан тикка!

Қораялоқ, Қарқунок,
Қарға билан Ҳаккалар —
Улар ўғри, инидан,
Кувиб чиқинг яккалаб.

Ўжарлик, муттаҳамлик,
Фақат бизга ярашар.
Буни айни замонда,
Ботирлик деб санашар.

Мевазор боғни кўриб,
Кўзинглар тўрт бўлади.
Олмурутни чўқиманг,
Бандлари мўрт бўлади.

2

Татиб кўринг майлига,
Меванинг ҳар хилини.
Танлаб енглар илтимос,
Энг ширин, сархилини.

Чилги билан узумни,
Шингилида қолдирманг.
Гилос, хурмо, нокларни,
Чумчуқларга олдирманг.

Олғирларнинг ҳамиша,
Олчи турар ошиғи.
Бўлманг асло қушларнинг,
Сиз ялама қошиғи.

Олақанот дейдилар,
Ота-бобонг отини.

Үтиргагин, болажон,
Мусичадай тортиниб...

ҮҚИТУВЧИМ

“Алифбе”дан ўрин олган,
Бир кам ўттиз ҳарфларни,
“Алла”, “Анор”, “Баҳор”, “Байроқ” —
Каби оддий гапларни
— Ўргатган ким?
— Ўқитувчим.

Содда, зийрак, бир оз шўхмиз,
Қизиқувчан, серталаб.
“Ло-ла”, “Ош-о-л” сўзларини,
Тоқат билан эркалаб
— Ёздирган ким?
— Ўқитувчим.

Ҳарф танитиб, бурро қилган,
Анварни, Санобарни.
— Ким ўргатган карраларни,
Тўрт амал, баробарни?
Айт-чи, Азим!
— Ўқитувчим.

Китобни шар, ўқир Ҳулкар,
Рости гап ишонмадик.
Биз “Алифбе” байрамини
Жуда зўр нишонладик.
— Устозинг ким?
— Ўқитувчим.

Доим шаймиз: — Лаббай, — деб
Устозлар хитобига.
Болажонлар навбат келди,

Энди “Ўқиши китоби”га.

— Ўргатар ким?

— Ўқитувчим.

КЎПКАРИ

(Улугбек Абдусаломовга)

Кўпкарига мосланган чофи,
Арслонбобнинг машҳур Чорбоги.
Томошабин учун қулай, зўр,
Қир ва адир, япасқи тоғи.

Сўқмоқ йўлдан шошиб келмоқда,
Қари-қартанг, ёшу яланглар.
Бир яшарлик серка ташланди.
Майдон ичра ана қаранглар.

Авжга минар сур-ҳо, сур-ҳолар,
Қиличдайин ўйнар қамчилар.
Тулпорларнинг ягринларидан
Шаррос-шаррос терлар томчилар.

Кўпкарида фаройиб тартиб,
Кимки фирром билиниб қолар.
Эгар оғиб, гоҳ оёғидан,
Узангига илиниб қолар.

Қора байир учар қуюндай,
Эргаш полвон борар тақимлаб.
Отни қучар, давра айланиб,
Манзил сари келгач яқинлаб.

Ҳакам холис, синчилар зукко,
Бедов эса сапчийди кишнаб.

Улоқни у қүш қўллаб ташлар,
Чунки, олган қамчинни тишлиб.

Кувнар тутга минган болалар,
Кўпкарининг хўп завқи борда.
Улгурмайин қарсак чалишга
Гуппа-гуппа йиқилар қорга.

ШУНҚОР БЎЛСА

Қамбар бобо чавкар отин,
Емлаб қараб,
Ёлин тараб,
Чўмилтириб,
Тушунтирас Ўшдан келган
Ҳошимжонга,
Қосимжонга:

— Бу қуюшқон, унга афзal
Ўмудлурук.

— Буниси-чи, белбоғ эмас,

— Босма айил,

Яша, қойил!

Кумуш юган, сувлуққа мос
Бирлашади.

Тизгин эса бедов билан

Сирлашади.

Бу узанги-поғонали

Пиллапоя.

Отга минсанг, ўта қулай

Зинапоя.

Гилам — ёпқич, тахти — равон,
Эгар дерлар.

Фирқўқдайин тулпор бўлса,
Шунқор бўлса,

Чавандознинг боши кўкка

Тегар дерлар.

...Қамбар бобо ўз сұхбатин
Тиндириб.
Набиралар билмаганин,
Билдириб.
Икковини чавкарига
Миндириб.
Қарчайға қамчи урди,
Елдириб...

КАМАЛАК

Чодир тикиб улгурмасдан,
Жала қуиди гүё қасдан.
Югурдик-эй, югурдик.
Ташлаб ирғай таёқни,
Күлга олиб оёқни,
Форға зёрға улгурдик.
Лола ёмғир рақсида,
Зоир тогам маҳсида,
Кавушини унутган.
Күттарғанча киғтида,
Синчалак фор шиғтида
Товушини унутган.
Фордан пастға бир қара,
Ҳар жилғадан шаршара,
Сойға қараб юкунар.
Қийғир учса гоҳи дам,
Хандон писта шохидан,
Марваридлар түқилар.
Тинди олашовутлар,
Турмакланиб булутлар.
Үрин олди тахмондан.
Носир айтар, — Асли бу,
Қўзилатиш фасли бу,
Омон ўтсин сақмондан¹
Оlam бирдан ёришиб,

Фор ҳам нурга қоришиб,
Күёш зар сочиб турар.
Фасллар эркасида,
Осмоннинг елкасида,
Турфа ранг сочиқ турар.

¹ Сақмон — қўзилатиш даври яхши ўтишига ишора.

ЎЛАНБУЛОҚ

“Ўланбулоқ, ўланингни
Суяр бўлдим.
Кавсар сувдан саночимга
Куяр бўлдим...”
Қирғиз халқ қўшиғидан.

Собит айтар: — Етиб келдик.
Дўстлар, Ўланбулоқقا.
Сергак тортиб, аланглаймиз.
Қараб уёқ-буёқча.
Ўнта булоқ, ўнта чашма
Шиқирлаб қўшиқ айтар.
Ҳасратини, дардларини,
Биқирлаб, жўшиб айтар.
Уни англаб, етолмайди
Бу ердан ўтган барча.
Ўз-ўзидан олов чиқиб,
Ёнарди кекса арча.
Кийикўтнинг ифорига,
Тўлиб-тошган қучоги.
Мен-чи, Ўланбулоқ билан
Суҳбатлашдим тонг чоғи.
— Қониб ичгин ва лекин,
Ифлос қилма, булғама.
— Қайнаб тургин ҳамиша,

Сўниб қолма, қурғама.
Покизалик, беғуборлик
Фақат сенга ярашган.
Ой чўмилиб қўйнингда,
Юлдуз аксин талашган.
Азим тоғлар қўриқчидир,
Киприқдайин йўланган.
Ёмон кўздан тангрим асраб,
Айро тушма ўландан...

КЎРГАЗМАДА

Болалар ижодига,
Аталган кўргазмани
Томоша қилдик бориб,
Мен, Ботир, Абдуғани.

...Кеч куз. Боғда болалар,
Олма терар этаклаб.
Наргиз қайтар боғчадан
Укасини етаклаб.

Бир суратда турналар,
Фозлар учиб боришар.
Қалдирғочлар қанотин
Созлаб учиб боришар.

Навбатдаги тасвирда,
Мушук пойлар ўлжасин.
Она товуқ лочиндан,
Қўриқлайди жўжасин.

Баланд тоғлар, чўққилар.
Куёшни, ойни ўпган.
Бу ердаги асарлар.
Боладай қувноқ, ўқтам.

Бир қора палатнода,
Тишлар турар оқариб.
Тепасида түртта күз.
Олазарак боқади?!.

Тушунмай қайта боқсак,
Шархлади уни Ботир:
— Йкки негр кечаси,
Күмир ўғирлаётир...
2004.

ТОЛДИБУЛОҚ (*Курбон Сатторга*)

Түргай ётар тухум босиб,
Шувоқ билан сирлашиб.
Қора қүнғиз соққа ўйнаб,
Дүнгга туртар тирмашиб.

Юмронқозиқ серҳадик,
Иш битирар югуриб.
Суғур арча остида,
Туар тасбеҳ ўгириб.

Чигирткалар қамишдан.
Най ясади — кертади.
Кўкандаги бияга,
Сўна дутор чертади.

Тинмас Толдибулоқ ҳам,
Майнанинг завқи жўшган.
Норхол момо ертандирда,
Пиширар сингти пўшкан¹...

¹ Пўшкан — Арслонбобликларнинг таоми.

ОЛТИН БОШИ ТОШДАН БҮЛСИН

(Устоз Носир оғага)

Улкан адіб,
Носир Фозил
Саксон ёшга,
Чиқди ҳозир.
Кувноқ инсон,
Шогирдпарвар
Үз сүзига
Собит сарвар.
Оқибатли,
Бағри кенгдир.
Холис ростгүй,
Тенгга тенгдир.
Китоблари
Сафда қатор
“Ирмоқ”, “Оқим”,
“Қорхат”, “Дийдор”,
“Саратон”ни,
Ёзганда ҳам.
Минг түлғаниб,
Озганда ҳам
“Бир отарли
Күлда наган”,
Занглаш қайда?!

Сарғаймаган...
Зёр таржимон,
Закий, заргар.
Ҳозиржавоб
Дилгир, дангал.
Миртемирдай
Кенг феъл, ҳар чоқ.
Мехмон кутар,
Билмай чарчоқ.
Таълим олган,

Яссавийдан.
Давраларда,
Гапни қийган.
Сизга айтсам,
Битта сирни
У мот қылган,
Шекспирни...
Устозимиз,
Носир Фозил.
Йигитлардек.
Үктам, Фозил.
Олтин боши,
Тошдан бўлсин.
Ёши юздан
Ошган бўлсин.

“УШШОҚ”

(Созанда Тўлқин Турсуновга)

Faфур Fулом метросин,
Шундоққина йўлаги
“Ушшоқ”нинг оҳангига —
Тонгда лим-лим тўлади.

Дилни ўртар гижжакнинг
Ажабтовур нолиши.
Сезилмас одамларнинг
Ҳатто қадам олиши.

Куй сеҳридан кўнгиллар,
Бир муддатга яшнайди.
Яшил тусли филофга
Эл топганин ташлайди.

Субҳидамни шу тарзда,
“Ушшоқ” билан кутгаймиз.

Турмушнинг ташвишларин
Вақтингча унутгаймиз.

ЛАЙЛАКЛАР ҚҰНАЛҒАСИ

Уйчи билан Жийдакапа ораси
Лайлакларнинг құналғаси саналар.
Уя солған сим ёғочнинг устига,
Йүловчилар түхтаб үтар, лол қолар.

Кўп йил бўлди ўрганишиб қолишиди,
Кўркам Норин атрофларин хуш қўриб.
Аста-секин кўнишиди, мослашиди,
Нил дарёсин қиёс қилиб, туш кўриб.

Ҳар уяда қўш полапон мўлтирадар,
Чунки улар теша қанот, учолмас.
“Так-так” қилиб, қулоchlарин кенг ёзиб,
Кўксин кериб, шамолларни қучолмас.

Июл ойи, авжи жавзо—саратон,
Дош беролмай ҳансираиди полапон.
Она лайлак елпигичлар дамо-дам,
Қанотлари ажабтовур соябон.

Ота лайлак тумшуғида сув ташир,
Қушлар учун бу иш оддий холмикин?!

Уларнинг ҳам орасида тошмехр,
Оқпадари бўлармикин, бормикин?!

ҮРНИ БОРНИНГ ҚАДРИ БОР

(Сүнгги сўз)

Насрда мазмун ёдда қолади, назмда — матн.
Аждодларимиз қадим замонлардаёқ буни яхши анг-

лашган, халқ оғзаки ижодидаги мақол, матал, то-пишмоқларнинг аксарияти қоғиядош сўзлардан тузилгани бежиз эмас. Эски мактабларда эртаклар, ривоятлар, мумтоз адилларнинг маърифий, диний-ахлоқий, майший мавзудаги шеърлари, масаллари, чистонлари қаторида кичкитойлар тили, тушунчасига хос бўлган болалар айтишувларидан кенг фойдаланилганинг асосий сабаби ҳам шу.

Юртимизнинг давлат тасарруфидағи замонавий халқ таълими тизими ўтган асрнинг 20-йилларида шаклланиб, барча мактаблар учун бир хил қўлланмалар жорий этилган чоғларда, адабиёт дарсликлирини болаларга аталган содда, равон шеърлар билан бойитишга эҳтиёж кучайди. Авлоний, Ҳамза, Элбек каби зотлар бу борада фаоллик кўрса-тишса-да, уларнинг тили, ифода услуби кўпроқ ўсмирларга мос эди.

Том маънодаги болалар шеърияти бизда 30-йилларнинг ўрталари, 40-йилларнинг бошларида ўз шамойилини топди. Султон Жўра, Зафар Диёр, Шукур Саъдулла, Илёс Муслимлар бу соҳанинг илк қалдирғочлари эдилар. Уларнинг ёнига Кудус Муҳаммадий, Кудрат Ҳикмат, Толиб Йўлдош, Азиз Абдураззоқ, Дўстжон Матжон, Пўлат Мўмин, Обид Расул, Сафар Барноев, Қамбар Ота янглиғ қаламкашлар қўшила бориб, катта оқим юзага келди. Бу даврда катталар шоирларидан Ҳамид Олимжон, Асқад Мухтор,Faфур Гулом, Шуҳрат ва бошқаларнинг эртак, достон жанрида яратган асарлари болалар адабиётини янада бойитди. Кўпроқ мумтоз анъаналарга таянувчи, биринчи галда болаларнинг ақлига таъсир ўtkазишга интилувчи бу оқим бундан кейин ҳам адабиётда ўз ўрнига эга бўлиб тураверишга ҳақли. Услуб, восита бирламчи эмас, муҳими, — истеъдод, истеъдод эгаларининг қўлида ҳар қандай восита қудратга айланади.

Афсуски, истеъдодлилар ҳар куни туғилавермайди. Шу тахчиллик боис, бир тоифа адиллар болалар шеъриятини тирикчилик манбаига, осон ном қозониш қуролига айлантириб келишди. Кичкентойларга аталган газета-журналлар, бадий китоблар, дарслеклар қизил салтанатга ҳамду сано, унинг доҳийлариға таъзим, шиорбозлик, шодиёнабозлик, насиҳатбозликларга тўлиб борди. Одатда, ўқувчилар тантанабоп шеърларни сууруга чулғаниш иштиёқида ихтиёрий равишда эмас, дарсни ўзлаштириш учун ўқитувчининг топширифи билан ўқиб, ёд олиши, қалбни жўшқинлаштирадиган, ўйлантирадиган даражадаги таассуротга эга бўлолмаслиги барчамизга мазлум.

Шундай шароитда, XX асрнинг 70-йиллари бошида болалар шеъриятида бошқа бир оқим пайдо бўлди. Бу оқим гарчи мавжуд анъанадан бутунлай узоқлашиб кетолмаган бўлса-да, болаларнинг факат ақлига эмас, кўнглига ҳам таъсир ўтказиш йўлини излашга тутинди. Бу ҳол дастлаб Мирализ Аъзам ижодида кўламли тарзда намоён бўла бошлиди. Мисол тариқасида унинг беҳад нозиктабб, ҳимоясиз бир болакай ўз акасига мурожаат қилиб, агар яна ранжитса, булутга дўниб, узоқларга кетиб қолиши, йигиси ёмғирларга айланиши мумкинлиги ҳақидаги ўта мунгли шеърини эслаб ўтиш кифоядир.

Кўп ўтмай, Турсунбой Адашбоев, Султон Жаббор, Ҳабиб Раҳмат кабилар бу оқимни тўлдириб боришиди. Булар орасида Турсунбой Адашбоев ниҳоятда ўзига хослиги, қалами пишиқлиги билан ярқ этиб назарга тушди. Унинг бошқаларга ўхшамаслик томони шеърларида ўзи яшаб турган ҳудуд манзараларини, ерлик кишиларнинг шу жойга тааллуқли урф-одатларини жозибали баён этиб беришида, ўзи гувоҳ бўлган воқеалар, шахсий ке-

чинмаларини ўқувчининг қалбини тўлқинлантирадиган сатрларга айлантира олишида кўринди. Шоирнинг 60-йиллар охири, 70-йиллар бошида чиққан “Биз саёҳатчилармиз”, “Арслонбоб шаршараси” китобларида, давр тақозосига кўра, “катта оқим”га мос мазмундаги шеърлар учраса-да, кейинроқ чоп этилган “Нур дарё”, “Олатоф — лолатоф”, “Оқбура тўлқинлари”, “Орзуларим — қўш қанотим”, “Латифбойнинг лофлари” сингари тўпламларида муаллифнинг ўзлиги тобора чақнаб кўзга ташланди.

Шоирнинг ижодий йўли давомида тўлдириб келинган “Болаликка қайтаман” туркумига кирган шеърлари алоҳида диққатга сазовор. “Йўлчи юлдуз” шеърида қишлоқда ҳукм суроётган очлик, аҳолининг ёппа безгакка чалиниши, товони ёрилган болалар буғдойи ўрилган анғизларда бошоқ излаб уймаланиши, сотиб тирикчилик қилиш учун тошфонар ёргида тун бўйи белбоғ тикиб ўтирувчи касалманд она, шу онанинг сўнгги пулини олиб ўқишга отланган жулдур кийимли ўғил ҳолатлари орқали уруш фожиали ифода этилган бўлса, “Фуфайка” шеърида отасиз етимларга мактаб томонидан пахтали нимча эҳсон қилиниши, шу кунга тушганидан хўрлиги қўзиб, ўзига навбат келишини кутмасдан, уйига қараб юргурган, борибоқ онасининг бағрига отилган ёш ўқувчининг ички фарёди хазин сатрларда очиб берилган.

Собиқ тузум даврида бунақа шеърларга олакўзланиб қарашарди. Шундан келиб чиқиб, “катта оқим”нинг нуфузли оқсоқоллари янгича интилишларни кўрмаганга олишди. Қолаверса, янгича қарашларни рағбатлантириш ўзларининг инқирозини тан олишдек бўлиб туюлди. Бу янглиф эътиборсизлик, оқибатсизлик туфайли Мирализ Аъзамнинг кўнгли болаларга ёзишдан совиб боргани,

Турсунбой Адашбоев пойтахтдан олисда яшаб, адабий жараённинг доимо ичида бўлиш, иқтидорини тўлиқ намойиш этиш имкониятидан маҳрумлiği, ўзга сафдошлар ҳам етарлича фаоллик кўрсата олишмагани натижасида ушбу интилишлар замона мунаққидларининг эътиборини деярли жалб этмади, муносиб баҳоланмади. Шунга қарамай, кичкинтойлар шеъриятида сезиларли даражада бурилиш ясаган 70-йиллар мактаби оддий шеърхонлар хотирасида ўз бастини сақлаб қола олди ва ҳеч иккиланмай айтиш мумкинки, Турсунбой Адашбоев шу бинонинг асосий устунларидан бири сифатида салобатли ўрнини ҳануз мустаҳкам эгаллаб турибди.

Ҳаёт тараққиётдан иборат, 80-йилларнинг бошида ўзбек болалар адабиётида жаҳон уммони сари янада жўшиб интила бошлаган ўзгача бир оқим вужудга келди. Бу оқим вакилларининг мақсади болаларнинг ақлидан кўра кўнглига кўпроқ таъсир ўтказишигина эмас, ўйноқи сўзлар, гўзал иборалар, ёниқ туйгулар, тагдор ташбеҳларга йўғрилган сатрлар ёрдамида шеъриятни кичкинтойларнинг севимли ўйинчоги даражасидаги эҳтиёжига айлантириш, ўзликни таниш, бобомерос юргига эгалик ҳиссини уйғотиш каби ўта жиддий масалаларни уларнинг онгига қувноқлик замирида сингдиришга эришмоқликка қаратилган эди.

Табиийки, қолипли замонга, “катта оқим”дагиларга бу йўналиш баттарроқ ёт қўринди. Аммо Янги оқим аввалига Ҳамза Имонбердиев, Абдураҳмон Ақбар, Кавсар Турдиева, Рустам Назар, Зафар Исомиддин, Маъмур Қаҳҳор, кейинроқ Дилшод Ражаб, Эрпўлат Бахт, Содиқжон Иноятов, Худойберди Комилов, Неъмат Душаев сингари ёшлар ҳисобига тез куч йиға боргани боис, тўғонлар бас келолмай қолди. Юртимиз муста-

қилликка эришганидан сўнг эса бор жилосини баралла намойиш этишга тушди.

Теварагимиздаги жонзотлар, ўсимликлар, рўзгор буюмлари, иш қуроллари кабиларни қизиқ ҳолатлар, қисқагина сатрлар орқали янада яқинроқдан танишимизга кўмаклашуви, борликқа меҳр билан муносабатда бўлишга чорловчи янгича оҳангдаги шеърлар жажжи китобхонларнигина эмас, уларнинг ота-оналари, мураббийларини ҳам ўзига ром эта бошлагач, “катта оқим”нинг баъзи вакиллари энди шу томонга юзланиб, бири турли касб-хунарлар тўғрисида, бошқаси кичкитойлар ҳаётидан олинган кўча латифалари асосида шеърлар дастасини маромига етказа олмади. Бунинг сири оддий эди — Адашбоев янги оқимга дастлабки пайтларданоқ хайриҳоҳлик билан қаради, синчиклаб кузатди, ўз услубидан воз кечмаган, қадрдон ўзанидан ортиқча узоқлашмаган тарзда янгиликка оқилона ёндашишнинг йўлини топди.

Биргина «Сумалак» шеърини олсак, ўзидаги манзара чизиш маҳоратини янги оқим шоирларига хос қувноқлик. лўндалик билан устомонларча уйғунлартира олганини кўрамиз:

*Бойчечаклар ниши уриб,
То тургунча ўрнидан.
Баҳор қишини тарновга
Осиб қўйди бурнидан...*

Айримларга ўхшаб янгиликка шоша-пиша, чи-
раниб, пала-партиш тарзда эргашмагани, пухта ҳозирланиб иш кўргани сабабли Турсунбой Адаш-
боев 90-йилларга келиб кенжа авлод қаламкашла-
рига “ўз уясида” туриб ҳам жўровоз бўла олди,
дилтортар мавзулардаги шеърлари сонини кескин
кўпайтириб, туркумларга жамлаб (айниқса, “Ор-

зуларим — қўш қанотим” китобида), янги асрда ўз ихлосмандларига салмоқли-салмоқли китобларини тақдим этди. Буни “иккинчи парвоз” десак, балки тўғри бўлар.

Шоирнинг кейинги асарлари хусусида гапирганда, “Латифбойнинг лофлари” туркуми устида тўхтамасликнинг иложи йўқ. Лоф халқимиз орасида кенг тарқалган суюкли ҳангомалар сирасига киради. Турсунбой Адашбоев шу мавзуда болалар тушунчасига мосланган қатор шеърлар яратди. “Юган солиб, эгар уриб” шеъри:

*Кулоқ солинг Латифбойнинг
Яна битта эртагига.
Юган солиб, эгар уриб
Чигиртканинг эркагига,
Қамишлардан найза ясад,
Отқулоқдан қалқон қилиб...*

деган бўрттирма сатрлар билан бошланса, “Барчали ёдимда” шеърида ҳали туғилмаган вақтидаёқ бобосининг йилқисини боқиб юргани, отни тошга қозиқ қоқиб боғлагани, от барибир қочиб кетгани, қуёш сира ботмайдиган, булутлар бўлмаса ҳам дўл ёғаверадиган кунларда уни қидириб бориб, эндинга дунёга келган қулуни билан бирга бироннинг томидан топгани, от юравермагач, уни қулунга ортиб, орқага қайтгани лофланади. Бундай шеърлар шоирнинг китобларида беҳисоб, улар ўзбек болалар адабиёти хазинасидан муносиб жой олган.

Бир шоир бошқа шоир ҳақида билганича гапиради. Чумчуқ сўйса ҳам қассоб сўйсин, деганларидек Навоий вилоят университети ўқитувчиси Бахшулло Ашурев Адашбоев ижодидан номзодлик диссертацияси ёқлагани, шоирнинг болалар

адабиётидаги ўрнини атрофлича шарҳлаб беришга жазм этгани, бу соҳада мунаққидлар камайиб бораётган бир паллада, қувончли ҳол бўлди.

Болалар адабиётшунослиги янгидан-янги иқтидорлар билан бойиб бораверишини истардик. Бинобарин, болалар адабиётига катта меҳнати сингганига қарамай, ижоди ҳали мутлақо ўрганилмаган ёшлар талайгина. Бу жабҳадаги ҳар бир адабнинг хизматлари салмоғи, жараёнда тутган ўрниниadolатли белгилаб беришнинг аллақачон фурсати етди. Бир шоир ижодига бағишиланган ушбу мақола баҳонасида ўзбек болалар шеърияти тарихига қисқа изоҳ берib ўтишга уринганимизнинг боиси ҳам шу — ёш мунаққидлар учун зора кичик бир йўлланма вазифасини ўтаса. Турсунбой Адашбоев фақат ижод билан шуғулланиб қолмай болалар тарбиясига тааллуқли бўлган бошқа йўналишларда, жумладан, боғчалар учун қўлланмалар, мактаб дарслклари тайёрлаш ишларида ҳам фаол қатнашиб келмоқда. У тўпловчилик қилган “Ўзбек болалар адабиёти антологияси”нинг шеъриятга тегишли қисми ҳамда рус тилида “Шарқ” нашриётида босмадан чиққан антология катта воқелик бўлди.

Шоирлик ёш танламайди, шоирликдан истеъфога чиқилмайди. Турсунбой Адашбоевнинг ҳануз куйиб-пишиб ижод қилаётгани, сизларга тақдим этилаётган ушбу китобдан унинг қатор-қатор янги шеърлари ҳам жой олгани бунинг яққол далилидир. Бу сайланма жавонингиздаги энг суюкли китоблардан бирига айланиб қолишига шак-шубҳа йўқ.

Турсунбой акага кўп томондан ҳавасим келади — у вилоятларда яшовчи болалар шоирлари билан мунтазам алоқада бўлишга тиришади, уларнинг янги тўпламларини кўриб чиқиш, маслаҳат-

лар бериш, нашрга тавсия этиш каби юмушлардан эринмайди, доимо шогирдларининг эҳтиромида, дўстларининг эътиборида, фарзандлари ва набираларининг эъзозида. Энг кўзимни кўйдидигани эса, “чол” мақомини олиб ҳам, даврадагилар турлича фикр билдираётганига қарамай, ҳар бирига бирдек бош қимиirlатиб тураверадиган болафеъллигини ҳамон сақлаб қололгани, қадди худди ўттизидагидек расолигидир.

*Қирчиллаган йигит дер,
Қизлар унга қарашиб.
Адашбоев 70 га
Кириб қолди адашиб.*

Қадрдон сафдошимизга соғлиқ, ижодий учқурликлар тилаб қоламиз!

Анвар ОБИДЖОН,
Ўзбекистон халқ шоири.

МУНДАРИЖА

Дадамлар билишмади
Дўстлик
Кўмир ташидик
Менинг акам
Тегирмонча
Мураббо пиширдик
Бодринг
Усти ивиб қолади
Хавотир бўлманг
Конфет
Сичқон қанча яшайди?
Дарвозабон
Поезд нега пишиллар?
Баҳо етишмаяпти
Қоронғида кўрмабман...
Икки баҳодир
Арслонбоб шаршараси
Ўшга саёҳат
Олой
Кўкёнгоқ
Олатоғлик бўламан
Ухлаб қолдим
Ниёз билан пиёз
Аlam, alam...
Йиглама, оппоққинам
Эсимда йўқ
Ишларим кўп
Асом — рассом
Қовун едик
Ким ўзғир?
Катта бўлсам кияман
Керз этик
Қишлоғим
Мерган
Яйловда
«Р» ҳарфи
Зира
Таътилда
Козим ҳайрон

Ой
Эски бўлиб қолади
Олатоғлик бўламан
Яша, раҳмат
Яхмалак
Қишининг тўни сўкилар
Ой Петри
Варрак
Чақмоқ
Ағдаришмоқ
Онажоним
Ўқириқ
Кушандা
Баҳор келгач
Момақаймоқ
Ўғлимга
Барча қойил
Йилқичи
Ёш дорбозлар
Фишт қуямиз
Шоли «полвон»
Сумалак
Буғдоизорда
Куз
Дўппи
Бувимларга маза-да
Жойига осяпман...
Бақалар
Ялаяпман
Майиз
Бўлмасам-чи...
Бурни қонаб...
Қариб қолибди
Сичқоннинг орзуси
Қўғирчогин авайлаб
Пашша
Ҳали ёш-да...
Мақтанчоқ чумоли
Овда
Қирғовул
Қўклам қувончи

Мақтанчоқ
Чақимчининг жазоси
Кетмасайди гап тараб...
Жўнатаман қўёшни
Кўнглим ўсар тоғдайин
Бойчечак
Олмос қалам
Тўрт фасл
Қизғалдоқлар қутлашар
Ёдгорлик
Турналар
Дур сочилиди тоғларга
Жала ёғди, чала ёғди
Чилла чиқиб
Жазо
Лоф эмас
Дазмол
Қайнаяпти
Беркинмачоқ
Инсофи йўқ
Сўна
Жирафанинг кўйлаги
Баҳс
Туфлисига қум кирап
Ўргатяпман
Лақма чумчуқлар
Бўкиб қолган
Хайлашмай...
Оқ булат
Дўл
Ўргимчакнинг ҳийласи
Буғдой бошоғи
«Ш» билан «Ч»
Шошмай тур
Хашар
Арқитда
Баҳор тушиб келар тоғдан
Қишлоғимни соғиниб
Камалак
Уйин топмай
Дароз сартарош

Пишлоқ
Инсоф тираб
Чил ови
Ёрдам сүраб
Күзин очса
Бобо қанча ёшдасиз?
Лойиҳада йўқ уйлар
Уч паҳлавон
Ким айтади?
Фоз карнайчи бўлмасин
Бошиңг кўкка етса ўам
Аямади мўйлабин
Топқир бўлсанг...
Ўт кетди
Ваннасини эслади
Адолатли қози
Ориятли хўроз
Олтин ёлли тулпор қиссаси
Оқ фотиҳа сўрадим
Асфальтдаги расмлар
Байрам куни
Оқбура тўлқинлари
Саричелак
«Эртаклар дунёси»
Ёрдамчилар
Омон бўлсин
Олқиши
Нега оғримас бошиңг?
Ишонмасанг...
Беш панжа
Тальятнинг тулпори
Тўрт амал
Кўйлак тикар
Зоғора
«Сўнгги» жанг
«Сохта» бузоқча
Шафтоли
Оққушлар
Кўш қалдирғоч
Лола
Хайрлашмай...

Мұҳаррамнинг машғулоти
Учрашувда
Үн икки варақ дафтар
Жүннатаман қүёшни
Москвадан салом хат
Салом, Сафед Булондан!
Соранинг мактуби
Овулдан саломнома
Аравондан салом хат
Ширин-шакар қизларимга
Фуфайка
Куйма калиш
Сушилка
Онамнинг сўнгти илтимослари
Уч бўталоқ ва сирли қовоқ
Тескари эртак
Бургутнинг ўлими
Сувараклар сардори
Бешик
Бошим узра
Ўрнак
“Кенжা ботир” тугамай
Набираларимга
Ботиралининг саволлари
Тулпоркўлда
Тенги йўқ
Яна бир сўз
Завқ
Қишининг сепи
Кўз тегмасин
Мен ўша Латифбойман
Овнинг гашти
Юган солиб, эгар уриб
Барчаси ёдимда
Бешта саноч
Пойга завқи
Фургулдай
Фермер
Яйловда
Калхатни ҳам
Капалак туғилганда

Хуштак чалиб турасиз
Бекмуроднинг тарлони
Тофнинг тоғдек ташвишлари
Яссавий зурриётлари
Бургутнинг ўлими (*Баллада*)
Қисмат (*Баллада*)
Нафармон сут ҳангомаси
(*Рассом Толибжон Қаноатовга бағишлайман*)
Устозларга
Ўғлим Муроджонга тилагим
Қарорим Ўш
Кушлар табриги
Ибрат
Тандирчи
Сафар билан...
Кўпни кўрдик
Равил Албековнинг хазинаси
Зумраша
Бешта арра
Чумчукларга уядир
Фарқи битта ҳарфда
Нечта шалпанг қулоғи?!

Маймуннинг шукронаси
Олақанотнинг полапонларига насиҳатлари
Ўқитувчим
Кўпкари
Шунқор бўлса
Камалак
Ўланбулоқ
Кўргазмада
Толдибулоқ
Олтин боши тошдан бўлсин
“Ушшоқ”
Лайлаклар қўналғаси
Ўрни борнинг қадри бор (*Сўнгги сўз*)